



Fa'aaogā e leai se Tau i le

www.Bible-Lessons.org

Bible Study Format (C) Merlin Beerman.

All rights reserved world-wide.

Matā'upu Fa'atonutonuina mai le **"La'asaga Iā Keriso"** tusia e E.G. White.

Fa'amaninoga (C) Goodsalt - www.goodsalt.com

O nei a'oa'oga e maua i gagana 'ese'ese a e leai se tau, e mafai ona kopiina ma tufa atu. E lē mafai ni suiga, o le fa'atau atu, po o le fa'aliliuina i so'o se tulaga a e lē o mua'i fa'atagaina i se tusi mai le lomitusi. O lenei fa'aaliga e tatau ona i ai i matā'upu uma o le su'esu'ega.

O lenei fa'asologa ma isi e mafai ona fa'atauina atoa i se aofa'iga e fa'atele, e matuā lelei le lolomiga, felanua'i le fa'atulagaina, ma o le tau e fa'atusatusaina i le tau e kopiina ai.

**www.RevelationPublications.com pe vala'au le
publisherforGod@gmail.com**



Lesona 1

O le Alofa o Le Atua Mo Tagata

**(1) E FA'APEFEA ONA
FA'AALIA E LE ATUA LONA
ALOFA MO ĀNA FOAFOĀGA
UMA?**

*E fa'asaga atu iā te 'Oe mata o mea
uma lava; e te avatua fo'i a latou mea e
'ai i ona aso e tatau ai. O lo'o e
fa'amafola Lou 'a'ao, ma fa'amao'ona le
mana'o o mea ola uma lava. **Salamo**
145:15, 16*

Mau e tau i ai: Filipi 4:19; Salamo
104:21, 27; 136:25; Mataio 6:26; Ioelu
2:22; Efeso 3:20; Kenese 1:30

O lo'o molimau le foafoāga ma fa'aaliga i le alofa o le Atua. Se'i taga'i i mea matagofie ma le ofoofogia ua faia mo i tatou; o lo tatou Tamā i le lagi o le pogai o le ola, poto, ma le oli'oli! Mafaufau i le 'ese'esega o le faiga e fa'atatau i le mana'omia e tatau ma le fiafia mo meaola uma, a e lē mo na'o le tagata. O le susulu o le lā ma le timu, e fa'afouina ma fa'afiafiaina ai le 'ele'ele, o atumauga, vanu ma le sami, o lo'o molimau i le alofa ofoofogia o Lē na faia i tatou. O le Atua e aumaia mea e mana'omia i aso ta'itasi e Āna foafoāga uma.

(2) E FA'APEFEA ONA FA'AMATALAINA LE ATUA I LE TUSI PA'IA?

O i tatou fo'i, ua tatou iloa, ma ua fa'atuatua i le alofa ua i le Atua iā te i tatou. O le Atua o le alofa lava Ia; o lē tumau i le alofa, ua tumau ia i totonu o le Atua, o le Atua fo'i o i totonu iā te ia.
I Ioane 4:16

Mau e Tau i ai: Auēga 3:22, 23; Roma 8:38, 39; Salamo 36:7-9; I Ioane 4:8, 12, 13; 3:1

Na faia e le Atua le tagata e ato'atoa le pa'ia ma le fiafia; o le lalolagi fo'i e le'i i ai se pala po o se ata o le fetu'u ina ua faia mai le 'a'ao o Lē na foafoaina. O le soliina o le tulafono a le Atua - le tulafono o le alofa - sa aumai ai fa'anoanoāga ma le oti. A e ui ina puapuagatia ona o le agasala, o lo'o fa'aali mai pea le alofa o le Atua; ma o lo'o tusia mai ua fetu'u e le Atua le

'ele'ele mo le lelei o le tagata (Kenese 3:17). O le la'au tuitui ma mea talatala - o fa'afitauli ma tofotofoga e aumai ai le olaga galue ma le tausī mea - na tu'uina mai mo lona lelei e a'oa'o ai i le fuafuāga a le Atua mo lona si'itia a'e mai le leaga ma le malaia na aumai e le agasala. E ui ina ua pa'ū le lalolagi a e lē na'o le fa'anoanoa ma le mafatiāga e o'o mai. O le uiga moni o ia mea o fe'au o le fa'amoemoe ma le fa'amafanafanaga. O fugāla'au matagofie e fua mai la'au tuitui, ma fuārosa mai mea talatala.

"O le Atua o le alofa lava Ia" o lo'o tusia i fua o le a matalatala mai, i luga o lau o le mutia o le a oso a'e. O manulele matagofie o fai pese a o felelei solo, o fugāla'au lanu 'ese'ese ua fa'asasala le manogi i le fanua, o la'au tetele i le vaomatua ma o latou lau e fa'aalia le lanu meamata o mea o lo'o ola lelei, - e molimau uma latou i le tausiga fa'aleTamā a lo tatou Atua ma Lona fa'anaunau ia fiafia Lana fanau.

(3) O Ā NI FA'AILOGA E FA'ASINO I LE UIGA O LE ATUA?

O ai ea se Atua e tusa ma 'Oe o le fa'amagalo agasala, ma ua lē manatua solitulafono a ē o totoe o Lona tofi? Na te lē fa'amoemoe pea i Lona to'asā, auā e fiafia o Ia i le alofa. Mika 7:18

Mau e tau i ai: Esoto 15:11; 34:6, 7; Salamo 103:9; 112:4; 145:8; 71:19; 86:5; Isaia 55:7; Iona 4:2

E fa'aalia mai le uiga o le Atua e Lana Afioga. O Ia lava na ta'u mai e tele

Lona tigāalofa ma o Lona alofa e lē gata. Ina ua tatalo Mose, "Ia e fa'aali mai iā te a'u Lou mamalu," sa fetalai le Ali'i, "Ou te fa'aui atu Lo'u lelei uma i ou luma" (Esoto 33:18, 19).

Ua fusia e le Atua o tatou loto iā te Ia i le lagi ma le lalolagi. E ala i mea na foafoaina, o le loloto ma le agamalū o fusi fa'alelalolagi o lo'o mafai ona iloa e loto o tagata, o lo'o Ia taumafai pea e fa'aali mai o Ia iā i tatou. O lo'o fa'ailoa mai e nei mea uma Lona alofa, e ui ina e lē ato'atoa.

(4) O LE A FA'APEFEA LE TATOU VA'AIGA O LE ATUA PE AFAI TATOU TE LĒ O ILOA O IA A E NA O LE TALITONU I TU'UA'IGA SESĒ A SATANI E TETE'E I LONA UIGA?

*Latou te etoeto i le efuefu pei o le gata; e pei o mea fetolofi i le lau'ele'ele latou te tetemū ai i mea ua puipuia mo i latou; latou te matata'u i le Ali'i lo tatou Atua; latou te fefefe fo'i iā te 'Oe. **Mika 7:17***

Mau e tau i ai: Esoto 15:14- 16; Iosua 2:9-11; 9:24; Salamo 9:20; Isaia 2:19-21; 64:2; Ieremia 33:9; Fa'aaliga 6:15-17

E ui lava ua tu'uina mai nei fa'amaoniga uma e fa'atatau i le uiga o le Atua, ua fa'atauasoina mafaufau o tagata e le fili o mea lelei, o lea ua latou va'ai atu ai i le Atua ma le mata'u; ua latou manatu o Ia e sauā ma e lē loto fa'amagalo. Ua ta'ita'iina e Satani tagata ia manatu o le Atua Lē e fa'amuamua

fa'amasinoga e lē finaua'ia,- o Ia o se fa'amasino sauā, se tali'aitalafu e faigatā ma fa'amaliegatā. Ua ia fa'aalia mai se ata o Lē na foafoaina mea uma e pei o sē e lo'o mata'i mai ma fofoga 'ele'elea ia iloa fa'alētonu ma sesē a tagata, ina ia tu'u se fa'amasinoga i luga o i latou. Na afio mai Iesu ma soifua ai ma tagata ia 'ave'esea lenei ao pogisā e ala i le fa'aalia i le lalolagi le alofa e lē mafa'agataina o le Atua.

**(5) O LE Ā LE AVANOA TĀUA
NA LĒ TOE MAUA E LE
AIGĀTAGATA INA UA UMA ONA
FILIFILI E AGASALA?**

*E le'i vaa'ia lava le Atua e se tasi; o le Alo e to'atasi o lo'o i le fatafata o le Tamā, o Ia ua na fa'ailoa mai o Ia.
Ioane 1:18*

Mau e tau i ai: Ioane 6:46; Esoto 33:20; I Timoteo 6:16; I Ioane 4:12, 20

**(6) E FA'APEFEA ONA TATOU
ILOA PE FA'APE'Ī LE TAMĀ?**

Ana iloa e outou o A'u, po ua iloa fo'i e outou Lo'u Tamā; e amata nei fo'i ona iloa o Ia e outou, tou te va'ai fo'i iā te Ia. Ioane 14:7

Mau e tau i ai: Ioane 17:4-8, 26; 5:19, 20; I Timoteo 3:16; Kolose 1:15

Na afio mai le lagi le Ālo o le Atua e fa'atinoina le Tamā. Ina ua fai talosaga se tasi o le 'au so'o, "Ia e fa'ailoa mai le Tamā," sa tali atu Iesu, "Filipo e, ua loa lava ona 'Ou i ai iā te

'outou, a e te le'i iloa ea A'u? O lē ua
va'ai mai iā te A'u, ua va'ai o ia i le
Tamā; pe se ā fo'i e te fai mai ai,
Fa'ailoa mai le Tamā iā te i matou?"
(Ioane 14:8, 9).

(7) O Ā NISI MAFUA'AGA NA AFIO MAI AI FO'I IESU I LE LALOLAGI?

*Ua i O'u luga le Agaga o le Ali'i, auā ua
na fa'au'u mai iā te A'u e folafola le tala
lelei i ē matitiva; ua 'auina mai A'u e Ia
e fa'amalolo i ē loto momomo, e tala'i le
sa'olotoga i le tafeaga, ma ia pupula
mata o ē tauaso, e tu'u sa'oloto i ē ua
fa'asauāina, e tala'i le tausaga e
finagalo malie mai ai le Ali'i. **Luka
4:18, 19***

Mau e tau i ai: Galuega 10:38; 26:18;
Mataio 11:5; Isaia 50:4-6; 29:18, 19;
35:5, 6; Salamo 147:3; 107:13-20;
146:7-9

O Lana galuega lenei. Sa
femalagaa'i o Ia e faia galuega lelei ma
fa'amalōlō i latou uma ua
fa'apuapuagātiaina e Satani. O nisi pito
nu'u atoa lava e le'i maua ai se tigā po o
se fa'anoanoa i se aiga, ona sa Ia
fa'amalōlō i a latou tagata mama'i uma.
O Āna galuega sa aumaia se
fa'amaoniga o Lona itū Atua. O le alofa,
alofa mutimutivale, ma le fa'apalepale
sa fa'aalia i gaoioiga uma o Lona
soifuāga; o Lona finagalo e fa'ailoa i le
tigāalofa fa'apalepale mo le fanau a
tagata. Na Ia 'aveina le uigamoni o le
tagata, ina ia iloa e Ia mana'oga o le
tagata. O ē matitiva ma tulaga maulalo e

le'i fefefe e ō mai iā te Ia. E o'o fo'i i le fanau laiti sa fiafia latou e ō mai iā te Ia. Sa Ia si'i i latou i Ōna a'ao a o latou tepa a'e i Ōna foliga fa'anoanoa ma le alofa.

**(8) SA FA'APEFEA ONA
FA'AALIA MAI E KERISO IA
LAVA MA LE FE'AU O LE TALA
LELEI?**

Ua liu tino tagata le Lokou, sa mau fo'i o Ia ma i tatou, na matou matamata i Lona mamalu; o le mamalu lava lea o le Alo eto'atasi o le Tamā, ua tumu o Ia i le alofa tunoa ma le fa'amaoni. Ioane 1:14

Mau e tau i ai: Ioane 1:16, 17; Salamo 45:2; 85:10, 11; Kolose 1:19; I Timoteo 1:14

E le'i nātiaina e Iesu se 'upu moni e tasi, a e sa Ia fa'ailoa mai i taimi uma lava ma Lona alofa. O Ia e aupito sili le fa'autauta ma le mafaufau, e agaaloa i Āna felafolafoa'iga ma tagata. E le'i fa'atūifanua, lē faia se 'upu mamafa pe e fa'alēāva, le'i fa'atigā i se agaga o lo'o mafatia. Na te le'i fa'afaitioina vaivaiga fa'aletagata. Sa Ia fetalai i le 'upu moni, a e faia i le alofa. Na Ia ta'uileagaina le fa'atagālelei, lē talitonu, ma le agasala; a e o Lona si'ufofoga sa tumu i le fa'anoanoa a o Ia fa'aleoina Āna a'oa'iga e matuā malosi lava. Na tagi o Ia mo Ierusalem, le 'a'ai sa Ia alofa i ai, ina ua lē talia o ia, le ala , le 'upu moni, ma le ola. Sa latou te'ena o Ia, le Fa'aola, a e na Ia fa'atatauina i latou ma se fa'apalepale o le loto mafatia. O Lona soifuāga e lē fa'apito ma e tumu i le

agaalofa mo isi. O agaga uma sa pele i Lona finagalo. A o Ia tau'ave pea Lona Ia lava mamalu fa'ale Atua, sa Ia punoa ma le agamalū e fa'atatauina tagata ta'ito'atasi o le aiga o le Atua. I foliga o tagata uma, na Ia silasila ai i agaga ua pa'u'ū, lea na afio mai e fai Lana galuega ia fa'asao ai.

O lea le uiga o Keriso pei ona fa'aalia i Lona soifuāga. O le uiga lea o le Atua. E mai le agaga o le Tamā o lo'o fa'atafe mai ai le agaalofo fa'aleAtua, e fa'atinoia iā Keriso, ma tafe atu i le fanau a tagata. O Iesu, le Fa'aola e agamalū, e tigāalofa, o Ia le Atua "i le tino tagata" (I Timoteo 3:16).

(9) SA FA'APEFEA LE TALIINA O IESU A O I LE LALOLAGI MO LO TATOU LELEI?

Ua inosia ma tu'ulafoa'ina o Ia e tagata; o le tagata fa'anoanoa, ua masani fo'i ma le tigā; e peiseā'ī ua 'alo 'ese mata iā te Ia, ua inosia o Ia, ma ua tatou lē manatua lava o Ia. E moni ua na tau'ave a tatou tigā, ma na tau'ave o tatou fa'anoanoa; a ua tatou manatu o Ia ua taia, ua fasia e le Atua, ma ua fa'atigāina. A ua manu'a o Ia ona o a tatou solitulafono, ua momomo o Ia ona o a tatou amioleaga; o le a'oa'iga e filemū ai tatou sa i Ōna luga lea, o Ōna fa'alavalava fo'i ua malolo ai tatou.

Isaia 53:3-5

Mau e tau i ai: Isaia 53:11-12; Mataio 26:67-68; 27:39-44; Mareko 15:15-20; Eperu 12:2, 3; Ioane 1:10, 11; Roma 4:25; I Peteru 3:18; 2:23, 24.

O Iesu na soifua ma mafatia ma maliu ina ia togiolaina ai i tatou. Sa 'avea o Ia "O le Tagata fa'anoanoa," ina ia tatou tofusia le 'oli'oli e fa'avavau. Na fa'atagaina e le Atua Lona Ālo pele, e tumu i le alofa tunoa ma le fa'amaoni, e afio ifo mai se lagi e lē mafa'amatalaina le mamalu, i se lalolagi ua fa'aleagaina ma fa'amalaia e le agasala, ua fa'apouliuliina e le fa'amalumalu o le oti ma le fetu'u. Ua Ia fa'ataga o Ia e maliu 'ese mai le saogalemū o Lona alofa, mai le fa'aaloaloga a agelu, ia fa'atigāina i le mā, tauemuina, fa'alumaina, 'inosia, ma le oti. Fa'auta iā te Ia i le vaomatua, i Ketesemane, i luga o le satauro! O le Ālo o le Atua e leai se pona ua Ia tau'ave i Ōna lava luga le mamafa o le agasala. O Ia Lē na tasi ma le Atua, ua lagona i Lona agaga le mata'utia o le tu'u'ese'esega ua faia e le agasala i le vā o le Atua ma le tagata.

(10) O Ā UPU NA 'ALAGA ATU AI IESU I LE TAMĀ A O MAFATIA?

Ua lata i le itu aso e iva, ona alaga ai lea o Iesu ma le leo tele, ua fa'aapea atu, "Eli, Eli lama sapatani?" o lona uiga lenei, "Lo'u Atua e, Lo'u Atua e, se ā le mea ua e tu'ulafoa'i mai ai A'u?"

Matthew 27:46

Mau e tau i ai: Salamo 22:1; Isaia 59:2; Fa'ata'oto 15:8, 29; Ieremia 5:25; Mika 3:4

O le avega mamafa o le agasala, o le lagona o lona mata'utia, o le vavae'esea o le agaga mai le Atua,- o lenei le pogai na fa'amomomoina ai le

fingalo o le Ālo o le Atua.

**(11) O Ā MAFUA'AGA FA'AVAE E
LUA NA AUINA MAI AI E LE
ATUA LONA ĀLO I LENEI
LALOLAGI?**

*Auā ua fa'aapea lava ona alofa mai o le
Atua i le lalolagi, ua Ia 'aumai ai Lona
Atali'i e to'atasi, ina ia lē fano se tasi e
fa'atuatua iā te Ia, a ia maua e ia le ola
e fa'avavau. Ioane 3:16*

*O lenei, sa iā Keriso le Atua, ua
fa'aleleia e Ia le lalolagi iā te Ia, ua lē
ta'ua a latou agasala iā te i latou; ua Ia
tu'uina mai fo'i iā te i matou le 'upu o le
leleiga. II Korinito 5:19*

Mau e tau i ai: Ioane 17:23; 1:29;
Roma 3:24-26; 5:10, 11; I Ioane 2:1, 2;
4:10; I Peteru 4:14; II Korinito 5:18-21

A e o lenei taulaga sili e le'i faia
ina ia fa'atupu ai se alofa mo le tagata i
le finagalo o le Tamā, e lē ina ia
finagalo ai Ia e fa'asao. E leai lava!
"Auā ua fa'aapea lava ona alofa mai le
Atua i le lalolagi, ua Ia aumai ai Lona
Ālo e to'atasi." E alofa le Tamā iā i
tatou, e lē ona o le fa'aleleiga tele, a e ua
Ia fa'aleleia ona e alofa o Ia iā i tatou.
Sa puapuagātia le Atua ma Lona Ālo. I
le mafatiāga o Ketesemane, le maliu i
Kalevario, o le agaga o Lē alofa e lē
gata na totogiina le tau o lo tatou
fa'aolataga.

**(12) SA FA'APEFEA ONA
FA'AMATALA E IESU LANA
'AUAI I LE GALUEGA O LE**

FA'ASAOINA O LE AIGĀTAGATA UA PA'Ū MA O LE Ā LE TALĪ A LE TAMĀ?

*O le mea lea e alofa mai ai le Tamā iā te A'u, auā 'Ou te tu'uina atu Lo'u ola, ina ia 'Ou toe 'aumai ai. **John 10:17***

Mau e tau i ai: Filipi 2:6-9; Tito 2:14; Ioane 17:4, 5, 21-26; Eperu 2:9, 14, 15

O Lo'u Tamā e alofa tele iā te 'oe ma ua sili atu fo'i Lona alofa iā te A'u ina ua tu'uina Lo'u ola e togiola ai 'oe. Ina ua 'avea ma Ōu sui ma le mautinoāga, i le tu'uina atu o Lo'u ola, i le 'aveina o ōu leaga, o āu agasala, ua fa'apeleina A'u e Lo'u Tamā; auā e ala i La'u taulaga, ua iloa o le Atua e fa'amaoni, a e o Ia fo'i Lē e fa'aalia o ia e fa'atuatua iā Iesu.

E leai se tasi a e na o le Ālo o le Atua e mafai ona fa'ataunu'uina lo tatou fa'aolataga; auā e na'o Ia o lo'o pele i Lona Tamā e mafai ona ta'uina mai Ia. E na'o Ia o lo'o silafia le maualuga ma le loloto o le alofa o le Atua e mafai ona fa'aalitinoina maia. E leai se mea vaganā le taulaga ofoofogia sa faia e Keriso e sui ai le tagata ua pa'ū e mafai ona fa'aailoa mai le alofa o le Tamā mo le aigātagata ua lēiloa.

"Ua fa'apea lava ona alofa mai le Atua i le lalolagi, ua Ia aumai ai Lona Ālo e to'atasi." Na Ia tu'u mai Ia e lē na'o na soifua ma tagata, e tau'ave a latou agasala, ma maliu fa'ataulaga mo i latou. Na Ia tu'u Ia mo le aigātagata ua pa'ū. Na tu'u mai e Keriso o Ia e fa'atatau fa'atasi ma mana'oga ma fa'anaunauga o le fanau a tagata.

(13) O LE Ā LE IGOA UA TA'UA AI TATOU E IESU A E LĒ MĀ AI?

Auā o Lē na te fa'apa'iaina mai atoa ma i latou uma ē ua fa'apa'iaina, e tasi lo latou tupuga; o le mea lea e lē mā ai o Ia ia ta'ua i latou o Ōna uso.

Eperu 2:11

Mau e tau i ai: Mataio 12:48-50; 25:40; Ioane 17:21; 20:17; Mareko 8:38; Roma 8:29

O Ia Lē na tasi ma le Atua ua fa'aso'ota'i ma le fanau a tagata e ala i fusi e lē mafai ona toe momotuina. O Ia o la tatou Taulaga, o lo tatou Fautua, o lo tatou Uso, ua 'aveina le itū tagata i luma o le nofoāli'i o le Tamā, ma e o'o i le fa'avavau ua tasi ma le aigātagata na Ia togiolaina - o le Atali'i o le tagata. O nei mea uma ua faia atonu o le si'itia a'e ai le tagata mai le fa'aleagaina ma le tulaga to'ilalo o le agasala a e fa'aātaina le alofa o le Atua ma tofusia i le fiasia o le fa'apa'iaina.

(14) I LONA ALOFA E MATUĀ OFOOFOGIA, O LE Ā LE FA'AALOALOGA SILI UA TU'UINA MAI E LE TAMĀ MO I TATOU?

*Fa'auta i le silisili o le alofa ua foa'iina mai e le Tamā iā te i tatou, ina ua ta'ua i tatou o le fanau a le Atua; o le mea lea e lē iloa ai i tatou e le lalolagi, auā na lē iloa o Ia. **I Ioane 3:1***

Mau e tau i ai: Il Korinito 6:18; Roma 9:25, 26; Kalatia 4:5, 6; Hosea 1:10

O le tau na totogiina mo lo tatou fa'aolataga, o le taulaga e lē mafa'agataina o lo tatou Tamā i le lagi i le aumaia o Lona Ālo e maliu mo i tatou, e tatau ona tu'u mai iā i tatou mafauauga fa'aeaina o le tulaga e mafai ona tatou maua e ala iā Keriso. E pei ona iloa e le aposetolo o Ioane le maualuga, le loloto, le lautele o le alofa o le Tamā mo le aigātagata o le fa'amalaiaina, sa fa'atumulia o ia i le fa'aaloalo ma le mata'u; ma ina ua lē maua se gagana e fa'amatala ai le silisili 'ese ma le agamālū o lenei alofa, sa ia fa'aleo atu i le lalolagi, "Fa'auta, i le silisili o le alofa ua foa'iina mai e le Tamā iā te i tatou."

(15) E FA'APEFEA ONA AVEA I TATOU MA FANAU A LE ATUA?

O i latou uma na talia o Ia, ma fa'atuatua i Lona suafa, na Ia avatu i ai o lea manuia, ia 'avea i latou ma fanau a le Atua. Ioane 1:12

Mau e tau i ai: Roma 8:14-17, 21; Kalatia 3:26; Ieremia 3:14, 19, 22

Fa'auta i le tāua ua i luga o le tagata! E ala i le agasala ua pulea le fanau a tagata e Satani. E ala i le fa'atuatua i le taulaga togiola a Keriso o le fanau a Atamu ua mafai ona ta'uina o le fanau a le Atua. Ina ua Ia 'aveina le uiga fa'aletagata, na si'itia e Keriso le aigātagata. Na tu'uina le aigātagata, e ala i le so'otaga ma Keriso, i se nofoāga ina ia mautinoa e latou te 'ausia le tulaga o "atali'i o le Atua."

O lenei alofa e lē mafa'atusaina. O

le fanau a le Tupu o le lagi! O se folafolaga e matuā pele lava! 'Autū mo manatunatuga e aupito loloto! O le alofa e lē mafa'atusaina o le Atua mo se lalolagi e lē o alofa iā te Ia! O le manatu e i ai se mana fa'ato'ilalo i luga o le agaga ma e aumaia le mafaufau ina ia fa'apagotāina e le finagalo o le Atua. A tatou su'esu'e atili le uiga pa'ia i le malamalama o le satauro, o le a tatou va'aia le alofa tunoa, o le agamalū, ma le fa'amagaloga e tu'u fa'atasi ma le lotogatasi ma le fa'amaoni, ma o le tele lea o le manino o le malamalamaga o fa'amaoniga e tele i le alofa e lē gata ma se fa'apalepale e sili atu i lo se tinā o lo'o naunau mo lana tama ua ta'asē.

Ou te fa'afetai i lo tatou Tamā fa'alelagi mo le matagofie o mea na Ia faia ma le saunia o mea 'ou te mana'omia fa'aapea meaola uma.

Li'o le tali: Ioe Lē mautonu

Ua fa'atumuina a'u i le alofa ona ua ou iloa le alofatunoa, fa'apalepale, ma le agaalofoa ua Ia fa'aalia iā te a'u e ala i le meaalofoa o Lona Ālo pele.

Li'o le tali: Ioe Lē mautonu

Ua ou ofo ina ua ou iloa le afio mai o Iesu i lenei lalolagi ma Ia fa'aailoa Lona alofa e ala i le fa'amalōlō o ē mama'i, fa'amafanafana ē loto momomo, ma tu'uina Lona soifua ia fa'asaoina ai le aigātagata ua pa'ū.

Li'o le tali: Ioe Lē mautonu

[illegible]

Io e

Lē mautonu



Lesona 2

E mana'omia Le Atua e le Tagata Agasala

(1) O Ā UIGA LELEI E MAUA PE A TATOU ĀVA I LE ATUA MA USIUSITA'I IĀ TE IA?

*O le mata'u i le Ali'i o le amataga lea o le poto; ua i ai le mafaufau lelei iā te i latou uma o ē fai ia mea; e tumau Lona vi'iga e fa'avavau lav. **Salamo 111:10***

Mau e Tau i ai: Fa'ata'oto 1:7; 9:10; 10:27; Iopu 28:28; Teuterenome 4:5, 6; Ioane 3:17

Sa tu'u i le tagata i le amataga mana fa'atamali'i ma se mafaufau e matuā ato'atoa. O lona tulaga fa'aletagata sa ato'atoa, ma e ō gatasi ma le Atua. O ōna manatunatuga sa mamā,

o ōna i'uga e pa'ia. A e ona o lona lē
usiusita'i, sa fa'aleagaina ōna mana, ma
ua suia le alofa e le manatu fa'apito. Sa
fa'aitiitia lona uiga moni ona o le
agasala o lea ua lē ai e ia, i lona lava
malosi, ona tete'e le mana o le ti'apolo.
Ua fa'apologa o ia e Satani, ma e manū
e tumau ai i lea tulaga e fa'avavau pe
ana lē fa'alaveaina e le Atua. Sa naunau
lē fa'aosooso e to'esea le fuafuaga pa'ia
na i ai ina ua faia le tagata, a e
fa'atumuina le lalolagi i le fa'anoanoa
ma le puapuagātia. Ma o le a fa'asino i
nei leaga uma ua pogai mai i le galuega
a le Atua i le faiga o le tagata.

(2) AISEĀ NA LALAFI AI ATAMU MA EVA MAI LE ATUA?

*Ona tali mai lea o ia, "Na 'ou fa'alogoa
atu i Lou si'ufofoga i le fa'ato'aga, ona
'ou fefe ai lea, auā ua 'ou lē lavalavā;
ona ou lafi lea. **Kenese 3:10***

Mau e Tau i ai: Kenese 2:25; I Ioane
3:20; Isaia 59:2; Esoto 3:6; Iopu 23:15,
16; Salamo 119:120; Fa'aaliga 3:17, 18;
16:15

I lona tulaga lē agasala, sa fiafia le
tagata i le so'otaga ma Ia Lē "ua iā te Ia
le oloa uma o le poto atoa ma le
malamalama, ua lilo ai" (Kolose 2:3). A
e peita'i ina ua uma ona agasala, sa lē
toe mafai ona maua e ia le fiafia i le
mamalu, ma na ia sa'ili i se mea e lafi ai
i le fa'atasi mai o le Atua. O lo'o
fa'apeapea ai lava le tulaga o le loto e lē
o fa'afouina. E lē o toe ō gatasi ma le
Atua, ma e lē o maua se fiafia i le
so'otaga ma Ia.

(3) O LE Ā LE TALI O LE A TU'UINA MAI E LE TAGATA LĒ SALAMŌ I LUMA O KERISO PE A TOE AFIO MAI O IA?

*Ua latou fai atu fo'i i mauga ma papa,
Mafuli mai ia iā te i matou, ma tanuma'i
matou ai le silafaga a Lē ti'eti'e i le
nofoali'i, ma le to'asā o le Tama'i
Mamoe. Fa'aaliga 6:16*

Mau e Tau i ai: Luka 23:30; Ieremia
8:3; Fa'aaliga 20:11; Hosea 10:8

E lē mafai ona fīafia le tagata
agasala i le fa'atasi mai o le Atua; e
mēia o ia i le feso'ota'iga ma agaga e
pa'ia. Pe ana fa'atagaina o ia e ulufale i
le lagi, o le a lē maua e ia se oli'olisaga.
O le agaga lē fa'apito o le alofa - o loto
uma ia e talia le alofa e lē mafa'agataina
- o le a lē pā'ia lona agaga. O ōna
mafaufauga, o mea e tāua iā te ia, o
mana'oga, o le a 'ese mai ma mea e lē
agasala ai o ia. O le a 'avea ia ma se leo
e lē tusa ma leo o le lagi. O le lagi o le a
fai ma fa'atigā iā te ia; o le a naunau o ia
e lafi mai le Malamalama o Ia, le
totonugalemū o lea oli'olisaga. E lē o se
mea e fai fua le fa'atonuga a le Atua ia
lē aofia le 'au amioleaga i le lagi; ua lē
ulufale i latou ona ua lē tauai lo latou
tulaga mo lea fa'atasiga.

O le mamalu o le Atua o le a 'avea
o se afi fa'aumatia iā i latou. E latou te
fa'afeiloa'i le fa'aumatiāga atonu o le a
mafai ai ona fa'alilo i latou mai fofoga o
Lē na maliu ia togiola ai i latou.

(4) AISEĀ E LĒ MAFAI AI E LE TAGATA AGASALA ONA

FA'AMAMĀ E IA LONA LAVA LOTO?

Po o ai ea e 'aumai se mea mamā nai le mea 'ele'elea? e leai se tasi. Iopu 14:4

Mau e Tau i ai: Roma 5:12; Salamo 51:5; Mataio 15:19.

E lē mafai e i tatou ona sola 'ese mai le lua o le agasala ua tatou goto i ai. O o tatou loto e matuā leaga lava, e lē mafai e tatou ona suia. "Auā o le loto i la le tino o le ita lea i le Atua; auā e lē usiusita'i i le tulafono a le Atua, e lē mafai fo'i i ai" (Roma 8:7). O a'oa'oga, tū ma aganu'u, o le pulea o le loto, o taumafaiga fa'aletagata, e tāua ia mea uma i le olaga, a e peita'i e leai se aogā i le fa'aleagaga. Atonu e fa'asa'o tonu ai le amio i le va'aiga mai fafo, a e lē mafai ai lava ona faia se suiga o le loto; e lē mafai e ia mea ona fa'amamā vaipuna o le ola. E tatau ona iai se mana e galue mai totonu, se ola fou mai lugā, ina ia mafai ona suia ai le tagata mai le agasala i le fa'apa'iaina. O Keriso o le mana lava lea! E na o Lona alofa tunoa e mafai ona fa'aolaina vaega uma e lē o ola o le agaga, ma fa'atosina ai ia i le Atua, i le fa'apa'iaina.

(5) O LE Ā LE MEA E TATAU ONA TUPU I O TATOU OLAGA E SAUNIA AI I TATOU MO LE ULUFALE ATU I LE MALŌ O LE ATUA?

Ua tali atu Iesu ua fa'aapea atu, "E moni, e moni, 'Ou te fai atu iā te 'oe, a lē toe fanau le tagata e lē mafai ona

iloa e ia o le malō o le Atua." Ioane 3:3

Mau e Tau i ai: Ioane 1:12, 13; I Peteru 1:23; Efeso 2:5, 10

Na fetalai le Fa'aola, "Vaganā e fanau le tagata mai lugā," a lē maua e ia se loto fou, fa'anaunauga fou, fa'amoemoega, ma ala e ta'ita'iina ai i se olaga fou, "e lē mafai e ia ona va'ai i le malō o le Atua." O le manatu fa'apea e na o le mana'omia ia fa'atupu pea le lelei mai le uiga moni o le tagata lava ia, o se manatu e matuā sesē lava lea.

(6) O LE Ā LE MEA E TASI E MAFAI ONA MALAMALAMA AI I MEA FA'ALEAGAGA?

A ua fa'aalia mai ia mea e le Atua iā te i matou e Lona Agaga; auā e su'esu'e ifo le Agaga i mea uma, o mea loloto fo'i a le Atua. I Korinito 2:10

Mau e Tau i ai: I Korinito 2:14; I Ioane 2:27; Roma 8:5 - 7; Mataio 16:17

"A e lē talia e le tagata fa'aletino o mea a le Agaga o le Atua, auā o mea valea ia iā te ia; na te lē mafai fo'i ona iloa, auā e fa'amasinoina fa'aleagaga" (I Korinito 2:14). "'Aua e te ofo auā na Ou fai atu iā te 'oe, 'E ao ona toe fanau mai outou" (Ioane 3:7). O lo'o tusia e uiga i a Keriso, "Sa iā te Ia le ola; o le ola fo'i o le malamalama lea o tagata" (Ioane 1:4), - e na o "le igoa i lalo o le lagi ua foa'iina mai i tagata e mafaia ona fa'aolaina ai o i tatou" (Galuega 4:12).

(7) AISEĀ TATOU TE FETAUA'I

PEA AI MA LE AGASALA INA UA UMA ONA ILOA LE UIGA O LE AMIOTONU?

*Auā ua tatou iloa o lo'o i la le Agaga le
tulafono, a o a'u ou te i la le tino, ua
fa'atauina atu a'u e fai ma tagata o le
agasala. **Roma 7:14***

Mau e Tau i ai: Isaia 50:1; 59:2; Roma
5:12 - 14; 8:22; Ieremia 17:9; 13:23

E lē o lava i le na'o na va'aia le
tigāalofa o le Atua, le iloa o Lona
āgaalofa, le fa'apalepale fa'ale-Tamā, o
Lona uiga. E lē o lava ona malamalama
i le poto ma le tonu o Āna tulafono, i le
iloa o lo'o fa'avaeina i luga o uiga e
fa'avavau o le alofa. Na iloa nei mea
uma e Paulo le aposetolo ina ua ia
fa'apea, "Ou te ta'utino e lelei le
tulafono." "O le tulafono e pa'ia, o
poloa'iga e mamalu, ma tonu , ma lelei."
Sa fa'anaunau o ia mo le tulaga mamā, o
le amiotonu, e lē mafai e ia i lona lava
malosi ona maua, ona tagi ai lea, "Auē
o a'u le tagata malaia! O ai se lavea'i iā
te a'u ai le tino o lenei oti?" (Roma
7:24). O le tagi lea e tatau ona alu a'e
mai loto ua mafatia o i nu'u uma ma
augātupulaga uma o le lalolagi.

(8) O AI LE FAUTUA TO'ATASI E MAFAI ONA TOE FA'AFO'ISIA LE FESO'OTA'IGA I LE VĀ O LE TAGATA AGASALA MA LE ATUA?

*Auā e toa'tasi le Atua, e to'atasi fo'i le
puluvaga i le Atua ma tagata, o le
tagata o Keriso Iesu lea. **I Timoteo 2:5***

Mau e Tau i ai: Eperu 9:15; Roma 5:1, 2; Ioane 17:3; I Korinito 8:6

E to'atele i latou ua fa'aaogā e le Agaga Pa'ia e fa'amalamalamaina ai lenei 'uppu moni, ma ia fa'amanino i agaga o lo'o naunau ia fa'asa'olotoina mai le avega mamafa o le agasala. Ina ua mae'a ona ia fa'asesē o Esau, na sola loa Iakopo mai le fale o lona tamā, ma sa na tau'ave le mamafa o lana agasala na fai. Sa malaga to'atasi ma 'avea ma tagata ua fa'asevasevaloina, ua tō'esea mai lona aiga ma mea uma sa pele iā te ia, ma o le manatu e tasi sa mamafa i lona loto, o le fefe ona o lana agasala atonu ua vavae'esea ai fo'i ia ma le Atua, pe ua tu'ua to'atasi ia e le lagi. Ma lona loto fa'anoanoa, na ta'oto ia i luga o le 'ele'ele e malōlō, na o atumauga na si'omia o ia, ma fetū pupula o le lagi. A o moe o ia, sa iloa se malamalama 'ese a o fai lana miti; Fa'auta, mai le 'ele'ele o lo'o ta'oto ai ua tū mai se 'apefa'i e foliga e o'o lava le tumutumu i le lagi, ma o feoa'i ai agelu a le Atua fa'asolo i luga ma lalo; a e sa fa'alogoina mai le mamalu o luga le si'ufofoga o lo'o aumaia se fe'au e fa'amafanafana ma le fa'amoemoe. Sa fa'apea ona fa'ailoa iā Iakopo fa'ataunu'uga o le mana'oga ma le fa'anaunauga o i lona loto - se Fa'aola. Sa fiafia o ia ma na fa'afetai ona ua fa'aalia mai le ala e mafai ai e ia, le tagata agasala, ona toe fo'i i le so'otaga ma le Atua. O le 'apefa'i o lana miti e fa'asino iā Iesu, le ala e tasi i le feso'ota'iga i le vā o le Atua ma le tagata.

O le agaga lava lenei e tasi na

fa'ailoa e Keriso i Lana talanoaga ma Natanielu, ina ua fetalai o Ia, "E va'aia e outou le lagi ua avanoa; o agelu fo'i a le Atua e ō a'e ma ifoifo i luga o le Atali'i o le tagata" (Ioane 1:51).

(9) O LE Ā LE ĀLA E TASI E MAFAI ONA TATOU Ō MAI AI I LE TAMĀ?

Ua fetalai atu Iesu iā te ia, "O A'u nei le Ala ma le 'Upu moni, ma le Ola; e lē alu atu lava se tasi i le Tamā, pe a lē ui ma iā te A'u." Ioane 14:6

Mau e Tau i ai: Ioane 10:9; Roma 5:10; Efeso 2:18; Galuega 4:12; Mataio 11:27

I le fouvalega, na vavae'ese e le tagata ia ma le Atua; sa vavae'ese le lalolagi mai le lagi. I lenei vā mamao e lē mafai ai lava se feso'ota'iga. A e peita'i, e ala i a Keriso, e mafai ona toe so'ofa'atasi ma le lagi. Ona o Lona lelei ua toe fa'asoso'o le vā na faia e le agasala, ina ia mafai e agelu a le Atua ona feso'ota'i ma tagata. O Keriso ua na fa'afeso'ota'i le tagata na pa'ū a o i lona tulaga vaivai ma le lē aogā ma le Puna o le mana e lē mafa'atusaina.

(10) AISEĀ E LĒ MANUIA AI A TATOU TAUMAFAGA UMA INA IA FA'ASAOINA I TATOU LAVA IA MAI LE TULAGA PA'Ū O LE AIGĀTAGATA?

Auā o le alofa tunoa ua fa'aolaina ai outou i le fa'atuatua; e lē mai iā te outou fo'i lava, a o le mea ua foa'iina mai e le

Atua; e lē ona o galuega, ina ne'i mitamita se tasi. Efeso 2:8, 9

Mau e Tau i ai: Roma 6:23; 3:20, 23; Kalatia 2:16; II Timoteo 1:9

O le a fa'alēaogā fa'amoemoega mo le lelei ma le alu i luma o mea uma a le tagata, e fa'alēaogā taumafaiga mo le si'itia i luga o le aigātagata, pe afai e fa'agalo le Puna o fa'amoemoe uma ma le fesoasoani mo le lalolagi ua pa'ū. "O mea lelei uma...atoa ma mea alofa uma e ato'atoa ona lelei" (Iakopo 1:17) e mai le Atua ia. E leai se uiga moni e maoa'e pe a lē o gatasi ma Ia; ma e na'o Keriso le ala i le Atua.

(11) O LE Ā LE TAUMAFAGA TELE MAI LE LAGI UA FAIA MO LE TOGIOLAINA O I TATOU?

Auā ana fa'apea po ua tatau ona tigāina fa'alasi o Ia talu ona fa'avaeina le lalolagi; a o lenei, ua tasi lava le fa'aalia mai o Ia i le fa'aatoāga o tausaga, ina ia 'ave'eseina le agasala, ina ua faia o Ia ma taulaga. Eperu 9:26

Mau e Tau i ai: Eperu 9:12; 7:27; I Peteru 2:24; 3:18; Ioane 10:11

E matuā mo'omo'o lava le finagalo o le Atua, ma se alofa ua malosi atu i lo o le oti, mo Lana fanau fa'alelalolagi. Ina ua tu'uina mai Lona Alo, na Ia liligi ifo fa'ameaalofa mo i tatou le lagi atoa. O le soifuāga ma le maliu ma le galuega fa'afautua a le Fa'aola, o le galuega a agelu, o le galuega fa'atauānau a le Agaga Pa'ia, o galuega uma lē gata a le

Tamā, o fa'agaoioiga ua fa'atāuaina e 'au uma o le lagi, - o i latou uma o lo'o 'auai i le galuega mo le togiolaina o le tagata.

Oi, se'i tatou mafaufau loloto i le taulaga ofoofogia ua faia mo i tatou! Ia tatou taumafai e fa'aaloalogia le malosi ma le loto galue o lo'o fa'aaogā e le Lagi mo le toe fa'afo'i mai o ē na lē iloa, ma toe aumai i latou i le fale o le Tamā. O fa'amoemoega ma tu'inanau malolosi, o le a lē mafai ona fa'ataunu'uina; o tau'i mo mea lelei sa faia, o le oli'olisaga a le lagi, o le mafutaga a agelu, o le so'otaga ma le alofa mutimutivale o le Atua ma Lona Alo, o le si'itia a'e ma le fa'alauteleina o tatou mana uma mo augātupulaga e fa'avavau- e lē o ni fa'amalosi'aga nei e u'una'i ai i tatou ia tu'u atu i le galuega e faia ma le loto alofa mo lo tatou Fa'aola ma Lē na faia i tatou?

A e o fa'amasinoga a le Atua ua fa'aailoa mai mo le agasala, o le fa'asalaga e o'o mai, o le fa'aleagaina o le amio, ma le fa'aumatiāga mulimuli, o lo'o fa'aailoa mai i le Afioga a le Atua e lapata'i mai ai i le galuega a Satani.

O le a tatou lē fa'atatauina ea le alofa tunoa o le Atua? O le ā se isi mea e tatau ona Ia faia? Se'i tu'u tatou i se tulaga e fa'afeagai tonu ai ma Ia Lē o lo'o alofa moni mo i tatou. Ia tatou fa'aaogā ala uma ua tu'u mai e mafai ai ona liua i tatou i Lona fa'atusa, ma toe fa'afo'u le so'otaga ma agelu 'au'auna, e ō gatasi ai ma toe feso'ota'i ma le Tamā ma le Alo.

Ua ou malamalama nei na faia e le Atua le tagata e atoatoa ma mana ofoofogia ma e talafeagai ma Ia lava. Ona ua tatou lē usiusita'i, ua fa'avaivai



Lesona 3

Ua Iloa Lo Tatou Tulaga

**(1) E FA'APEFEA ONA MAFAI
ONA FA'AMAMĀINA AGASALA
MAI IĀ I TATOU TAGATA
AGASALA?**

*Ona fai atu lea o Peteru iā te i latou,
"Inā salamō ia, ma ia ta'itasi ma
papatisoina outou uma i le suafa o Iesu
Keriso, mo le fa'amagaloina o agasala;
ona maua lea e outou o le mea foa'i fua
mai, o le Agaga Pa'ia lea." Galuega
2:38*

Mau e Tau i ai: Galuega 3:19;
Fa'ata'oto 28:13; Esekielu 36:31; 20:43;
II Korinito 7:9 - 11; Salamo 38:18

E na o Keriso e mafai ai ona
aumaia i tatou ia ō gatasi ma le Atua,
ma le mamalu; a e peita'i, e fa'aapefea
ona ō mai i tatou iā Keriso? E to'atele o

lo'o faia pea lea fesili fa'apei o le motu o tagata i le aso o le Penetekoso, ina ua iloa lo latou tulaga agasala ma ua tagi atu, "O le ā le mea e tatau ona tatou faia?" O le ulua'i 'upu o le tali a Peteru, "Ia salamō." I se taimi mulimuli sa toe fa'apea ifo, "Salamō..." (Galuega 3:19).

O le salamō e aofia ai le loto fa'anoanoa ona o agasala ma le liliu 'ese mai ai. Ia tatou lē 'upu'esea le agasala vaganā ua tatou iloa manino lona leaga; se'iloga ua tatou liliu 'ese mai ai i o tatou loto, o le a leai se suiga moni i le olaga.

E to'atele e lē o malamalama i le uiga moni o le salamō. E fa'anoanoa le to'atele ina ua agasala ma ua tau fai se fa'afouina ia va'aia mai fafo ona o le fefe i o'o mai puapuagā i a i latou mai i ia faiga sesē. Peita'i e lē o le salamō moni lenei i le Afioga a le Atua; ua latou faitio i le tigā a e lē o le agasala. Sa fa'apea le loto fa'anoanoa na o'o i a Esau ina ua ia iloa ua ave'esea e fa'avavau mai iā te ia le tulaga o le ulumatua. O Pala'amo, sa matuā mata'u ona ua tū mai le agelu ma le pelu i lona ala, ma sa fa'ailoa atu lana agasala ina ne'i fasiotia ai o ia; a e peita'i sa leai se salamō moni mo le agasala, e le'i i ai se suiga o fuafuaga, leai se ino'ino i le leaga. Sa alaga Iuta, ina ua uma ona fa'alata o lona Ali'i, "Ua ou agasala, ina ua ou fa'alata Lē ua lē sala" (Mataio 27:4).

O le ta'uta'u atu o lana sesē sa faia fa'amalosi mai lona loto ua lagona ua ta'usalaina ma se va'aiga i le mata'utia o le fa'asalaga. Sa fa'atumuina o ia i le fefe ona o le i'uga e o'o mai, a e lē ona ua loloto le momomo o lona agaga

fa'anoanoa ina ua ia fa'alata le Alo o le Atua ma te'ena le Pa'ia e To'atasi o Isara'elu. O Farao fo'i, ina ua mafatia i lalo o fa'amasinoga a le Atua, na fa'ailoa lana agasala ia 'alo'ese ai mai nisi fa'asalaga, a e peita'i na toe fo'i i lana tete'e o le lagi ina ua fa'agata e le Atua mala na o'o i ai. O i latou uma nei sa tagi auē ona o i'uga o le agasala, a e le'i fa'anoanoa ona o le agasala na faia.

**(2) O LE Ā LE FA'AMATALAGA
UA TU'UINA MAI I LENEI
FUAI'UPU E FA'ATATAU IĀ
KERISO LĒ NA TULI'ESEA LE
POULIULI A E FA'AALI MEA
LILOO LE AGAGA?**

O le malamalama moni lea, na te fa'amalamalamaina tagata uma lava i Lona maliu mai i le lalolagi. Ioane 1:9

Mau e Tau i ai: Ioane 12:46; 8:12; II Korinito 4:6; I Ioane 2:8; I Tesalonia 5:5; Matalaio 6:23

Pe a fa'atosina le loto i le uiga o le Agaga o le Atua, o le a fa'ate'ia le lotofuatiaifo, ma o le tagata agasala o le a malamalama i le loloto ma le pa'ia o le tulafono mamalu a le Atua, o le fa'avae lea o Lona malō i le lagi ma le lalolagi. O le "Malamalama e fa'amalamalamaina ai tagata uma e ō mai i le lalolagi," e fa'asusuluina i itu lilo o le agaga, ma mea lilo uma o le pouliuli ua fa'atinoina mai. O le a lagona le tulaga agasala i le loto ma le mafaufau. O le tagata agasala e iloa le uiga o le amiotonu o le Atua ma o le a lagona le mata'u ona o lona tulaga

agasala ma le lē mamā pe a tū atu i luma o Lē e su'esu'e loto. Na te va'aia le alofa o le Atua, le matagofie o le mamalu, le fiafia o le ato'atoa; e naunau o ia ia fa'amamāina ma ia toe fa'afo'i i le so'otaga ma le lagi.

(3) E FA'APEI O TAVITA, MATA O LE Ā SA TATOU TATALO PE AFAI UA TATOU SALAMŌ MONI ONA O A TATOU AGASALA?

*Le Atua e, ia e alofa mai iā te a'u e tusa ma Lou lava alofa; e tusa ma le tele o Lou alofa mutimutivale, ia e solo'i'esea o'u solitulafono. Ia e matuā fufulu mai iā te a'u i la'u amioleaga, ma ia e fa'amamā mai iā te a'u i la'u agasala. Auā ua ou iloa e a'u lo'u solitulafono; e lē aunoa fo'i ona i ai i o'u luma o la'u agasala. Ua ou agasala atu iā te 'Oe, na o 'Oe lava; ua ou faia fo'i lenei mea leaga i Ōu luma; e tonu ai 'Oe i Lau fetalaiga, e sa'o fo'i 'Oe pe a e fa'amasino. **Salamo 51:1-4***

*Le Atua e, ia e faia se loto mamā mo a'u; ma ia e fa'afouina se loto mau i totonu iā te a'u. **Salamo 51:10***

Mau e Tau i ai: Salamo 32:5; 38:18; Esekielu 36:31; 20:43; I Ioane 1:7 - 9

O le tatalo a Tavita ina ua uma ona pa'ū, o se ata i le uiga moni o le matuā fa'anoanoa ona o le agasala. O lana salamō sa loloto ma e fa'amaoni. E le'i taumafai e fa'aitiitia le leaga o lana agasala; e le'i fa'anaunau e sola'ese mai le tau i sa fa'amalumalu mai, a e sa tu'uloto ma ua fai talosaga. Na iloa e

Tavita le mamafa o lana solitulafono; sa ia va'ai i le fa'aleagaina o lona agaga, ma sa ino'ino ai i lana agasala. E lē na'o le fa'amagaloga na tatalo ai o ia, a e sa ole atu mo le fa'amamāina o le loto. Sa naunau o ia mo le fiafia o le fa'apa'iaina - o le toe fa'afo'i i le ō gatasi ma le feso'ota'iga ma le Atua.

O se salamō fa'apenei e i tua atu o lo tatou lava malosi e mafai ai ona fa'ataunu'u; e na o Keriso e maua mai ai, ona o Ia ua afio a'e i le lagi ma na tu'uina mai meaalofa e tele i le aigā tagata.

(4) O LE Ā LE I'UGA O LE SALAMŌ MONI E FA'AI'U AI I LE TA'UTA'U ATU O AGASALA?

Amuia le tagata ua fa'amagaloina lona solitulafono, ma ua ufitia lana gasala.
Salamo 32:1

Mau e Tau i ai: Isaia 1:18; Salamo 128:1; Teuterenome 5:33; 11:13 - 15; Mataio 5:8; Mika 7:18, 19

(5) O Ā LA'ASAGA MANINO E MUAMUA ONA TA'UTA'U AI LEA O SESĒ?

Ia outou ō mai iā te A'u, outou uma o ē tigāina ma mafatia i 'avega, o A'u fo'i e malolo ai outou. Ia outou amoina La'u amo, ma ia outou fa'aa'oa'o iā te A'u, auā o A'u lē agamalū ma le loto maulalo; ona maua lea e outou o le malologa mo outou agaga. **Mataio 11:28, 29**

Mau e Tau i ai: Isaia 55:1 - 3; 45:22 -

25; Ioane 6:37; Fa'aaliga 22:17

O i'inei le matā'upu atonu o lo'o sesē ai le to'atele, ma o lea ua lē mafai ai ona maua le fesoasoani o lo'o naunau Keriso e tu'uina mai. Ua manatu latou e lē mafai ona ō atu iā Keriso vaganā ua mua'i salamō, ma o le salamō e saunia ai mo le fa'amagaloina o a latou agasala. E moni o le salamō e muamua mai fa'ato'ā fa'amagalo ai agasala; e na o le loto ua fuatiaifo ma ua salamō o le a lagona le mana'omia o se Fa'aola. A e tatau la i le tagata agasala ona fa'atali se'ia salamō ona mafai ai lea le sau iā Iesu? O le a 'avea ea le salamō o se fa'alavelavea i le vā o le tagata agasala ma le Fa'aola?

E lē oa'oa'o mai le Agaga o le Atua e tatau ona mua'i salamō le tagata agasala fa'ato'ā mafai lea ona lagona e ia le vala'au a Keriso, "Ia outou ō mai iā te A'u, o outou uma e tigāina ma mafatia i avega, o A'u fo'i e malōlō ai outou."

(6) E MAI FEA LE POGAI O FA'ANOANOĀGA ONA O AGASALA?

*O le Atua o o tatou tamā ua na toe fa'atū ia Iesu, Lē na fasiotia e outou i lo outou fa'atautau i le la'au. O Ia ua 'aveina a'e e le Atua i Lona 'a'ao taumatau o le Ali'i i le ma le Fa'aola, na te avatua iā Isara'elu le salamō ma le fa'amagaloina o agasala. **Galuega 5:30, 31***

Mau e Tau i ai: Galuega 3:26; 11:18; Ieremia 31:31 - 33; Esekielu 36:25 - 31;

Sakaria 12:10; Roma 11:26, 27; II
Timoteo 2:25, 26

O uiga lelei e mai i a Keriso o le a
ta'ita'iina le tagata i le salamō moni. Sa
fa'amalamalama manino mai e Peteru i
lana 'upu i a Iutaia ina ua fa'apea mai,
"O Ia ua 'aveina a'e e le Atua i Lona
'a'ao taumatau o le Ali'i ma le Fa'aola,
Na te avatua i a Isara'elu le salamō ma
le fa'amagaloina o agasala" (Galuega
5:31). E lē mafai e tatou ona salamō a e
lē i ai le Agaga o Keriso e fafaguina ai
le lotofuatiaifo ma e lē mafai fo'i se
fa'amagaloga a e leai Keriso.

O Keriso o le puna o lagona lelei
uma. E na'o Ia lava e mafai ona tu'u
fa'amaui i o tatou loto se lagona e
'ino'ino tete'e ai i le agasala. O
fa'anaunauga uma mo le 'upu moni ma
le olaga mamā, o lagona uma o lo tatou
lava tulaga agasala, e fa'amaonia mai ai
o lo'o galue Lona Agaga i o tatou loto.

**(7) O AI E FINAGALO LE ALI'I E
FA'ATOSINA MAI IĀ TE IA LAVA
E ALA I LE MEAALOFA O LE
SALAMŌ MA LE FOLAFOLAGA
O LE FA'AOLATAGA?**

*O A'u fo'i, afai e si'itia A'u ai le 'ele'ele,
'Ou te tosina uma mai tagata iā te A'u.*
Ioane 12:32

Mau e Tau i ai: Isaia 49:6; Roma 5:17
- 19; I Timoteo 2:6; Eperu 2:9; I Ioane
2:2; Fa'aaliga 5:9; Luka 15

Ia tataui ona fa'aalia i le tagata
agasala o Keriso na maliliu mo agasala o
le lalolagi; ma a o tatou tepataula'i i le

Mamoe a le Atua i luga o le satauro i Kalevario, o le a amata ona fofolaina i o tatou mafaufau le mea lilo o le fa'aolataga ma o le a ta'ita'i i tatou e salamō ona o le agalelei o le Atua. Ina ua maliu o Ia mo tagata agasala, sa fa'atino mai ai e Keriso se alofa e lē mafa'amatalaina; ma a o va'aia lenei alofa e le tagata agasala, o le a fa'amalūina le loto ma'a'a, e fa'atāuaina i le mafaufau, ma fa'atosina ai le loto ia salamō.

E i ai taimi e ui ina lagona le māsiasi e tagata ona o amioga leaga, ona tu'u'ese lea o nisi uiga leaga a e lē o iloa lelei o lo'o ua fa'atosina i latou i a Keriso. So'o se taimi e taumafai ai mo se suiga ona o le naunau e faia le mea tonu, o le Agaga o le Atua lea o lo'o ta'ita'iina mai i latou. O le Agaga lenei e galue i o latou loto, e fa'ate'ia le loto fuatiaifo, ma suia le olaga. Ma a o tosina mai i latou e Keriso ia tepataula'i i Lona satauro, ia va'ai iā te Ia Lē na tuia ona o a latou agasala, o le a mafaufau loloto i latou i uiga o poloa'iga. O amioga leaga uma o a latou olaga, o agasala lilo ua nofomau i o latou loto, o le a fa'aalia iā i latou. Ua amata nei ona tau malamalama i latou i le amiotonu o Keriso, ma fa'apea a'e, "O le ā le agasala, ua tatau ai ona mana'omia lenei taulaga mo le togiolaina o tagata ua afāina ai? E mana'omia uma lenei alofa, mafatiāga uma, fa'apea ma le fa'alumaina, atonu o le a lē fano ai se tasi o i tatou, a e maua le ola e fa'avavau?"

Atonu o le a tete'e mai le tagata agasala i lenei alofa, atonu e musu ne'i fa'atosina atu iā Keriso; peita'i, afai e lē

tete'e mai o le a tosina atu loa iā Keriso;
o le a malamalama i le fuafulāga o le
fa'aolataga ma o le a ta'ita'iina o ia i lalo
o le satauro e i'u ai i le salamō ona o ana
agasala, na mafua ai le
fa'apuapuagātiaina o le Alo pele o le
Atua.

**(8) O LE Ā LE VALA'AU
OFOOFOGIA UA OFOINA MAI E
LE ALI'I MO I LATOU UMA O
LO'O MATELĀINA MO MEA E
SILI ATU I LO O MEA UA
TU'UINA MAI E LE LALOLAGI?**

*Ua fetalai mai le Agaga ma le
fa'ato'anofotane, Inā sau ia; inā fai atu
fo'i ia o lē fa'alogu, Inā sau ia; o lē fia
inu, inā sau ia, atoa ma lē mana'i i ai,
inā 'ave fua ia le vai o le ola. **Fa'aaliga
22:17***

Mau e Tau i ai: Ioane 7:37, 38; 4:10;
Isaia 55:1-3; 12:3

O le finagalo pa'ia lea o lo'o galue
i mea uma na foafoaina o lo'o
musumusu pea fo'i i loto o tagata ma e
mafua ai se fa'anaunauga e lē
mafa'amatalaina, mo mea latou te lē o
maua. E lē mafai ona fa'amalieina o
latou mana'oga e mea o le lalolagi. O
lo'o ōle mai pea le Agaga o le Atua mo i
latou ia sa'ili na'o mea e maua ai le
filemū moni ma le malōlōga - o le alofa
tunoa o Keriso, ma le fiafia o le
fa'apa'iaina. E ala i le pule o mea e
va'aia ma mea e lē o va'aia, o lo'o galue
pea le Fa'aola ia fa'atosina mafaufau o
tagata mai fa'afīaīāga o le agasala e lē
mafai ona fa'amalieina ai i latou, a e ia

maua fa'amanuiāga i a te Ia e lē mafa'agataina. Mo nei agaga uma, ē o lo'o sa'ili e feinu mai fagu malepelepe o lenei lalolagi, na tu'u mai i ai le fe'au fa'alelagi, "O lē ua fia inu inā sau ia. Ma o i latou uma e ō mai, ia 'ave i ai le vai o le ola e maua fua."

O 'oe o lo'o naunau i se mea e sili atu i lo o lea e ofo mai e le lalolagi, ia e iloa o lenei fa'anaunauga o le si'ufofoga o le Atua i lou loto. Ia e talosaga atu iā te Ia, ia tu'uina mai le salamō moni ina ia fa'aalia mai Keriso iā te 'oe i Lona alofa e lē mafa'agataina ma Lona tulaga mamā ato'atoa.

(9) PE A TATOU VA'AIA LE UIGA O KERISO, O LE Ā LE MEA O LE A ILOA E TATOU TAGATA AGASALA?

*O i matou nei e tusa ma le mea leaga i matou uma; o a matou amiotonu uma e tusa ia me le 'ie o le ma'i; ua mamae i matou uma e pei o le lau la'au, o a matou amiolētonu e pei o se matagi ua lelea ai i matou. **Isaia 64:6***

Mau e Tau i ai: Isaia 53:6; Iopu 14:4; 15:14-16; 25:4; Salamo 51:5; Roma 7:18, 24; Efeso 2:1, 2; Esekielu 36:31

I le soifuāga o le Fa'aola sa fa'atinoina e fai ma fa'aa'oa'o o fa'avae o le tulafono a le Atua - le alofa i le Atua ma le tagata. O le agalelei, alofa e lē fa'apito, o le uiga lea o Lona soifuāga. E fa'apea ona tatou iloa ai o Ia, pe a susulu le malamalama mai lo tatou Fa'aola ma ua tatou va'aia ai le tulaga agasala o tatou lava loto.

Atonu ua tatou fa'avi'ia i tatou lava ia, e fa'apei o Nikotemo, ua manatu o tatou olaga ua ta'u amiotonuina, o tatou uiga e sa'o ma tonu, ma tatou te lē o mana'omia le loto ia fa'amaulaloina i luma o le Atua, e fa'apei o le tagata agasala; a e peita'i, pe a fa'asusulu mai le malamalama o Keriso i totonu o tatou agaga, o le a tatou va'aia ai lo tatou tulaga lē mamā; o le a tatou iloa le fa'apito o tatou fuafuāga, o le ita i le Atua, ma fa'aleagaina ai gaoioiga uma o le olaga. Ona tatou iloa lea e moni, o la tatou amiotonu ua pei o 'ie'ie 'ele'elea, ma e na'o le toto o Keriso o le a mafai ona fa'amamāina i tatou mai le fa'aleaga a le agasala, ma fa'afouina o tatou loto i Lona lava fa'atusa.

O se 'ave e tasi mai le mamalu o le Atua, o se susulu mai e tasi o le pa'epa'e mamā o Keriso, pe a fa'aulu i totonu o le agaga, o le a iloa manino ai mea uma ua fa'aleagaina ma fa'aali ai le lē atoa o uiga fa'aletagata. E fa'ailoa manino ai tu'inanau lē pa'ia, o le loto e lē fa'atuatuaina, o laugutu e lē mamā. O galuega lē fa'amaoni a le tagata agasala e tau fa'alēaogāina le tulafono a le Atua, ua aumaia i luma e va'aia ai, ma o lona loto o le a taia ma afāina i le ta'ita'iga a le Agaga o le Atua. A o ia manatunatu i le uiga e mamā ma lē ponā o Keriso, o le a 'ino'ino i lona lava tulaga.

(10) SA FA'APEFEA LE AFĀINA O TANIELU INA UA IA ILOA VAIVAIGA I ŌNA UIGA?

Ua tu'ua to'atasi lava na o a'u, ona o'u iloa lea o lenā mea tele na fa'aalia mai, ona leai lea o se toe malosi iā te a'u; ua

*mavae lo'u matagofie, ua ou pulavale,
ua leai lava se malosi ua toe iā te a'u.*

Tanielu 10:8

Mau e Tau i ai: Tanielu 8:17, 18;
Fa'aaliga 1:17; Mareko 9:6; Luka 1:12

Ina ua va'aia e le perofeta o
Tanielu le mamalu ua si'omia ai le
'avefea'u mai le lagi na 'auina mai iā te
ia, sa lagona e ia le vaivai ma iloa lona
tulaga lē ato'atoa. Sa pā'ia le loto
fa'apito ma le fa'ailoga tagata, ma sa
'ino'ino i ai; ona sa'ili lea, e ala i le
amiotonu o Keriso, le loto mamā e
talafeagai ma le tulafono a le Atua ma
le uiga o Keriso.

**(11) E PEI O PAULO, O LE Ā LE
MEA O LE A TUPU IĀ I TATOU
PE A TATOU VA'AIA LE
ATO'ATO A O KERISO MA ILOA
LE UIGA MONI O FA'AVAE PA'IA
O TULAFONO A LE ATUA?**

*Sa ou ola fo'i anamua, ina ua lē mai le
tulafono; a ua o'o mai le poloa'iga, ona
toe ola mai ai lea o le agasala, ona ou
oti ai lea. **Roma 7:9***

Mau e Tau i ai: Roma 7:7; 3:20; 8:3-7;
I Ioane 3:4; Luka 10:25 - 28; Kalatia
3:10; 2:19-21

Sa fa'aapea mai Paulo, e pei "O la
le amiotonu fo'i i le tulafono" - e
fa'atatau i gaoioiga e va'aia mai fafo - o
ia "e le'i mata'u le agasala ai" (Filipi 3:6);
a e peita'i ina ua malamalama i le uiga
fa'aleagaga o le tulafono, na iloa ai o ia
o le tagata agasala. A fa'amasinoina e

ala i le tusi o le tulafono fa'apei ona
fa'aaogāina e tagata mo le va'aiga mai
fafo o le olaga, e le'i faia e ia se agasala;
a e ina ua su'esu'e ia i le loloto o ona
matā'upu, ma va'ai ifo iā te ia lava
fa'apei ona silasila le Atua i a te ia, sa
punoa ifo i le lagona o le fa'alumaina
ma ta'uta'u atu lana agasala. Ina ua ia
iloa le uiga moni fa'aleagaga o le
tulafono, ua fa'asino mai loa le mata'utia
o le agasala ma ua mavae 'ese atu le
manatu i lona ia lava lelei.

*Ou te fa'afetai ona ua ou talia le
vala'au a Iesu ia sau ma ia a'oa'o e uiga
iā te Ia ina ia maua le filemū e lo'u
agaga.*

Li'o le tali: Ioe Lē mautonu

*Fa'apei ona Ia tosina atu a'u ma ua
fa'aopoopo le taimi e fa'aaogā mo Ia i
le su'esu'eina o Lana Afioga, ua ou
va'aia Lona amiotonu ma iloa o lo'u
olaga ma la'u amio e 'ele'elea ma e lē
pa'ia.*

Li'o le tali: Ioe Lē mautonu

*O le taimi nei ua Ia tu'u i lo'u loto le
fa'anaunau ia fa'apei o Ia, a e ua ou
iloa e leai so'u malosī ou te suia ai a'u
lava ia.*

Li'o le tali: Ioe Lē mautonu

*Ou te fa'afetai ona e mafai ona ou sau
fa'apenei iā te Ia - e agasala, e*

*mana'omia le fesoasoani, ma e
taufa'alagolago - ma ou te talia Lana
folafolaga Na te faia se suiga i lo'u
olaga e fa'amamaluina ai o Ia.*

Li'o le tali:

Io

Lē mautonu



Lesona 4

O Le Salamō

**(1) O LE Ā LE AGASALA O LO'O
TA'U MUAMUA MAI I LENEI
FUAI'UPU E MATUĀ FA'ATIGĀ I
LE ATUA?**

*O le mata'u i le Ali'i, o le 'ino'ino lea i
le leaga; o le fa'amaualuga ma le loto
fefete, ma le amio leaga, ma le gutu
fa'api'opi'o, 'Ou te ino'ino i ai.*

Fa'ata'oto 8:13

Mau e Tau i ai: Fa'ata'oto 16:5, 18, 19;
6:16 - 17; 21:4; 25:27; 29:23; 11:2;
Salamo 101:5; I Samuelu 2:3; Ieremia
9:23, 24; Opetaiā 1:4; Mataio 23:12;
Mareko 9:25

E lē tutusa agasala uma i le
fa'atatau a le Atua; e 'ese'ese le mamafa

o agasala i Lana fuafuāga, fa'apea fo'i i le fa'atatau a le tagata; a e peita'i po o le ā e fa'atauva'a o le sesē i le va'aiga a le tagata, e lē fa'aitiitia se agasala i le silafaga a le Atua. E lē atoa ma lē sa'o le fa'amasinoina o mea e le tagata; a e o le Atua e tonu Lana fa'atatauga o mea uma. o lē inu 'ava malosi e 'inosia ma ua fa'ailoa i ai o lana agasala o le a tuli'ese ai ia mai le lagi; a e o le mimitavale, manatu fa'apito, ma le mana'ovale ua lē amana'ia i le tele o taimi i lalo o le tulafono. Peita'i o agasala nei e sili ona 'inosia e le Atua; o agasala ia e lē talafeagai ma Lona uiga e agalelei, o le alofa e lē fa'apito o lo'o si'omiaina lalolagi e lē o pa'ū'ū. O lē e pa'ū i se agasala e sili atu ona leaga o le a lagona lona masiasi ma le tulaga mativa ma e matuā mana'omia le alofa tunoa o Keriso; peita'i ona o le mitamita vale o le a lē lagona e mana'omia se mea, a e na'o le tapunia o le loto ina ua te'ena Keriso ma fa'amanuiāga e lē gata na afio mai Ia e tu'u mai.

(2) E FA'APEI O LE TELONA NA SALAMŌ INA UA TA'USALAINA O IA, O LE Ā LE TATALO E TATAU ONA TATOU SI'I A'E MA LE FA'AMAONI?

*O le telona fo'i, ua tū mamao atu, e lē mafai ona tepa a'e ona mata ile lagi, a ua pōpō lona fatafata, ua fa'apea atu, Le Atua e, ia e alofa mai iā te a'u le tagata agasala. **Luka 18:13***

Mau e Tau i ai: Luka 5:8; 15:18 - 21; Salamo 51:1 - 12; 40:12, 13; I Ioane 1:8 - 10; 2:1, 2

Sa fa'apea ifo le telona o ia o se tagata e matuā leaga lava, ma o isi sa va'ai ifo fo'i iā te ia i lea malamalamaga; a e peita'i sa ia lagona mea na te mana'omia, ma ua alu atu ma lana 'avega ua ta'usalaina ma le mā i luma o le Atua, ua ōle atu mo Lona alofa tunoa. Sa tatala atu lona loto i le Agaga o le Atua ina ia faia Lana galuega alofa ma fa'asa'olotoina ia mai le malosi o le agasala. O le tatalo mitamitavale ma le fa'afiaamiotonu a le Faresaio na fa'ailoa atu ai lona loto ua tapunia ma tete'e atu i le galuega a le Agaga Pa'ia. Ona o le mamao o lona vā ma le Atua, sa ia lē lagona lona ia lava leaga, pe a fa'atatau atu i le ato'atoa o le pa'ia fa'ale-Atua. Sa na le'i lagona e mana'omia se mea, ma na te le'i maua se mea.

(3) INA UA UMA ONA TA'USALAINA I TATOU, AISEĀ E LĒ MAFAI AI ONA TATOU TAU'AVE LE FUA O LE TULAGA PA'IA I O TATOU OLAGA E ALA I A TATOU LAVA TAUMAFaIGA?

O A'u nei o le vine, o lā outou. O lē tumau iā te A'u, ma A'u iā te ia, o ia lava e fua tele mai; auā e lē mafai e outou ona fai o se mea e tasi pe a A'u lē i ai. Ioane 15:5

Mau e Tau i ai: Ioane 15:1 - 8; II Peteru 1:2 - 4; Roma 6:22; Iakopo 1:17; Filipi 1:11; 1:6; 2:13

Pe a e iloa lou tulaga agasala, ia 'aua ne'i fa'atali e faia se mea e fa'alelei ai 'oe. E to'atele ua manatu e lē lava so latou lelei ia ō mai ai iā Keriso. E te

manatu ea e mafai ona fa'aleleia 'oe mai āu lava taumafaiga? "E mafai ea ona liua e le Aitiope o lona pa'u, pe liua e le nameri ona ila? A mafai lea, ona mafai fo'i lea ona amio lelei outou ua masani e amio leaga" (Jeremia 13:23). E na o le Atua e maua ai la tatou fesoasoani. E lē tatau ona tatou fa'atali mo se fa'atauana malosi, ni avanoa e sili atu le lelei, po o le lotoitagofie, auā e lē mafai ona tatou faia lava e tatou ia se mea. E tatau ona tatou ō iā Keriso mai le tulaga o lo'o tatou i ai.

(4) O LE Ā LE AFĀINA O LE AGASALA I LE TAGATA AGATONU NA SALAMŌ MA NA IA MAUA AI LE AMIOTONU, A E MULIMULI ANE UA TOE LILIU 'ESE MA LE ATUA?

A e afai e liliu 'ese lē ua amiotonu i lana amiotonu, ma ua fai amio leaga, ma ua fai e tusa ma mea uma e 'inosia e faia e lē ua amio leaga, e ola ea ia? O lana amiotonu uma na ia faia, e lē manatua; o lana agasala ua ia agasala ai, ma ona sesē ua ia sesē ai, ona o ia mea e oti ai o ia. Esekielu 18:24

Mau e Tau i ai: Esekielu 3:20; 33:12, 13, 18; Eperu 10:38, 39; II Peteru 2:18 – 22

Ia 'aia ne'i fa'asesēina se tasi o i tatou i le manatu o le Atua o le a fa'asaoia lava ē ua matuā te'ena Lona alofa tunoa, ona o Lona alofa ofoofogia ma le alofa mutimutivale. E na'o na mafai ona fa'atatauina le leaga o le agasala i le malamalama o le satauro. Pe a manatu tagata e lē tō'esea le tagata

agasala ona o le Atua e matuā lelei lava, ia tau ina tepa le va'ai i Kalevario. Ona e le'i i ai se isi lava ala e mafai ona fa'asaoina ai le tagata, auā ana leai lenei taulaga semanū e lē mafai e le aigā tagata ona sola'ese mai le mana fa'aleaga o le agasala, ma toe fa'afo'i ai i le so'otaga ma agaga pa'ia o le lagi, - e lē toe mafai fo'i e latou ona tofusia i le ola fa'aleagaga, - o lenei le pogai na fa'ae'e ai e Keriso i Ōna luga le fa'asalaga o le lē usiusita'i ma sa mafatia ai ina ua 'avea ma sui o le tagata agasala. O le alofa ma le mafatiāga ma le maliu o le Ālo o le Atua ua molimau i le mata'utia o le agasala ma fa'aailoa mai ai e leai se mafai ona sola'ese mai lona malosi, e leai se fa'amoemoe i le olaga maoa'e, vaganā pe a ua tu'u atu le loto iā Keriso.

(5) O AI LE FA'AA'OA'O NA FA'ATONU MAI TATOU TE MULIMULI I AI?

*Auā na vala'auina outou ona o lea lava mea; auā na tigāina Keriso lava o le sui o outou, ua tu'uina mai ai e Ia le fa'aa'oa'o mo outou, ina ia outou mulimuli atu i Ōna tulaga'a'ao. **I Peteru 2:21***

Mau e Tau i ai: Salamo 85:13; Ioane 13:15; I Korinito 11:1; Efeso 5:2; Filipi 2:5; I Ioane 2:6; Luka 9:23

E fai fa'amatalaga 'alo a le tagata lē salamō e fa'atatau i lē ua ta'ua o le Kerisiano, e fa'apea, "Ou te lelei fo'i a'u e pei o ia. E lē tele atu lo latou fa'autauta, e fa'afitia o latou lava tu'inanau, ma e lē tagolima i le 'ava

malosi. E naunau latou i mea fa'afiafia ma e fiafia e fa'amalieina i latou lava fa'apei ona ou faia mo a'u ia." Latou te fa'aui le sesē o isi e fai ma faitiōga mo lo latou lē amana'ia o galuega. A e o agasala ma mea e lē sa'osa'o a isi o le a lē 'avea ma faitiōga mo se tasi, ona e le'i tu'umaia e le Ali'i iā i tatou se fua fa'aletagata e sesē. Na tu'uina mai le Ālo o le Atua e leai se pona ia faia ma tatou fa'aa'oa'o, o latou e fa'atu'i'ese ona o le ala sesē ua uia a ē ua ta'ua o Kerisiano, o i latou ia e tatau ona fa'aali olaga e lelei ma fa'aa'oa'oga fa'atamali'i. Pe afai e manatu latou e tatau ona maua le tapula'a o le Kerisiano, o le a tatau fo'i la ona sili atu le maoa'e o la latou agasala? Latou te iloa le mea sa'o, a e ua latou lē faia lea mea.

**(6) O LE Ā LE I'UGA
MATA'UTIA MAI LE LĒ
AMANA'IA O LE SI'UFOFOGA
'AI'OI O LE AGAGA PA'IA MA LE
FA'ATUAI O LE TU'U'ESEINA O
LE OLAGA AGASALA?**

*O le amio sa'o a ē ua amiotonu e ta'ita'iina ai i latou; a o le fa'api'opi'o o ē amiolētonu e fano ai i latou....O le amiotonu a lē ua sa'o e fa'alauleleia ai lona ala; a o lana amio leaga, e pa'ū ai lē ua amio leaga. **Fa'ata'oto 11:3, 5***

Mau e Tau i ai: Fa'ata'oto 6:27, 28; 16:25; 1:18; Kalatia 6:7, 8

Ia fa'aeteete i le tolopō. Ia 'aia ne'i fa'atuai le tu'u 'esea o āu agasala ma sa'ili le loto mamā e ala iā Iesu. E afe ma afe ua sesē ai i lenei itū ma i'u ai i le

lē fa'asaoina. O lo'o i ai se faigatā e mata'utia - se faigatā e lē o malamalama lelei i ai - i le fa'atuai ona gaua'i atu i le ōle mai a le Agaga Pa'ia o le Atua, a e filifili e faia pea le agasala; o lea le fa'atuai ua faigatā, ona o le olaga e pu'upu'u ma o le taimi e lē se mea mautinoa. O le agasala, atonu e tauleleia ona e ititi, a e mafai ona faia ma le lē manatu ia pulea, e i'u ai i le fa'afanoga e fa'avavau. O mea e tatou te to'ilalo ai, o le a manumalō iā i tatou ma galue ai mo lo tatou fa'aumatiāga.

Sa talitonu lava Atamu ma Eva o se tama'i sesē na la faia e pei o le 'aia o le fua o le la'au na fa'asāina, o le a lē mafai ona i'u i se fa'ai'uga mata'utia fa'apei ona fetalai ai le Atua. A e peita'i o lenei mea itiiti o le soliga o le tulafono e tumau ma e pa'ia a le Atua, na tu'u 'ese'ese ai le tagata mai le Atua ma na tatala ai faitoto'a o le oti ma le malaia e lē mafa'amatalaina i luga o lo tatou lalolagi. O lea tupulaga mai lea tupulaga, ua alu a'e pea mai lo tatou lalolagi se tagi fa'anoanoa, o mea uma na foafoaina o lo'o ōi ma fa'atigā fa'atasi ona o le i'uga o le lē usiusita'i o le tagata. Sa lagona i le lagi le i'uga o lana fouvalega tete'e i le Atua, ma o Kalevario o lo'o tū mai ai se fa'amanatuga i le taulaga ofoofogia na mana'omia e fai ma togiola mo le soliina o le tulafono fa'ale Atua. Ia 'aue ne'i tatou fa'atatauina le agasala o se mea fa'atauva'a.

(7) O LE Ā LE FA'AI'UGA PE A FILIFILI E TU'ULOTO I O TATOU OLAGA AGASALA O LO'O ILOA?

O ana amio leaga e maua ai lava lē ua agasala; o maea o ana agasala e taofia ai o ia. Fa'ata'oto 5:22

Mau e Tau i ai: Salamo 7:15, 16; 9:15; Ieremia 2:19; Failauga 10:8; Fa'ata'oto 1:31

O solitulafono uma, fa'atamala uma, po'o le te'ena o le alofa tunoa o Keriso, o le tautete'e lea o 'oe iā te 'oe lava ia; o le fa'ama'a'aina o le loto, fa'avaivaiina o le mafaufau, lē lava le malamalama, ma lē mafai ai ona gaua'i atu i le ōlega alofa a le Agaga Pa'ia.

E to'atele o lo'o tau fa'atauva'aina vala'au o le alofa tunoa, a e o lo'o sau pea lava pea lea vala'au; latou te tau fa'afilemū le loto fuatiaifo ua āfaina i le manatu e latou te mafai ona suia le gasologa o le leaga pe a latou filifili i ai. Ua latou manatu o se taimi ua aupito sili ona mata'utia o le a mafai ona latou suia lo latou ala, e ui ina latou fa'au'ese le Agaga o le alofa tunoa ma ua tu'u lo latou fa'aaloaloga i le itū a Satani. A e peita'i e lē faigofie ona faia lenei mea. O le a'oa'oga, o mea na faia ua masani ai o le olaga atoa, ua matuā fafauina le amio e na'o le to'aitiiti o le a naunau ia maua le fa'atusa o Iesu.

O so'o se agasala e faifaipea o le a fa'amalosia ai le liliu'ese o le agaga mai le Atua. O le tasi o se fa'auisesē o le amio, po o se fa'anaunauga agasala e tasi, pe a teu pea i le loto, o le a fa'aleaogāina le mana o le tala lelei. O le tagata e fa'atinoina le ma'a'a o le lē talitonu, po ua malosi le fa'atauva'aina o le 'upu moni fa'aleagaga, o le a selesese mai fatu sa totōina e ia lava. I le atoa o

le Tusi Pa'ia e leai se lapata'iga e sili atu le mata'utia e fa'atatau i le fa'amaumau o le olaga i mea leaga, i lo o 'upu a le tagata poto ua fa'aapea mai e uiga i le tagata agasala, "O maea o āna agasala e taofia ai o ia" (Fa'ata'oto 5:22).

(8) O ĀFEA E TATAU AI ONA TATOU TALI I LE VALA'AU O LE FA'AOLATAGA A KERISO?

Auā ua fa'aapea mai o Ia, O le tausaga e talia ai na 'ou fa'alogoa ai iā te 'oe, o le aso fo'i e fa'aolaina ai ai na 'ou fesoasoani ai iā te 'oe. II Korinito 6:2

Mau e Tau i ai: Eperu 3:7-15; 4:7; Isaia 55:6; 48:9; Kenese 6:3

Ua sauni Keriso e fa'asa'oloto i tatou mai agasala, a e peita'i, Na te lē tau fa'amalosia se loto o se tasi; pe afai o le a fai pea le solitulafono ona o le loto ua mana'o pea i le leaga, ma ua lē naunau ia sa'oloto, pe afai o le a tatou lē talia Lona alofa tunoa, o le ā se isi mea o le a mafai ona Ia faia? Ua tatou fa'aumatia i tatou lava ia i le te'ena pea o Lona alofa. "O le aso nei afai tou te fa'alogoa ai i Lo'u si'ufofoga, 'aia tou te fa'ama'a'a i o outou loto" (Eperu 3:7, 8).

(9) E NA'O LE Ā LE TATALO E LELEI MO LE FA'ASA'OLOTOGA MAI UNA'IGA, FA'AMOEMOEGA, MA TU'UTU'UGA O SE LOTO TAUF'AASESĒ?

Le Atua e, ia e su'esu'e mai iā te a'u, ma ia e silafia lo'u loto; tofotofo mai ia iā te a'u, ma ia e silafia o'u manatunatu;

ma ia e silafia po o iā te a'u se ala e tigā ai; ma e ta'ita'iina mai a'u i le ala o le fa'avavau. Salamo 139:23, 24

Mau e Tau i ai: Salamo 51:10; 26:2; Teuterenome 8:2; Iopu 31:6; Fa'ata'oto 17:3; Sakaria 13:9; I Peteru 1:7

"E va'ai le tagata i le tino, a e va'ai le Ali'i i le loto" (I Samuelu 16:7) - le loto o le tagata ma ōna lagona o le fiafia ma le fa'anoanoa e fete'ena'i; le loto e femēmēa'i solo ma e lē mautū, o le nofoāga o mea e lē mamā ma le fa'a'ole'ole. E Na te silafia fuafuāga uma, o mafaufauga ma fa'amoemoe. Ia e alu iā te Ia ma lou agaga i le tulaga lava o i ai oe. Ia fa'apei o le faipese, tu'u atoa lou loto iā te Ia e silafia mea uma, ma tagi atu, "Le Atua e, ia e su'esu'e mai iā te a'u, ma ia e silafia lo'u loto; tofotofo mai iā te a'u, ma ia e silafia o'u manatunatu; ma ia e silafia po o iā te a'u se ala e tigā ai; ma e ta'ita'iina mai a'u i ala o le fa'avavau" (Salamo 139:23, 24).

E to'atele ua talia se tapua'iga e fai fa'aleatamai, o se itū'aiga e fa'ailoa mai se uiga fa'aatua, a e o le loto e le'i fa'amamāina. Ia e tatalo fa'apea, "Ia e faia se loto mamā mo a'u; ina ia e fa'afouina se loto mau i totonu iā te a'u" (Salamo 51:10). Ia galue ma le fa'amaoni mo lou agaga; ia sogasogā ma le lotonaunau mo le ola e fa'avavau o lo'o i ou luma. O le matā'upu lenei e fa'amautū i le vā o le Atua ma lou lava agaga, mo le fa'avavau. O le fa'aumatiāga o 'oe pe a na'o le fa'amoemoe e mātea, a e leai se isi lava mea.

**(10) O Ā MANUIA FA'APITOA E
LIMA E MAUA E ALA I LE
SU'ESU'E O LE AFIOGA A LE
ATUA MA LE AGAGA TATALO
ONA TA'ITA'IINA AI LEA O
TATOU IA SALAMŌ?**

*Talu fo'i ina o e tama itiiti ua e iloa
Tusi Pa'ia, e mafaia ona fa'apoto ai iā
te 'oe e i'u ai i le ola i le fa'atuatua ua iā
Keriso Iesu. O Tusi Pa'ia uma lava e
mai le Agaga o le Atua ia, e aogā fo'i e
a'oa'o ai e a'oa'i ai, e fa'atonu ai, e
fa'apoto ai i le amiotonu, ina ia ato'atoa
ona lelei ai o le tagata o le Atua, ia
saunia lava ia i galuega lelei uma lava.
II Timoteo 3:15-17*

Mau e Tau i ai: Ioane 17:17; Salamo
119:9, 24, 41, 105, 130, 160, 165; Roma
15:4; I Korinito 10:11; Fa'ata'oto 4:20-
22

Ia su'esu'e le Afioga a le Atua ma
le agaga tatalo. o lenei afioga e tu'u mai
ai i ou luma fa'avae tetele o le mamalu, i
le tulafono a le Atua ma le soifuāga o
Keriso, pe ana leai, "e lē mafai ona va'ai
se tagata i le Ali'i." O le a iloa lelei ai le
agasala; e fa'aali manino ai le ala o le
fa'aolataga. Ia e usita'i i ai fa'apei o le
si'ufofoga o le Atua o lo'o fetalai i lou
loto.

**(11) O LE Ā LE MEA O LO'O
FAIA E LE ATUA MO I TATOU E
ALA IĀ KERISO MAI LE
MEAALOFa O LE SALAMŌ?**

*O lenei, sa iā Keriso le Atua, ua
fa'aleleia e Ia le lalolagi iā te Ia, ua lē
ta'ua a latou agasala iā te i latou; ua Ia*

tu'uina mai fo'i iā te i matou le 'upu o le leleiga. II Korinito 5:19

Mau e Tau i ai: Ioane 17:23; I Timoteo 3:16; Roma 5:10, 11; 3:24-26; I Ioane 2:1, 2; 4:10; Isaia 43:25; Salamo 103:10-12; Efeso 2:14-16

Ina ua e iloa le mata'utia o le agasala, ina ua e va'ai ifo iā te 'oe lava, 'aia e te fa'avaivai ai. Sa afio mai Keriso e fa'asao le tagata agasala. E lē o tatou ua fa'aleleia le Atua ma tatou, a e peita'i - o se alofa ofoofogia! - o le Atua, e ala iā Keriso, Na te "fa'aleleia le lalolagi iā te Ia lava." O lo'o Ia fa'atosina loto o Lana fanau fai mea sesē e ala i Lona alofa mutimutivale. E leai se mātua fa'alelallolagi e mafai le onosa'i ona o sesē ma fa'aletonu a lana fanau, e fa'apei o le Atua ma i latou o lo'o Ia sa'ili e fa'asao. E leai se tasi e mafai se ōlega e sili le agamalū mo le tagata solitulafono; e leai se laugutu fa'aletagata na tu'u atu se vala'au e sili le alofa mo le tagata maumausolo i lo o Ia. O Āna folafolaga uma, o Āna lapata'iga e na'o mānavāga ona o le alofa e lē mafa'aleoina.

(12) O AI NA AFIO MAI IESU E FA'ASAO?

O le 'upu moni lenei, e tataua lava ona matuā talia, na malii mai Keriso i le lalolagi, na te fa'aolaina o ē agasala; ua sili musa a'u nei iā i latou. I Timoteo 1:15

Mau e Tau i ai: Roma 5:8-11; Mataio 9:13; 18:11; Luka 19:10; I Ioane 3:5;

Pe a sau Satani ma ta'u mai o 'oe o se tagata agasala tele, ia e tepa a'e i lou Fa'aola ma ta'u atu Ōna uiga lelei. O le fesoasoani e maua i lou va'ai i Lona malamalama. Fa'ailoa atu au agasala, a e ta'u i le fili o "Iesu Keriso na afio mai i le lalolagi e fa'asao tagata agasala" ma e fa'apea le mafai ona fa'aolaina o 'oe e ala i Lona alofa e lē mafa'atusaina.

(13) O AI LE TAGATA O LE A AUPITO SILI ONA ALOFA I LE ALI'I?

Ua tali mai Simona, ua fa'apea mai, Ai lava o lea na fa'amagaloina atu ana mea e tele. Ua fetalai atu Ia iā te ia, Ua tonu lau taofi....O lea fo'i 'Ou te fai atu ai iā te oe, Ua fa'amagaloina ana agasala e tele, auā ua alofa tele mai o ia; a o lē ua fa'amagaloina i ai se mea itiiti, ua itiiti fo'i lona alofa.

Luka 7:43, 47

Mau e Tau i ai: Roma 5:20; Ioane 21:15-17; I Ioane 3:18; Isaia 55:7; Mataio 18:33; 10:8; Fa'ata'oto 10:12

Sa fesili Iesu iā Simona e fa'atatau i tagata e to'alua sa aitalafu. O le tasi sa la'ititi le aitalafu i lona ali'i, a e o le isi o se aitalafu e telē; peita'i na ia fa'amagalo i la'ua uma, ma ua fesili Keriso iā Simona po o ai o i la'ua o le a sili atu le alofa i lona ali'i. Sa tali Simona, "O lea na ia fa'amagaloina atu ana mea e tele." O tatou uma o tagata e matuā agasala, a e na maliu Keriso ina ia mafai ona fa'amagaloina ai i tatou uma. Ua lava le

lelei o Lana taulaga e tu'u atu i luma o
le Tamā o le sui mo i tatou. O i latou na
Ia fa'amagalo le tele o le a sili atu le
alofa iā te Ia, ma o le a tutū latalata i
Lona nofoāli'i e vivi'i iā te Ia mo Lona
alofa ua matuā tele ma Lana taulaga e lē
fa'atuā'oia. Se'ilogā ua tatou
malamalama ato'atoa i le alofa o le Atua
ona tatou iloa lea le mata'utia o le leaga
o le agasala. Pe a tatou va'aia le umi o le
filifili na Ia tu'utu'u ifo mo i tatou, pe a
tatou malamalama i le fa'avavau o le
taulaga na faia e Keriso, o le sui mo i
tatou, ona maua lea o le salamō ma le
alofa i le loto.

*A o ou fa'alatalata atili atu pea i lo'u
Fa'aola, ua ou va'aia Lona amiotonu.
Ua ou iloa o lo'u olaga ma amioga e lē
mamā ma lē pa'ia. O la'u fa'anaunau
moni ia ou fa'apei o Ia.*

Li'o le tali: Ioe Lē mautonu

*Ua ou malamalama o le salamō o le
loto fa'anoanoa moni lea ona o agasala
a e lē na o le fefe ona o le fa'asalaga e
maua mai lea tulaga.*

Li'o le tali: Ioe Lē mautonu

*Ou te fa'afetai iā Iesu mo le meaalofo o
le salamō ua Ia tu'u i totonu o lo'u loto,
ma ua ou faia ai le filifiliga e galue ai
loa mo lea taunu'uga.*

Li'o le tali: Ioe Lē mautonu



Lesona 5

O Le Ta'utinoga

(1) O Ā TULAGA MO TATOU TAGATA AGASALA O LE A MAUA AI LE ALOFA TUNOA?

*O lē ua ufiufi lona solitulafono, e lē
manuia o ia; a o lē ua fa'aali ma
lafoa'iina, e alofagia o ia. Fa'ata'oto*
28:13

Mau e Tau i ai: II Nofoa'iga Tupu
7:14; Luka 15:18-24; Ieremia 3:12, 13

O tulaga e tu'uina mai ai le alofa
tunoa o le Atua e faigofie, ma tonu, ma
lelei. E lē finagalo le Ali'i e mana'omia
e tatou te faia se mea e fa'anoanoa ai ina
ia mafai ona maua le fa'amagaloina o
agasala. E lē mana'omia ia tatou

faimalaga mamao pe faia ni fa'asalaga e mafatia ai, ina ia ta'uleleia ai tatou i le Atua pe togiolaina ai a tatou agasala; a e peita'i o lē e ta'uta'u ma lafoa'i ana agasala o le a maua le alofa tunoa.

(2) O AI E TATAU ONA TATOU FA'AILOA I AI O TATOU SESĒ?

Ia fefa'aalia'i a outou agasala, ma tatalo le tasi mo le tasi, ina ia fa'amaloloina outou. Ua aogā tele le tatalo fa'atauānau a le tagata amiotonu.
Iakopo 5:16

Mau e Tau i ai: Salamo 38:18; 41:4; Mataio 5:24; Fa'ata'oto 28:13; I Ioane 1:8-10; Roma 10:10; Iakopo 4:10

Ua fai mai le aposetolo, "Ia fefa'aalia'i a outou sesē ma tatalo lē tasi mo lē tasi, ina ia fa'amalōlōina outou" (Iakopo5:16). Ia ta'u au agasala i le Atua auā e na'o Ia e mafai ona fa'amagaloina ia mea, ma sesē a lē tasi i le tasi. Pe a ua e faia se mea e fa'atausuai i lau uō pele po o le tuā'oi, ia e fa'ailoa lou sesē, ma o lana tiute o le fa'amagaloina lea o 'oe. Ona e sa'ili lea o le fa'amagaloga mai le Atua, auā o le uso na e fa'amanu'a e ā le Atua ia; ina ua e fa'atigā iā te ia, ua e agasala i luma o lona Fa'aola ma Lē na faia ia. O le a aumaia le moliaga i luma o le Fautua moni, o la tatou Faitaulaga Sili, o Ia "ua fa'aosoosoina i mea uma pei o i tatou, a ua leai se agasala iā te Ia," ma o Ia ua "tigāalofa fa'atasi ma i tatou i o tatou vaivai" (Eperu 4:15), a e mafai ona fa'amamāina mai 'ele'elea uma o le

agasala.

**(3) O LE Ā LE TULAGA E
TATAU ONA I AI O TATOU LOTO
MA AGAGA INA IA FA'ATUPU AI
LE FILEMŪ MONI MA TATOU
TAU FA'ALATALATA ATU AI I LE
ATUA?**

*Ua latalata mai le Ali'i i ē ua loto
momomo; ua Ia fa'aola fo'i i ē ua loto
nutimomoia. Salamo 34:18*

Mau e Tau i ai: Salamo 51:17; 69:32;
10:17; 147:3; Isaia 61:1; 66:2; 57:15;
Esekielu 36:26, 31

O i latou uma e lē ō mai ma le loto
fa'amaulalo i luma o le Atua e fa'ailoa ai
lo latou ta'usalaina, e latou te le'i o'o i le
tulaga muamua o le taliaina. Afai e
tatou te lē o lagona le salamō ma e lē o i
ai le loto maulalo moni mai le agaga ua
momomo e ta'uta'u atu ai a tatou agasala
ua 'ino'ino i ai, e tatou te le'i sa'ili ma le
fa'amaoni mo le fa'amagaloga o agasala;
Afai tatou te le'i sa'ili, tatou te le'i maua
le filemū mai le Atua. E pau le pogai o
le a tatou le'i maua ai le fa'agaloina o
agasala ua mavae ona o lo'o tatou lē
lotomalie e fa'amaulaloina o tatou loto
ma usita'i i tulaga ua tu'u mai i le 'upu
moni.

**(4) E FA'APEFEA LE LOLOTO O
LE AU'ILI'ILI E TATAU ONA
FA'AILOA AI A TATOU
AGASALA?**

*A o'o ina nofo sala o ia i se mea o ia
mea, ia fa'aali mai e ia ua agasala o ia i*

lea mea. Levitiko 5:5

Mau e Tau i ai: Levitiko 26:40; 6:4-7; Numera 5:7; Iosua 7:19; I Korinito 11:28

Ua tu'uina mai fa'atonuga manino e fa'atatau i lenei matā'upu. E tatau ona ta'uta'u atu agasala mai le loto salamō ma le filifiliga e fa'ailoa, a e lē o le una'iina mai le tagata agasala. E lē tatau ona faia mai se tulaga e le'i mafaufauina ma le fa'atamala, po o le fa'amalosi mai i a i latou e lē o iloa le mata'utia o le uiga o le agasala. O le ta'uta'u mai le loloto o le agaga o le a maua ai le ala i le Atua e lē mafa'agataina le tigāalofa. Ua ta'u mai e le Faipese, "Ua latalata mai le Ali'i i ē ua loto momomo; ua Ia fa'aola fo'i i ē ua loto nutimomoia" (Salamo 34:18).

A fa'ailoa agasala fa'apitoa, ma se amioga totino, o le ta'utinoga fa'amaoni lea. Atonu o le uiga moni o lea mea e na'o luma o le Atua e tatau ona aumai i ai; atonu o ni sesē e tatau ona ta'uta'u i se isi na fa'amanu'aina; po o se agasala fa'alaua'itele e tatau ona ta'u i luma o se fa'alapotopotoga e to'atele. A e ia fai se ta'utinoga mo le matā'upu ma fa'ailoa atu ai agasala o lo'o ta'usalaina ai 'oe.

(5) O LE Ā LE AGASALA FA'APITOA NA TA'UTA'U ATU E LE FANAUGA A ISARA'ELU?

Ua fai mai le nu'u uma iā Samuelu, Ia e fautua i le Ali'i lou Atua mo au au'auna, ina ia lē oti i matou; auā ua matou fa'aopoopoina i a matou agasala uma lenei mea leaga, ina ua matou fa'atoga

atu ai i se tupu mo i matou. I Samuelu 12:19

Mau e Tau i ai: Salamo 51:1-4;
Teuterenome 32:49-52

I ōna pō o Samuelu, sa ō 'ese Isara'elu mai le Atua. Sa mafatia i latou ona o i'uga o le agasala; ona ua leai so latou fa'atuatua i le Atua, ua latou lē iloa Lona mana ma le poto e pulea ai le malō, ua latou lē talitonu e mafai e Ia ona puipui ma fa'asa'olelei Lana fuafuāga. Sa fa'anaunau latou i le pule'aga fa'apei o isi malō, ona liliu'ese ai lea mai le Tupu Silisili o mea uma ma le vāteatea. A e le'i maua se filemū, sa latou matuā ta'utino atu, "Ua matou fa'aopoopoina i a matou agasala uma lenei leaga, ina ua fa'atoga atu i se tupu mo i matou." O le agasala lava na ta'usalaina ai i latou sa latou ta'uta'u atu, a e o lo latou lē fa'afetai na fa'apologa ai o latou agaga ma na vavae'esea ai latou mai le Atua.

(6) INA IA TALIA E LE ATUA MEA UA TATOU FA'AILOA ATU, O LE Ā SE MEA E TATAU ONA TATOU FAIA E FA'AALI ATU AI LO TATOU FA'ANAUNAU MONI MO LE FA'AMAGALOIDA?

Inā fafano ia outou, inā fa'amamā ia outou; fa'ate'a 'ese ia a outou galuega leaga i O'u luma, soia tou te fai mea leaga. Isaia 1:16

Mau e Tau i ai: Iakopo 4:8; Salamo 119:11; Tito 2:11-14; Sakaria 1:3; Galuega 22:16; Isaia 55:6, 7; Mataio

3:8; Amosa 5:4, 15; Roma 12:9

O le a lē talia e le Atua le ta'utinoga pe a lē i ai se salamō ma le toe fuata'iina. E tatau ona i ai suiga i le olaga ma e tatau ona tu'u'ese mea uma e fa'atigā i le Atua. O le i'uga lenei o le tigāalofa moni ona o le agasala. O le galuega e tatau ona tatou faia mo le tatou vaega o lo'o tu'u manino maii i o tatou luma: "Inā fafano ia outou, inā fa'amamā ia outou; fa'ate'a'ese ia a outou galuega leaga i O'u luma, soia tou te fai mea leaga. Ia outou fa'amasani i le amio lelei, sa'iliili ia i le fa'amasinoga; ia outou fa'asaoina lē ua sauāina, ia outou fa'amasino i lē ua mātuaoti, ia outou finau mo le fafine ua oti lana tane" (Isaia 1:16, 17). "Afai e fa'afo'i lē ua amioleaga le mea e tu'u fa'afa'atau, ma toe avane le mea na ia fao, ma ia savali e ola ai, ma ua lē fai le amio leaga; e ola lava ia, e lē oti" (Esekielu 33:15). Sa fa'aapea mai Paulo e fa'atatau i le galuega a le salamō, "Fa'auta fo'i i lenei lava mea, na tigā outou e tusa ma le Atua, ua tele lava le filigā na tupu ai iā te outou, i le ma le fa'alētonu, i le ma le loto tigā, i le ma le mata'u, i le ma le naunau tele mai, i le ma le ma'elegā, i le ma le taui atu. Ua uma ona fa'ailoa outou e outou ua outou mamā i lenā mea" (II Korinito 7:11).

(7) PE A MAFAI, O LE Ā LE MEA E TATAU ONA TATOU FAIA MO LATOU UA TATOU FA'ATIGĀ, GAOI ANA MEA TOTINO, PO O UA TATOU FA'AMANU'AINA?

Afai e fa'afo'i lē ua amio leaga le mea e

*tu'u fa'afa'atau, ma toe avane le mea ua ia fao, ma ia savali i sauniga e ola ai, ma ua lē fai le amio leaga; e ola lava ia, e lē oti. **Esekielu 33:15***

Mau e Tau i ai: Luka 19:8; Levitiko 6:2-5; Esekielu 18:7, 12, 16; Numera 5:6-8; I Samuelu 12:3; II Samuelu 12:6; Matalaio 5:24

(8) O AI NA TU'UA'I E ATAMU MA EVA MO MEA NA LA FAIA, ONA LĒ TALIA AI LEA E LE ATUA MEA NA LA FA'AILOA ATU?

*Ona fa'aapea mai lea o Atamu, O le fafine na e aumai iā te a'u, ua na au mai iā te a'u le fua o le la'au, ona ou 'ai ai lea. **Kenese 3:12***

*Ona fetalai atu lea le Ali'i le Atua i le fafine, Se ā lenā mea ua e faia? Ona tali mai lea o le fafine, Na fa'asesē mai le gata iā te a'u, ona ou 'ai ai lea. **Kenese 3:13***

Mau e Tau i ai: Iakopo 1:13; Esoto 32:21-24; I Samuelu 15:20-22; Fa'ata'oto 28:13

Pe a ua fa'agaseina e le agasala lagona e iloa ai le lelei ma le leaga, o le tagata ua sesē e lē va'ai tonu i pona o lana amio pe iloa le mata'utia o le leaga na ia faia; a lē gaua'i atu ia i le mana fa'amasino o le Agaga Pa'ia, o le a tauaso pea ia i lana agasala. O āna ta'utinoga e lē faia i se naunau ma le fa'amaoni. Pe a ia fa'ailoa atu o ia ua agasala ona tu'u atu lea o se fa'ato'esega mo le ala ua ia aga'i i ai, ma fa'aapea pe

ana lē tupu lea mea, manū e na te lē faia le mea ua a'oa'i ai ia.

Ina ua uma ona 'a'ai Atamu ma Eva i le fua na fa'asāina, sa lagona e i la'ua le mā ma le fefe tele. Sa muamua i o la mafaufau se tu'ua'iga mo le lā agasala ina ia lē o'o le oti iā i la'ua. Ina ua fetalai le Ali'i e fa'atatau i le la agasala, o le tali a Atamu na fa'asino ai le sala i lē na la to'alua fa'apea fo'i ma le Atua: "O le fafine na e aumai ia te a'u, ua na aumai ia te a'u le fua o le la'au, ona ou 'ai ai lea." Sa tu'ua'i e le fafine le sesē i luga o le gata, ma ia fa'apea atu, "Na fa'asesē mai le gata ia te a'u, ona ou 'ai ai lea" (Kenese 3:12, 13). Aiseā na e faia ai le gata? Aiseā na e fa'ataga ai ia e sau i Etena? O fesili ia na fa'aalia mai le faitiōga mo lana agasala, o lea ua molia ai le Atua o Lē ua ala ona lā pa'ū'ū. O le agaga e ta'uamiotonuina ai e ia ia lava na amata mai i le tamā o le pepelo ma o lo'o fa'aalia pea e fanau a Atamu ma Eva. O ta'utinoga uma fa'apea e lē o fa'aosofiaina mai e le Agaga fa'ale-Atua ma o le a lē taliaina e le Atua.

(9) O LE Ā LE VA'AIGA A LE TELONA IĀ TE IA LAVA?

*O le telona fo'i, ua tū mamao atu, e lē mafaia ona tepa a'e ona mata i le lagi, a ua pōpō lona fatafata, ua fa'apea atu, Le Atua e, ia e alofa mai iā te a'u le tagata agasala. **Luka 18:13***

Mau e Tau i ai: Luka 5:8; Esera 9:6; Salamo 40:12; Isaia 6:5; Esekielu 16:63

O le salamō moni o le a ta'ita'iina ai le tagata e tau'ave lava e ia lona

ta'usalaina a e fa'ailoa sa'o atu ma e leai se pepelo. E fa'apei o le telona, o ōna foliga e le'i si'i a'e i le lagi a e sa tagi atu, "Le Atua e, ia e alofa mai iā te a'u le tagata agasala," ma o i latou e fa'ailoa atu lo latou tulaga agasala o le a ta'uamiotonuina, auā o le a fautua Iesu e ala i Lona toto, e fai ma sui mo le agaga ua salamō.

(10) O LE Ā TONU LE 'UPU SA FA'AAOGĀ E PAULO MA TAVITANA FA'AILOA ATU AI LE LA FA'ANOANO MONI MO LE AGASALA?

*Sa 'ou fai ai fo'i i Ierusalemā; na 'ou maua fo'i le pule mai le 'au faitaulaga sili, ona ou puipuia lea o le 'au pa'ia e to'atele i fale puipui; na fasiotia fo'i i latou, ua ou fa'aopoopo i ai. Na ou tau atu so'o atu fo'i iā te i latou i sunako uma lava, ma ou tauānau atu ai iā latou 'upu leaga iā Iesu; na ou fa'avalemalosi atu fo'i iā te i latou, ua ou sauā atu ua o'o lava i 'a'ai 'ese. **Galuega 26:10, 11***

*Auā ua ou iloa e a'u lo'u solitulafono; e lē aunoa fo'i ona i ai i o'u luma o la'u agasala. Ua ou agasala atu iā te 'Oe, na o 'Oe lava; ua ou faia fo'i lenei mea leaga i Ōu luma; e tonu ai 'Oe i Lau fetalaiga, e sa'o fo'i 'Oe pe a e fa'amasino. **Salamo 51:3, 4***

Mau e Tau i ai: Salamo 32:5; 38:18; Luka 15:18-21

Fa'ata'ita'iga o Agasala e Ta'u Atu ma le Fa'amaoni: Luka 18:13, 14; 15:18-21; Salamo 51:3, 4; II Samuelu

12:13; Tanielu 9:3-12, 18; Ieremia 3:25

Fa'ata'ita'iga o agasala e Ta'u atu a e leai se loto fa'amaoni: Kenese 3:12, 13; I Samuelu 15:22-26; Iosua 7:19-21

O fa'ata'ita'iga i le Afioga a le Atua o le salamō ma le fa'amaulalo moni e fa'aalia ai le agaga o le ta'utinoga e faia a e leai se tu'ua'iga mo agasala po o le taumafai e fa'ata'uamiotonu e le tagata ia lava ia. E le'i sa'ili Paulo i se talipupuni mo ia lava; na ia ta'u mai lana agasala i se ata e matuā pogisā lava ma sa le'i taumafai e fa'aitiitia lona ta'usalaina. E le'i fa'atuai ona fa'ailoa mai, "Na maliu mai Keriso Iesu i le lalolagi ma fa'aolaina ē agasala; ua silimusa a'u nei iā i latou" (I Timoteo 1:15).

(11) O LE Ā LE FOLAFOLAGA OFOFOGIA E MAFAI ONA TATOU TALIA PE A UA TATOU LOTO SALAMŌ MONI MO A TATOU AGASALA MA TA'U ATU LEA I LE ATUA?

A e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava. I Ioane 1:9

Mau e Tau i ai: Fa'ata'oto 28:13; Galuega 3:19; Ieremia 33:8; Ne'emias 9:17; II Nofoa'iga Tupu 7:14; Eperu 7:25; Isaia 43:25, 26; 1:18

O le loto momomo ma le fa'amaulalo, ina ua fa'ato'ilaloina e ala i le salamō moni, o le a iloa le lelei o le

alofa o le Atua ma le tau na totogiina i Kalevario. E fa'apei o le atali'i e ta'uta'u mea uma i le tamā agaalofo, e fa'apea le tagata e salamō moni ona aumai uma ana agasala i luma o le Atua.

Ou te vi'ia le Atua mo le meaalofo o le salamōua tu'uina mai iā te a'u ma ua ou filifili e mulimuli i Lana ta'ita'iga ma ia ta'uta'u atu ma tu'u'ese a'u agasala.

Li'o le tali: Ioe Lē mautonu

Ina ia ou maua le alofa tunoama iā te a'u le filemū moni o lo'o fa'anaunau i ai lo'u loto, ou te malamalama e tataua ona ou ta'u tonu la'u agasala fa'apitoa i le Atua, ma pe a mafai, ia ta'u i le tagata na ou fa'atigā.

Li'o le tali: Ioe Lē mautonu

A o ou su'esu'e ma ua tosina atu a'u tau lata iā Keriso, ua ou iloa e i ai ē na ou fa'atigā, pepeloina, ma fa'amanu'aina i taimi ua mavae. E ala i le alofa tunoa o le Atua, ou te ta'utino e fa'aleleia mea uma, pe a mafai.

Li'o le tali: Ioe Lē mautonu

Ou te 'ai'oi mo Lona toto tāua ia ufitia ai solitulafono e tele ua ou faia e tete'e ai iā te Ia ma i latou uma na Ia faia.

Li'o le tali: Ioe Lē mautonu

O la'u tatalo pe afai ou te fesesēa'i mai Lona ala, o le a tu'u mai pea e le Atua iā te a'u le meaalofo o le salamō ma ta'ita'i a'u e ta'uta'u a'u agasala ina ia

*ou savali i le ala o le amiotonu mo
Lona suafo.*

Li'o le tali:

Io e

Lē mautonu



Lesona 6

Fa'apa'iāga

**(1) E FA'APEFEA ONA TATOU
SA'ILIA LE ALI'I INA IA MAUA O
IA MA TOE FA'AFO'I I TATOU I
LONA FA'ATUSA?**

*E sa'ili mai outou iā te A'u, tou te maua
fo'i, pe a outou sa'ili mai iā te A'u ma
outou loto atoa. **Jeremia 29:13***

Mau e Tau i ai: Teuterenome 4:29;
30:9, 10; Isaia 55:6, 7; Luka 11:9, 10;
Jeremia 24:7; II Nofoa'iga Tupu 31:21;
Salamo 119:2, 10, 58, 69, 145; Ioelu
2:12, 1

E tatau ona tu'u ma gaua'i atu le
loto atoa i le Atua, ona mafai lea o le
suiga e mana'omia iā i tatou ina ia toe
fa'afo'i ai tatou i Lona fa'atusa. E ala i lo

tatou uiga moni, o i tatou o tagata ua fa'amasesei mai le Atua.

(2) O LE Ā LE TATOU TULAGA PE A LĒ FA'ALAVEIA E LE ATUA?

O outou fo'i lava o ē na oti i amio leaga ma agasala. Efeso 2:1

Mau e Tau i ai: Efeso 2:5; 4:18; 5:14; Ioane 11:25, 26; Roma 8:2; Kolose 2:13; Mataio 8:22; Luka 15:24, 32; II Korinito 5:14; I Timoteo 5:6; I Ioane 3:14

Ua fa'amatalaina e le Agaga Pa'ia lo tatou tulaga i 'upu fa'apenei: "O lo'o ma'i le ūlu uma, o lo'o vaivai le loto uma;...e leai se mea ua sao" (Isaia 1:5, 6). Ua fusi mau i tatou i mailei a Satani, "o ē ua maua e ia, a fai lona lava finagalo" (II Timoteo 2:26). E fa'anaunau le Atua ia fa'amalolōina i tatou, ia fa'asa'olotoina i tatou. A e peita'i e mana'omia se suiga ato'atoa, se fa'afouina o lo tatou uiga atoa, ma e tatau ona tatou gaua'i ma le ato'atoa iā te Ia.

O le taua e tauina ma 'oe lava ia e aupito mata'utia lea. A gaua'i ma tu'u atu atoa 'oe lava ia i le finagalo o le Atua, o le a mana'omia se tofotofoga; a e peita'i e tatau ona usiusita'i le agaga i le Atua ona mafai lea ona toe fa'afou le fa'apa'iaina.

(3) O LE Ā LE VALA'AU UA TU'U MAI E LE ATUA E FA'AALI AI O LO'O IA FA'ATAGA I TATOU IA SA'OLOTO E FILIFILI?

*O lo'o fa'a'apea mai le Ali'i, Ō mai ia, inā tatou filifili ia, e ui lava ina pei o ofu mūmū a outou agasala, e sisina ia e pei o le kiona; e ui lava ina mūmū ia e pei o le 'ie 'ula'ula, e 'avea e pei o fulufulu mamoe. **Isaia 1:18***

Mau e Tau i ai: Isaia 44:22; 41:21; 43:24-26; 55:1-3; Mika 6:2; Mataio 11:28; Teuterenome 30:10, 19; Iosua 24:15; I Ioane 1:9

Ua fa'ailoa sesē mai e Satani o le malō o le Atua e fa'avacina i luga o le gaua'i fa'amalosi, o se pule e lē fuafuaina. E foliga tāua i lē atamai ma le loto fuatiaifo, fa'apei ona tusia, "Ō mai ia, ina tatou filifili ia" (Isaia 1:18), o le vala'au lea a le Fa'aola i agaga uma na Ia faia. E lē fa'amalosia e le Atua loto o Āna meaola na foafoa; ma e Na te lē mafai ona talia se fa'aaloaloga e aumaia fa'amalosi toe lē faia ma se mafaufau. O le gaua'i e fa'amalosia ona tu'u mai o le a lē fa'atuputina ai le mafaufau po o le amio; o le a 'avea le tagata e na'o se masini, ma e lē o le fuafuāga lea na faia ai le tagata i lona foafoāga. E fa'anaunau o Ia ina ia aupito maua luga le tuputupu a'e o le tagata, auā o ia o le paleali'i o le galuega na faia i Lona mana foafoa. Ua Ia tu'u i o tatou luma fa'amanuiāga maoa'e o lo'o Ia naunau e aumaia iā i tatou e ala i Lona alofa tunoa. O lo'o Ia vala'au mai pea ina ia tu'u atu i tatou iā te Ia, ia mafai ona Ia faia Lona finagalo i totonu o i tatou. O lo'o tu'u mai iā i tatou e filifili po o le a fa'asa'olotoina mai le pologa o le agasala, ina ia tatou tofusia i

le sa'olotoga mamalu o le fanau a le Atua.

**(4) O LE Ā LE MEA E TATAU
ONA TATOU MALIE E FAIA PE A
TATOU TU'U ATU TATOU LAVA
IA I LE ATUA MA 'AVEA O SO'O
O KERISO?**

*E fa'aapea fo'i so outou e lē lafoa'i ana
mea uma, e lē mafai ona fai o ia Mo'u
so'o. Luka 14:33*

Mau e Tau i ai: Luka 5:11, 28; 18:22,
23, 28-30; Filipi 3:7, 8; I Ioane 2:15-17

Pe a tatou tu'uina o tatou ola i le Atua, e tatau iā i tatou ona 'ave'ese. mea uma o le a vavae'ese ai tatou ma Ia. O le tupe ua faia ma atua o le to'atele. O le fiafia i tupe, o le tu'inanau mo oloa, o le maea auro lea ua fusia ai i latou iā Satani. O tulaga ma fa'aaloaloga fa'alelalolagi ua fai ma tapua'iga a le isi vasega o tagata. O le olaga manatu fa'apito ma le fa'asa'olotoina mai tiute tau'ave ua 'avea ma atua o isi. A e peita'i e tatau ona motusia o nei saisaiga fa'apologa, ona e lē mafai ona tatou tū fa'a'afa'afa i le Ali'i ma le isi 'afa i le lalolagi. E lē o tatou se fanau a le Atua vaganā ua i ai tatou i le ato'atoa.

**(5) AISEĀ E LĒ MAFAI AI ONA
TATOU MAUA FA'A-TAUI LO
TATOU FA'AOLATAGA?**

*Auā o le alofa tunoa ua fa'aolaina ai
outou i le fa'atuatua; e lē mai iā te outou
fo'i lava, a o le mea ua foa'iina mai e le
Atua. Efeso 2:8*

Mau e Tau i ai: Efeso 2:5; Roma 3:20-26; Luka 7:50; Ioane 3:14-18, 36

E i ai nisi ua ta'u mai o lo'o latou 'au'auna i le Atua, a e o lo'o fa'alagolago i o latou lava taumafaiga ina ia usita'i i Lana tulafono, ia fausia se uiga e tonu ma ia mautū ai le fa'aolataga. E lē o fa'agaoioia o latou loto ona o le lagona o le alofa iā Keriso, a e peita'i ua sa'ili e faia galuega o le olaga fa'a-Kerisiano fa'apei ona mana'omia e le Atua mo i latou ina ia ulufale ai i le lagi. O lea itu'aiga tapua'iga e leai se aogā. Pe a mafuta le Atua i le loto, o le a fa'atumulia ai le agaga i Lona ma le fiafia i le so'otaga ma Ia, ona pi'imaui ai lea iā te Ia; ma a o manatunatu loloto iā te Ia, o le a fa'agaloina le manatu iā te 'oe lava. O le alofa iā Keriso o le a fa'atupu ai le fa'agaoioiga. O i latou uma e lagona le alofa fa'atauana o le Atua o le a lē fesili e fa'aititia se mea atonu e mafai ona tu'u atu e fa'amalieina ai mea o mana'omia e le Atua; latou te lē mana'o i se tulaga e aupito maulalo, a e fuafua ia usiusita'i ma le ato'atoa e faia le finagalo o lo latou Fa'aola. Ua latou naunau fa'amaoni e tu'u atu mea uma ma fa'atinoina le fiafia ia tutusa ma le aogā o le mea o lo'o latou sa'ilia. O le ta'uta'u o Keriso a e lē o lagona se alofa loloto, e na'o se tala lea, e mātūtū e lē uigā, ma e faigatā e tigāina ai.

**(6) E FA'APEFEA ONA
FA'AMATALA MAI E LENEI
FUAI'UPU LE MAFATIĀGA MA
LE FA'ALUMAINA NA O'O IĀ
KERISO MO LO TATOU**

TOGIOLA?

*A ua manu'a o Ia ona o a tatou solitulafono, ua momomo o Ia ona o a tatou amioleaga; o le a'oa'iga e filemū ai tatou sa i Ōna luga lea, o Ōna fa'alavalava fo'i ua malolo ai tatou....Na fa'asauāina o Ia, sa tigāina fo'i o Ia, a e lā tautala mai o Ia; e pei o le tama'i mamoe ua ta'ita'iina ia fasia, e pei o le mamoe fo'i i luma o ē sele lona fulufulu, ua fa'alologa ia, o Ia fo'i fo'i ua lē tautala mai. **Isaia 53:5, 7***

Mau e Tau i ai: I Peteru 2:24; 3:18; Roma 4:25; 5:6-8; Tanielu 9:24, 26; Mataio 20:28; Efeso 5:2; Tito 2:14

E te lagona o se taulaga e faigatā tele pe a gaua'i atoa iā Keriso? Ia e fesili lava 'oe iā te 'oe, "O le ā le mea na faia e Keriso mo a'u?" Na tu'uina e le Ālo o le Atua mea uma - o le soifua ma le alofa tunoa ma le mafatiāga - e togiola ai i tatou. E mata o le a tatou taofiofi o tatou loto mai iā te Ia, o tatou o atigimea e lē aogā na fa'aalia mai i ai Lona alofa tele na'uā? O taimi ta'itasi uma o tatou olaga o lo'o tatou tofusua pea fa'amanuiāga o Lona alofa tunoa, ma o lenei lava le pogai e lē o mafai ai ona tatou malamalama ato'atoa i le loloto o le valea ma le pagātia sa fa'asaoina mai ai i tatou. E mafai ea ona tatou tepa a'e iā te Ia Lē na tuia ona o a tatou agasala, a e o lo'o manatu e fai pea lea e ui i Lona alofa e lē gata ma le taulaga na faia? A o va'aia le fa'alumaina e lē mafa'atusaina o le Ali'i o le mamalu, o se mea e tatau le tatou fa'atu'i'ese ona ua mafai ona tatou ulu atu i se olaga e na'o

le fetaua'iga ma ua fa'alēaogā ia e ia lava?

(7) O LE Ā LE 'AVEGA TELE NA AMOINA E KERISO MO I TATOU E TATAU AI IĀ I TATOU ONA MATUĀ SALAMŌ MO A TATOU AGASALA?

*O le mea lea 'ou te vaevaea ai se vaega mo Ia fa'atasi ma ē ua sili, e vaea fo'i le vete fa'atasi ma ē fitafita, ona ua Ia sasa'a atu o Lona ola ia oti; na faitauina fo'i o Ia fa'atasi ma pagotatā; na Ia aveina fo'i agasala a tagata e to'atele, ua fautua fo'i o Ia mo ē solitulafono. **Isaia 53:12***

Mau e Tau i ai: Isaia 53:5, 11; Kalatia 1:4; 3:13; II Korinito 5:21; Eperu 9:26, 28; I Ioane 2:2; 4:9, 10; Mareko 15:28; Luka 22:37

O le fesili a le to'atele o ē loto mitamitavale, "Aiseā e tatau ai ona ou alu atu ma le loto salamō ma le fa'amaulalo a e le'i mafai ona ou mautinoa e taliaina a'u e le Atua?" Ou te fa'asino atu Keriso iā te 'oe. O Ia e le'i agasala ma e sili atu i lea, o Ia o le Ali'i o le lagi; a e ina ua faia o Ia ma sui o le tagata sa 'avea o Ia ma agasala mo le aigā tagata. "Na faitauina o Ia fa'atasi ma e pagotata; na Ia 'aveina fo'i le agasala a tagata e to'atele, ua fautua fo'i o Ia mo e solitulafono" (Isaia 53:12).

A e peita'i, o ā mea ua tatou tu'u'esea, ina ua tatou tu'u atu mea uma? O se loto ua tumu i le agasala, ina ia fa'amamāina e Iesu, e ala i Lona lava toto, ma ia fa'asaoina ai e ala i Lona

alofa e lē mafa'atusaina. A e o lo'o manatu pea le tagata e matuā faigatā lava ona tu'u 'ese atu mea uma! Ua matuā ou mā e fa'alogo atu o tautala i nei mea, ma 'ou mā e tusitusi i lalo.

(8) O LE Ā LE TAUNU'UGA E TATAU ONA TATOU TEPA TAULA'I I AI I MEA UMA, MA A O TATOU FAIA LEA MEA, O LE Ā LE FOLAFOLAGA E MAFAI ONA TATOU TAPAINA?

A ia outou mua'i sa'ili le malō o le Atua ma Lana amiotonu, ona fa'aopoopoina atu lea o ia mea uma iā te outou.

Mataio 6:33

Mau e Tau i ai: Mataio 6:30-32; 19:29; Roma 14:17; Ioane 6:27; I Tupu 3:11-13; 17:13-16; Fa'ata'oto 3:9, 10; Luka 12:31-34; Salamo 34:9, 10; 37:3-7, 18, 19, 20, 25; I Timoteo 4:8; I Ioane 2:17

E lē mana'omia e le Atua i tatou ia tu'u'ese se mea e lelei ona tu'u pea mo tatou. I so'o se mea o lo'o Ia faia, e i ai pea i Lona finagalo le olagatau o Lana fanau. Ma'imaui pe ana iloa e latou uma e lē o filifilia Keriso o lo'o i ai se mea e sili atu le lelei ua Ia fia ofoina mai i lo'o mea o lo'o latou sa'ili i ai. O lo'o faia e le tagata se fa'atigā e tele atu ma e lē tonu i lona lava agaga ina ua manatu ma faia e ia mea e lē talafeagai ma le finagalo o le Atua. E leai se fiafia moni e mafai ona maua pe a uia le ala ua fa'asāina e Lē na te silafia le mea e sili ma o lo'o fuafua mo le lelei o Āna foafoāga uma. O le ala o le solitulafono o le ala lea i le pagātia ma le

fa'aumatiāga.

**(9) A O TATOU SA'ILIA LE MALŌ
O LE ATUA, O LE Ā LE
FOLAFOLAGA E MAFAI ONA
TATOU TAPAINA PE AFAI O I
TATOU O LANA FANAU?**

*Ia e fiafia lava 'oe i le Ali'i, ona foa'iina
lea e Ia iā te 'oe o mea e mana'o i ai lou
loto. Ia e tu'uina atu lou ala i le Ali'i,
ma fa'atuatua iā te Ia, ona faia lava lea
e Ia. Salamo 37:4, 5*

Mau e Tau i ai: Salamo 145:19; 84:11;
23:1-5; 36:8; Ioane 10:10; 15:7, 16; II
Korinito 9:8-11; Luka 12:30-33; I
Timoteo 6:17; I Ioane 5:14, 15

E sesē pe a i ai le manatu e malie
le Atua i le silasila ifo o lo'o
puapuagātia Lana fanau. E naunau le
lagi atoa ina ia fiafia le tagata, ma e lē o
tapunia e le Tamā ni ala e fa'afiafiaina
ai mea ola uma na Ia foafoa. O
mana'oga fa'ale-Atua o lo'o vala'auina ai
tatou ia tete'e atu i tu'inanau e aumai ai
mafatiāga ma fa'anoanoāga, e tapunia
mai ai iā i tatou faitoto'a o le loto fiafia
ma le lagi. E talia e le Fa'aola o le
lalolagi tagata uma e ō mai i so'o se
tulaga o lo'o i ai, ma o latou mana'oga
uma, o le lē ato'atoa, ma vaivaīga uma;
o le a Ia lē na'o le fa'amamā mai agasala
ma tu'u i ai le togiola e ala i Lona toto
pa'ia, a e o le a fa'amalieina le loto
naunau o latou uma na talia le vala'au e
tau'ave Lana amo, ia amoina Lana
avega. O Lana fuafuga ia fa'ae'e le
filemū ma le malōlōga iā i latou uma e ō
mai iā te Ia mo le areto o le ola. Na te

mana'omia i tatou uma e faia na'o
galuega o le ta'ita'iina a tatou la'asaga i
mea maoa'e e lē mafai ona o'o i ai se
tasi e lē usiusita'i. A i ai Keriso i totonu
o le agaga, o le olaga lea e maua le
fiafia moni, o le fa'amoemoe i le
fa'amamaluina.

(10) E FA'APEFEA ONA MAFAI ONA OU TU'U ATU UMA A'U I LE ATUA?

*Pe afai fo'i e leaga iā te outou ona
au'auna i le Ali'i, inā filifili ia outou i le
aso nei, po o ai tou te au'auna i ai;.. a o
a'u nei ma lo'u aiga, matou te au'auna i
le Ali'i. **Iosua 24:15***

Mau e Tau i ai: I Tupu 18:21;
Fa'ata'oto4:25-27; Mataio 26:39; 6:10,
21; Roma 12:1; Filipi 2:5, 13; Iakopo
4:7; Luka 1:38; I Peteru 4:19

Ua e naunau ia tu'uina atu oe iā te
Ia, a e o 'oe e vaivai i le tulaga o le pule
fa'alēagatonu, e fa'apologaina e le
masalosalo, ma e pulea e amioga
masani o lou olaga agasala. O au
folafolaga ma ta'utinoga e pei o maea e
faia i le oneone. E te lē mafai ona pulea
ou mafaufauga, o ou uiga fa'autaga, o
ou tu'inanau. Ona ua e iloa o au
folafolaga lē taunu'u ma ta'utinoga ua
fa'agaloina e fa'avaivaiina ai lou
fa'atuatua i lou lava fa'amaoni, ua e
manatu ai e lē mafai e le Atua ona talia
oe; peita'i ia e lē fa'aloto vaivai ai. E
tatau iā te 'oe ona malamalama i le
malosi moni o le lotomau. O lenei le
mana fa'apulega i le uiga moni o le
tagata, le mana e filifili ai, po o le fai

filifiliga. O mea uma e fa'alagolago i le gaoioiga tonu o le lotomau. Ua tu'uina mai e le Atua i le tagata le mana e filifili ai; o le mea e mafai ona latou fa'aaogāina. E lē mafai e 'oe ona suia lou loto, e te lē mafai e 'oe lava ona tu'u i le Atua se loto alofa; a e mafai e 'oe ona filifili e 'au'auna iā te Ia. E mafai ona tu'u lou loto iā te Ia; ona mafai lea ona Ia galue ia e loto ma e faia mea e fa'atatau i Lona finagalo malie. O le a fa'apea ona e tu'u atu atoa lou uiga moni i lalo o le pulega a le Agaga o Keriso; o ou tu'inanau o le a fa'amautū i luga o Ia, o ou mafaufauga o le a ō gatasi ma Ia.

O fa'anaunauga mo le lelei ma le fa'apa'iaina e tonu lea mo le fuafua e o'o i ai; a e afai e gata ai iinei, o le a leai se aogā. E to'atele o le a lē iloa a o fa'amoemoe ma fa'anaunau ia 'avea ma Kerisiano. E latou te lē o'o i le tulaga e gaua'i atu ai le loto i le Atua. Ua latou lē filifili nei e 'avea ma Kerisiano.

(11) O LE Ā LE I'UGA PE A TATOU TU'U ATU MA LE ATO'ATO A O TATOU LOTO MA O TATOU OLAGA IĀ KERISO?

*'Aua e te fefe, auā 'Ou te iā te 'oe; 'aua le fetepatepa'i, auā o A'u lou Atua; 'Ou te fa'amalosia 'oe; e moni, 'Ou te fesoasoani iā te 'oe; e moni, 'Ou te taofia 'oe i Lo'u lima taumatau e i ai le amiotonu. **Isaia 41:10***

Mau e Tau i ai: Isaia 41:13, 14; 40:29-31; 44:2; Iakopo 4:7, 8; Teuterenome 31:6, 8; Salamo 27:1; 29:11; Roma 8:31; II Korinito 12:9, 10

E ala i le fa'agaoioiga tonu o le

loto, atonu o le a fai ai se suiga atoa i lou olaga. E ala i le gaua'i atu o lou loto iā Keriso, o le a fa'aso'o fa'atasi 'oe ma le mana e sili a'e ona maualuga i malō uma ma pule'aga. O le a iā te 'oe le malosi mai lugā e taofimau ai, ma e ala i le tu'u atu pea o 'oe i le Atua, o le a mafai ai e 'oe ona ola i le olaga fou, e o'o lava i le olaga fa'atuatua.

Ua ou iloa o le malō o le Atua e lē fa'atūina i luga o se pulega e lē taupulea po o le mulimuli fa'amalosi pei ona tau fa'aali so'o mai e Satani.

Li'o le tali: Ioe Lē mautonu

Ou te maofa ina ua tu'u mai ma le atoatoa mea uma e lo'u Fa'aola - Lona soifua, o le alofa mutimutivale ma Ōna puapuagā - mo lo'u togiola ma le fa'anaunauga ina ia fa'atasi ma a'u e fa'ato'ilalo le mana o le agasala i lo'u olaga.

Li'o le tali: Ioe Lē mautonu

Ua ou iloa pe a i ai lo'u mafaufau i lalo o le pule'aga a Satani, e lē mafai ai ona ou pulea o'u manatunatuga, mana'oga fa'afuase'i, po o lagona lē taupulea; ma o a'u ta'utinoga ma tu'utu'uga mo le lelei ua pei o maea e faia i le oneone.

Li'o le tali: Ioe Lē mautonu

Ou te fa'afetai ona e lē fai fa'amalosia e le Atua filifiliga mo Ana meaola na foafoa. Ou te fiasia ona o lo'o Ia vala'au mai pea e tu'u atu o tatou loto iā te Ia ina ia fesoasoani mai ai e fa'atupu ia

*maoa'e silisili o tatou mafaufau, tino,
ma le amio.*

Li'o le tali: Ioe Lē maunonu

*O lea ua manino lo'u malamalama i le
malosi o le loto, ma ua ou iloa o le
mana filifili o lo'o iā te a'u lava, ou te
filifili ai e pulea lo'u loto e le Agaga o
Keriso.*

Li'o le tali: Ioe Lē maunonu

[illegible]



Lesona 7

O le Fa'atuatua ma le Taliaina

**(1) A O FA'ATUPUINA LO
TATOU FA'ANAUNAU IA MAUA
SE FILEMŪ MA IA AUGATASI MA
LE ATUA, O LE Ā SA TATOU
FEGAOIOIA'IGA NA TU'U MAI E
LE ATUA MO LE LEAGA O LE
AGASALA?**

*Ona outou manatunatu ai lea i o outou
lava ala leaga ma mea sa outou faia e
lē o i ai se lelei, tou te ino'ino ai lava
outou iā te outou ona o a outou amio
leaga, atoa ma a outou mea inosia.*

Esekielu 36:31

Mau e Tau i ai: Esekielu 6:9; 20:43;
Luka 18:13; 5:8; Roma 6:21; Salamo

40:12; Esera 9:6; II
Korinito 7:9-11

Pe a ua fa'ate'ia lou loto fuatiaifo e le Agaga Pa'ia, ona e iloa lea o le leaga o le agasala, o lona malosi, o le ta'usalaina, o ōna mafatiāga; ma ua e va'ai atu lea i ai ma le 'ino'ino. Ua e lagona o le agasala ua tu'u'ese'esea ai 'oe mai le Atua, ma o 'oe ua saisaitia i le malosi o le leaga. O le tele o lou taumafai e sola 'ese, o le tele fo'i lea o lou iloa e te mana'omia se fesoasoani. O āu fuafuāga e lē mamā; o lou loto e 'ele'elea. E te iloa o lou olaga e tumu i le manatu fa'apito ma le agasala. Ua e naunau ia fa'amagaloina 'oe, ia fa'amamāina, ia fa'asa'olotoina. O le ō gatasi ma le Atua, ia fa'apei o Ia - o le ā se mea e mafai ona e faia ia maua mai ai lea mea?

(2) O AI O LO'O OFOINA I AI E LE ALI'I LE VAIOLA O LE FA'AMAGALOGA MA LE FILEMŪ?

Outou uma o ē fia inu, ō mai ia i le vai, atoa ma outou ua leai ni tupe, ō mai ia , inā fa'atau ma 'a'ai; ia outou ō mai lava, ma fa'atau le uaina ma le suāsusu, a e leai se tupe, e leai fo'i se tau e fa'atau a'i. Isaia 55:1

Mau e Tau i ai: Isaia 41:17; Ioane 4:14; 7:37, 38; 12:32; Fa'aaliga 21:6; II Peteru 3:9

O lo'o e mana'omia le filemū - O le fa'amagaloga fa'alelagi ma le filemū ma le alofa i lou agaga. E lē mafai ona

fa'atauina ia mea i tupe, e lē maua mai le poto, e lē mafai ona fa'ataunu'uina ona o le atamai; e matuā lē mafai ona e fa'amoemoe, e ala mai i ou lava taumafaiga, ina ia e fa'amautūina. A e ua ofo mai e le Atua fa'ameaalofa iā te 'oe, "e leai se tupe ma e leai se tau."...Ua tu'u mai mo 'oe pe a 'a'apa atu lou lima ma e u'umau i ai. Ua fetalai mai le Ali'i, "E ui lava ina pei o ofu mūmū a outou agasala, e sisina ia e pei o le kiona; e ui lava ina mūmū ia pei o le 'ie 'ula'ula, e 'avea e pei o fulufulu mamoe" (Isaia 1:18).

(3) O LE Ā LE FOLAFOLAGA MATAGOFIE UA TU'UINA MAI E LE ALI'I IA TATOU TALIAINA A O TATOU SA'ILIA LE FILEMŪ?

*'Ou te avatu fo'i iā te outou le loto fou, ma 'Ou tu'u i totonu iā te outou le agaga fou; 'Ou te ave'esea le loto ma'a'a ai o outou tino, ma avatu iā te outou le loto 'a'ano. **Esekielu 36:26***

Mau e Tau i ai: Esekielu 11:19, 20; Teuterenome 30:6; Ieremia 32:39; II Korinito 5:17; 3:3; Ioane 3:3-6

Ua e ta'uta'u atu au agasala, ma ua e tu'u 'esea mai lou loto. Ua e filifili e tu'u atu 'oe lava i le Atua. Ia e alu loa nei lava iā te Ia ma ōle atu ia Na fa'amamā 'oe mai au agasala ma tu'u atu se loto fou mo 'oe. Ia e talitonu e faia e Ia lenei mea ona sa Ia tu'uina mai se folafolaga. O le lesona lenei na a'oa'oina e Iesu a o i ai i lenei lalolagi, i le meaalofo mna folafolaina mai e le Atua iā i tatou, o lea e tatau ai ona tatou

talitonu ua tatou maua, ma e ā tatou.

**(4) AISEĀ NA TUSI FA'AMAU AI
I TOTONU O LE AFIOGA A LE
ATUA FA'AILOGA MA VAVEGA
A KERISO?**

*A ua tusia ia mea, ina ia talitonu ai
outou, o Iesu o le Keriso, le Alo o le
Atua; ina ia maua ai fo'i le ola i Lona
suafa e outou o ē talitonu. Ioane 20:31*

Tusi e Tau i ai: Mataio 9:6; Mareko
2:7, 10; Ioane 5:24, 39; 6:40; I Ioane
5:10-13

Sa fa'amalōlō e Iesu tagata mai a
latou fa'ama'i ina ua latou talitonu i
Lona mana; na Ia fesoasoani i mea e
mafai ona latou va'ai i ai, ona osofia lea
o i latou i le fa'atuatuamau iā te Ia e
fa'atatau i mea e lē mafai ona latou
va'aia - ma ua ta'ita'iina ai i latou e
talitonu i Lona mana e fa'amagaloina ai
agasala.

**(5) O LE Ā LA TATOU VAEGA I
LE TALIAINA O LE
FA'AMAGALOGA O AGASALA?**

*O le mea lea 'Ou te fai atu ai iā te
outou, o mea uma lava tou te ōle mai ai
i a outou tatalo, inā fa'atuatua ia o le a
maua e outou, ona faia lea mo outou.
Mareko 11:24*

Mau e Tau i ai: Mataio 8:13; 21:22;
Salamo 32:10; Efeso 2:8; I Timoteo
4:10

Mai le fa'amatalaga fa'atauva'a a le
Tusi Pa'ia i le fa'amalōlōina e Iesu o

tagata mama'i, e mafai ona tatou maua se a'oa'oga pe fa'apefea ona talitonu iā te Ia mo le fa'amagaloina o agasala. Se'i tatou liliu i le tala i le tagata pipili i Petesa. O lea tagata mafatia sa leai se fa'amoemoe mo se fesoasoani; e le'i fa'aaogāina ona vae mo tausaga e tolusefulu valu. A e sa fa'atonu atu Iesu, "Inā tula'i ia, inā 'ave lou moega, ma savali." Atonu sa fa'apea atu le tagata ma'i, "Le Ali'i e, pe a e finagalo ia fa'aato'atoa a'u, o le a ou usiusita'i i Lau Afioga." A e leai, sa talitonu o ia i 'upu a Keriso, talitonu ua fa'aato'atoaina o ia, ma na ia faia loa se taumafaiga; sa tu'u lona loto atoa ia savali, ma sa savali loa. Sa ia fa'agaoioi le fetalaiga a Keriso, ma ua tu'u atu e le Atua le malosi. Na maua e ia le ato'atoa.

(6) AISEĀ E LĒ MAFAI AI ONA TATOU AUMAIA I LE LOTO SE FA'APA'IAINA E ALA I A TATOU LAVA TAUMAFAGA?

E sili le fa'a'ole'ole o le loto i mea uma, ma ua matuā leaga lava; po o ai na te mafaia ona iloa? **Jeremia 17:9**

Mau e Tau i ai: Ieremia 13:23; 16:12; Salamo 51:5; 53:1-3; Kenese 6:5; Iopu 15:14-16; Failauga 9:3; Mareko 7:21, 22; Iakopo 1:14, 15; Roma 7:14-20; Efeso 2:3

E fa'apea fo'i 'oe o le tagata agasala. E lē mafai e 'oe ona fai se togiola mo au agasala ua mavae; e te lē mafai ona suia lou loto ma fa'apa'iaina 'oe lava ia. Peita'i sa folafola le Atua o le a Ia faia nei mea uma mo 'oe e ala iā

Keriso. Ua e talitonu i lea folafolaga. Ua e ta'uta'u āu agasala ma tu'u atu 'oe i le Atua. O le a e 'au'auna iā te Ia. E fa'apei ona mautinoa ua e faia ia mea, o le a fa'ataunu'u e le Atua Lana fetaiga iā te 'oe. Pe afai e te talitonu i le folafolaga,- talitonu ua fa'amagaloina ma fa'amamā 'oe,- e tu'u mai e le Atua le fa'amaoniga; ua fa'aato'atoaina 'oe, e pei lava ona tu'u e Keriso i le pipili le malosi e savali ai ina ua talitonu ia ua fa'amalōlō. E fa'apea fo'i pe a e talitonu.

Ia 'aua ne'i e fa'atali se'ilogā ua lagona ua ato'atoa 'oe, a e ia fa'apea atu, "Ua ou talitonu; e lē ona ua ou lagona fa'apea, a e ona ua folafola mai e le Atua."

(7) PE A TATOU SA'ILI MA LE FA'ATUATUA LE FA'AMAGALOIDA MAI LE ATUA, AISEĀ O LE A MAFAI AI ONA TATOU MAUTINOIA UA TATOU MAUA LEA MEA?

*O lenei, o outou e leaga, afai ua iloa e outou ona avatu o mea lelei ma a outou fanau, e lē sili ea ona foa'iina mai e lo outou Tamā o i le lagi o mea lelei i ē ōle atu ai iā te Ia? **Mataio 7:11***

Mau e Tau i ai: Mareko 11:24; Luka 11:11; I Ioane 5:14, 15; Salamo 86:5; 103:11-13; Mika 7:18, 19; Roma 5:8-10; 8:32; Efeso 2:4-6; Tito 3:4-7

E i ai se fa'atatauga mo lenei folafolaga - ia tatou tatalo ina ia talafeagai ma le finagalo o le Atua. A e fingalo le Atua ia fa'amamāina i tatou mai agasala, ia 'avea i tatou ma Āna

fanau, ma ia mafai ona ola i tatou ise olaga e fa'apa'iaina. E mafai ona tatou ōle atu mo nei fa'amanuiāga, ma talitonu o le a tatou mauaina, ma fa'afetai i le Atua o nei ua tatou maua nei mea. E iā i tatou le avanoa e ō atu ai iā Iesu ma fa'amamāina ai, ma e mafai ona tatou tutū i luma o le fa'amasinoga e lē mā po o le salamō. "O lenei ua leai se fa'asala i ē o iā Keriso Iesu, o ē lē savavali i la le tino, a e lē i la le Agaga" (Roma 8:1).

(8) E FA'APEFEA ONA MAFAI E TATOU ONA FA'AMAUTŪ LA TATOU VĀ FEALOA'I MA LE ATUA?

O lenei, fa'apei ona outou talia o le Ali'i Keriso Iesu, ia savavali ai outou o iā te Ia. Kolose 2:6

Mau e Tau i ai: Eperu 11:6; 3:14; Kalatia 5:16; Ioane 15:4-9; I Ioane 2:6; II Korinito 5:7; Efeso 5:1, 2; Mataio 6:33

Mai lea taimi ua lē pulea 'oe e 'oe lava ia; ua fa'atauina 'oe i le tau. "E le'i togiolaina outou i mea e pala, o le ario po o le auro;...a o le toto tāua o Keriso pei o lo le tama'i mamoe e lē ponā lava, e leai fo'i sona pona" (I Peteru 1:18, 19). E ala i lenei faiga faigofie o le talitonu i le Atua, ua fotuina e le Agaga PA'ia se ola fou i lou loto. O 'oe ua fa'apei o se tama meamea ua fanau mai i le aiga ole Atua, ma o lo'o alofa Ia iā te 'oe e pei o Lona alofa i Lona Ālo pele.

Ona o lea ua e tu'uina nei 'oe iā Iesu, 'aua ne'i toe solomuli i tua, 'aua le toe alu'ese mai iā te Ia, a e ia e tatalo i

aso ta'itasi, "O a'u e ā Keriso lea; ua uma ona ou tu'u atu a'u iā te Ia;" ma ia ōle atu iā te Ia ia tu'u mai iā te 'oe Lona Agaga ma tausi 'oe e ala i Lona alofa tunoa. Ina ua tu'uina atu 'oe i le Atua, ma talitonu iā te Ia, ona 'avea lea o 'oe o se tasi o Lana fanau, o lea e tatau ona e ola iā te Ia.

(9) O LE Ā LE MEA UA OFOINA ATU E KERISO I A I LATOU UMA E Ō MAI IĀ TE IA?

Ia outou ō mai iā te A'u, outou uma o ē tigāina ma mafatia i 'avega, o A'u fo'i e malolo ai outou. Mataio 11:28

Mau e Tau i ai: Isaia 11:10; 48:17, 18; Jeremiah 6:16; Eperu 4:1

O nisi ua lagona e tatau iā i latou ona i lalo o se tofotofoga ina ia mafai ai ona avatu i le Ali'i se fa'amaoniga ua toe fa'afou o latou olaga, a e latou te le'i maua Āna fa'amanuiāga. A e peita'i e mafai nei lava ona latou tapaina manuia mai le Atua. E tatau ona iā i latou Lona alofa tunoa, le Agaga o Keriso, ia fesoasoani i o latou vaivaīga, a lē o lea o le a lē mafai ona latou tete'e i le leaga. E fiafia Iesu pe a tatou ō atu iā te Ia i o tatou lava tulaga, e agasala, lima vaivai, fetaulagolagoa'i. E mafai ona tatou ō atu ma o tatou vaivaīga uma, o tatou sesē, o tatou agaga agasala, ma pa'ū'ū i lalo o Ōna 'a'ao i le salamō. O Lona mamalu o le a si'omia i tatou i Ōna 'a'ao alofa ma fusifusi i o tatou manu'anu'a, e fa'amamā i tatou mai 'ele'elea uma lava.

(10) O LE Ā LE TA'UTINOGA

MAUTŪ A LE ATUA UA TU'UINA I TAGATA AGASALA UMA UA SALAMŌ?

*Ua 'Ou soloia ōu solitulafono e pei o se
ao uliuli, ma au agasala e pei o se ao;
fo'i mai ia iā te A'u, auā ua 'Ou
fa'atauina 'oe. Isaia 44:22*

Mau e Tau i ai: Isaia 1:18; 43:25;
Jeremia 33:8; Tito 2:13, 14; I Ioane 1:9

Oinei ua to'ilalo ai le to'atele;
latou te lē o talitonu e mafai e Iesu ona
fa'amagalo latou ta'ito'atasi. E latou te lē
talitonu i 'upu o Lana afioga. O se
avanoa lenei ua tu'uina i tagata uma e
tausisi i fa'atatauga e iloa ai lava e latou
ia o le fa'amagaloga e ofo fua mo
agasala uma. Ia tu'u 'ese le masalosalo
fa'apea o folafolaga a le Atua e le'i faia
mo 'oe. Na faia mo tagata solitulafono
uma ua salamō. O le malosi ma le alofa
tunoa ua tu'uina mai e ala iā Keriso ma
ua aumaia e agelu o lo'o tautua i agaga
ta'ito'atasi uma e salamō. E leai se tasi
ua matuā agasala lava ua lē mafai ai ona
maua le malosi, le olaga mamā, ma le
amiotonu iā Iesu, o Lē na maliu mo i
latou. O lo'o fa'atali o Ia ina ia 'ave'esea
o latou 'ofu pisia ma fa'a'ele'elea e le
agasala, ma fa'a'ofuina i latou i 'ofu
papa'e ole amiotonu; o lo'o Ia poloa'i
mai ia latou ola a e lē o le oti.

**(11) E FA'APEFEA ONA
FA'AFEAGAI LE ATUA MA LE
FA'AFITAU LI O A TATOU
AGASALA PE AFAI UA TATOU
MULIMULI I LANA TA'ITA'IGA
MA UA SALAMŌ?**

*E le'i faia e Ia ia i tatou e tusa ma a tatou agasala; e le'i tau mai fo'i o Ia iā i tatou e tusa ma a tatou amio leaga. Auā e pei ona maua le lagi i le lalolagi, e fa'apea ona tele o Lona alofa i ē matata'u iā te Ia. E pei ona vāvāmamao o sasa'e ma sisifo, e fa'apea lava ona fa'amamao e Ia iā i tatou o a tatou solitulafono. **Salamo 103:10-12***

Mau e Tau i ai: Salamo 103:13-19; 130:3, 4; Esera 9:13; Ne'emias 9:31; Iopu 11:6

E lē fai feagaiga le Atua ma tatou e pei ona fa'afeagai tagata fa'atauva'a ma isi tagata. O Ōna manatu o manatu o le alofa mutimutivale, o le alofa tunoa, ma le matuā tigāalofa. Na fetalai o Ia, "Ia lafoa'i e lē ua amio leaga lona ala, ma le tagata agasala ia lafoa'i e ia ona manatu; a ia fo'i mai i le Ali'i, ona alofa mai lea o Ia iā te ia; ia fo'i mai i lo tatou Atua auā Na te matuā fa'amagaloina" (Isaia 55:7). "Ua 'Ou soloia ou solitulafono e pei o se ao uliuli, ma au agasala e pei o se ao" (Isaia 44:22).

"Ou te lē fīfīa lava i le oti o lē oti, o lo'o fetalai mai ai le Ali'i le Atua; o lenei liliu mai ia outou tou te ola ai" (Esekielu 18:32). O lo'o sauni pea Satani e 'ave'ese atu ta'utinoga pa'ia a le Atua. E naunau o ia e 'ave'ese fa'amoemoega uma ma 'ave malamalama o le agaga; a e ia 'aia lava ona e fa'atagaina ia e faia lea mea. 'Aua ne'i e fa'alogi i lē fa'aosooso, a e ia fai i ai, "Na maliu Iesu ina ia ou ola. E alofa Ia iā te a'u, ma e finagalo ia lē

fa'aumatiaina a'u."

**(12) E FA'APEFEA LE FAIGA A
LO TATOU TAMĀ FA'ALELAGI O
LANA FANAU LĒ FA'AUTAUTA
PE A TOE FO'I IĀ TE IA?**

*Ona tula'i lea o ia ua alu i lona tamā.
Ua iloa mamao atu fo'i o ia e lona
tamā, ona mutimuti vale lea o lona
alofa, ua momo'e atu ia, ua fusi iā te ia,
ma sogi atu iā te ia. **Luka 15:20***

Mau e Tau i ai: Teuterenome 30:2-4;
Salamo 86:5, 15; 78:3; 145:8

E fa'apei i tatou o le atali'i sa
fa'amaumau mea ma e mafai ona tatou
fa'apea atu, "E i ai lo'u Tamā i le lagi e
tele Lona alofa mutimutivale; e ui ina
ou so'ona fai Lona alofa, e ui ina ou
fa'ataugā manuia e tele sa Ia tu'u mai iā
te a'u, o le a 'ou tula'i, ma 'ou alu i lo'u
Tamā, ma fai atu iā te Ia, 'Ua 'ou
agasala i Lē o i le lagi, atoa ma Ōu
luma, ua 'ou lē toe aogā ona ta'ua o Lou
atali'i; ia e 'avea a'u ia pei o se tasi o Āu
'au'auna'" (Luka 15:18). O lenei
fa'ata'oto e ta'u mai ai pe fa'apefea ona
taliaina le tagata e feālua'i solo.

A e ui ina ta'ua le fa'apalepale i
lenei tala fa'afa'atusa, e lē o fa'ailoa ai le
tigāalofa e lē gata o le Tamā fa'alelagi.
Ua fetalai le Ali'i e ala mai i Lana
perofeta, "O le alofa e fa'avavau ua 'Ou
alofa atu ai iā te 'oe; o le mea lea ua 'Ou
fa'afualoaina ai Lo'u alofa iā te 'oe"
(Jeremia 31:3). A o taumamao pea le
tagata agasala mai le fale o le Tamā, ua
fa'amaumau uma ana mea i se nu'u 'ese,
a e o le loto o le Tamā o lo'o naunau pea

mo ia; ma o fa'anaunauga uma e
fafaguina ai le agaga ia toe fo'i i le Atua
ua na'o se 'ai'oi alofa a Lona Agaga, e
tau fa'a'ua'i mai, fa'aōlega, fa'atosina mai
le tagata na lē iloa ona o le feālua'i i le
loto alofa o le Tamā.

(13) O LE Ā LE FOLAFOLAGA UA TU'UINA MO I LATOU UMA E SA'ILI LE ALI'I?

*O i latou uma ua foa'iina mai iā te A'u e
le Tamā, e ō mai i latou iā te A'u; o ia
fo'i e sau i a te A'u, 'Ou te lē tulia lava i
fafo. Ioane 6:37*

Mau e Tau i ai: Mataio 11:28; Eperu
7:25; Salamo 102:17; Isaia 55:7;
Fa'aaliga 22:17; II Peteru 3:9; Roma
8:31, 32; 5:8

Ona o le tele o folafolaga i le Tusi
Pa'ia ua tu'u mai i ou luma, e mafai
fa'a'apefea ona iā te 'oe se uiga
masalosalo? E mafai ona e talitonu pe a
fa'a'apea ua naunau le tagata agasala e toe
fo'i mai, ua naunau e tu'u'ese ana
agasala, o le a taofia fa'amalosi ia e le
Ali'i ina ia lē mafai ona alu atu i Ōna
'a'ao ma le loto salamō? Ia 'ave'ese ia
itu'aiga manatu! O le a fa'atigāina lou
lava agaga i le fafauina o se mafaufauga
fa'apenei e fa'atatau i le Tamā fa'alelagi.
E 'ino'ino Ia i le agasala, a e alofa i le
tagata agasala, ma na Ia tu'u mai Ia lava
e ala iā Keriso, atonu o i latou uma e
mafai o le a fa'aolaina ma maua le
fa'apa'iaina e fa'avavau i le malō
mamalu. O le ā se gagana e malosi atu
pe mālū e mafai ona fa'aaogāina i lo o
lenei ua Ia filifili e fa'ailoa mai ai Lona

alofa mo i tatou?

Ia tepa a'e outou o lo'o masalosalo ma matata'u; o lo'o soifus Iesu o le puluvaga mo i tatou. Ia fa'afetaia le Atua ma le meaalofo o Lona Ālo pele ma tatalo ina ne'i fa'alēaogāina Lona maliu mo i tatou. O lo'o vala'au mai le Agaga iā te 'oe i le asō; sau ma lou loto atoa iā Iesu, ma ia e talia Āna fa'amanuiāga.

A o e faitau i nei folafolaga, ia manatua o nei 'upu o fa'matalaga o le alofa ma le loto mafatia e lē mafa'aleoina. O lo'o tosina mai le Agaga o Lē alofa e lē gata e fa'asino i le tagata agasala ma se tigāalofa e lē mafa'atuā'oia. "O Ia fo'i ua tatou maua ai le togiola i Lona toto, o le fa'amagaloina o agasala" (Efeso 1:7). Ia tau lava o le talitonu o le Atua o lou fesoasoani. e finagalo o Ia e toe fa'afo'i Lona fa'atusa agatonu i le tagata. A o e fa'alatalata atu iā te Ia ma le ta'uta'u atu ma le salamō, o le a fa'alatalata mai Ia iā te 'oe ma le alofa tunoa ma le fa'amagaloga.

(14) O Ā FOLAFOLAGA PA'IA E MAFAI ONA TAPAINA E FANAU UMA A LE ATUA?

E galo ea e le fafine lana tama ua susu, na te lē alofa i le tama o lona lava manava? Ai lava e galo i a te i latou, a e lē galo lava 'oe iā te A'u. (a) Isaia 49:15

Ia aunoa a outou amio ma le matape'ape'a; ia gata ia o outou mana'o i mea ua iā te outou; auā ua fetalai mai o Ia, 'Ou te lē tu'ua lava 'oe, 'Ou te lē

tu'ulafoa'i lava iā te 'oe. (b) Eperu 13:5

Mau e Tau i ai: Teuternome 31:6, 8;
Malaki 3:17; Roma 8:38, 39; Ieremia
31:33-35; 32:38-40; Ioane 10:27-30

*A o ou su'esu'e i le Afioga a le Atua, ua
ou lagona Lona Agaga o lo'o tu'itu'i i le
faitoto'a o lo'u loto (Fa'aaliga 3:20).*

Li'o le tali: Ioe Lē mautonu

*Ua ou iloa o a'u o se tagata agasala ua
lē iloa ma ou te mana'omia se Fa'aola
(Roma 3:23).*

Li'o le tali: Ioe Lē mautonu

*Ou te ofo ona ua fa'aalia e le Atua Lona
alofa e ala i le auina mai o Lona Alo o
Iesu e fa'asao a'u mai le fa'aumatiaga
ma ou te iloa e na o Ia le Faitoto'a i le
fa'aolataga (Ioane 10:9).*

Li'o le tali: Ioe Lē mautonu

*Ua ou malamalama pe afai ou te ta'u
atu a'u agasala ma le loto fa'amaoni, o
le toto pele o Iesu o le a fa'amamāina
a'u mai amioleaga uma lava (I Ioane
1:9).*

Li'o le tali: Ioe Lē mautonu

*Pe a ua e tali "IOE" i fesili o i luga,
ou te vala'au ma le fa'aaloalo oe ia
faia le filifiliga e sili ona tāua o lou
olaga. E ala i le fa'atuatua, e mafai
ona e talia Iesu e avea ma lou lava
Fa'aola, ona e lagona lea o se filemū
ofoofogia, le mana, ma le alofa tumau*

i lou olaga. Ia e fa'aleo lenei tatalo ma se loto talitonu moni (Ioane 1:12).

"Le Tamā pele o i le lagi, ou te iloa o a'u se tagata agasala ma ou te talitonu na E auina mai Lou Alo e maliu mo a'u. Ou te ole atu ma le fa'atuatua, ina ia ou talia Iesu e fai ma o'u Fa'aola ma ia ufiufi a'u agasala uma e Lona toto pa'ia ma le tāua. Ua ou filifili e liliu 'ese mai o'u uiga agasala ae ole atu ina ia avea Oe ma le Ali'i o lo'u olaga. I le suafa o Iesu, Amene."

Ia fa'amalō lava! Atonu ua e lagona pe lē lagona fo'i e 'oe se suiga a e peita'i, ona o lou fa'atuatua, o oe lava se tasi o le fanau ua fa'aolaina a le Atua ma o se tagata fou iā Keriso (Galuega 16:31). O le asō, ona o 'oe o se lālā o le vine, ia mafuta ma Ia i taimi uma lava (Ioane 15:1-8) ma i se aso lata mai o le a toe afio mai o Ia e ave oe i lou aiga fou e fa'atasi ma Ia i le lagi e fa'avavau (Ioane 14:1-3).

This image shows a blank sheet of white paper with horizontal ruling lines. The lines are evenly spaced and extend across the width of the page. There are no margins, text, or other markings on the paper.



Lesona 8

O le Tofotofoga o le So'o Moni

**(1) O LE Ā LE MEA UA
FA'ATUSA I AI E LENEI
FUAI'UPU LE GALUEGA A LE
AGAGA PA'IA?**

*E agi le matagi i le mea e loto i ai o ia,
e te fa'alogo fo'i i lona agi, a e te lē iloa
le mea na sau ai ma le mea e alu atu i
ai; e fa'aapea i latou uma o ē ua fanau
mai e le Agaga. **Ioane 3:8***

Mau e Tau i ai: Failauga 11:5; Galuega
2:2; 4:31; Ioane 3:5

Atonu o le a lē mafai e le tagata
ona iloa le taimi po o le nofoāga, pe
fa'ailoga mea uma na tutupu i le
gasologa o le liuga; a e o lea tulaga e lē
fa'amaonia ai lava o ia e le'i liua. E
fa'apei o le matagi, e lē mava'aia, a e o
ōna uiga e manino ona lagona ma e
vaa'ia fo'i, ma o le Agaga o le Atua e

fa'apea ona galue i le loto o le tagata. O lea mana toe fa'afou, e lē mava'aia e mata o le tagata, a e o ōna uiga e manino ona lagona ma e va'aia fo'i, o le Agaga o le Atua lea o lo'o galue i le loto o le tagata, e fanauina se ola fou i le agaga; e toe faia se faia se tagata fou i le fa'atusa o le Atua. O le galuega a le Agaga Pa'ia e filemū ma e lē mailoa, a e fa'atino mai i ōna i'uga. Pe a ua fa'afouina le loto e ala i le Agaga o le Atua, o le a molimau ma fa'amaonia i le olaga o le tagata.

(2) E FA'APEFEA ONA SUIA O LE OLAGA MA FA'AFOUINA LE LOTO?

O lenei, afai o iā Keriso se tasi, o le tagata fou ia; ua mavae mea tuai, fa'auta, ua fa'afouina mea uma. II Korinito 5:17

Mau e Tau i ai: Esekielu 11:19, 20; 36:26; 18:27-31; Efeso 2:10; 4:23, 24; Roma 6:4-6; 8:10

E lē mafai e tatou ona faia se mea e suia ai o tatou loto pe aumaia i tatou ia talafeagai ma le Atua; ona e lē tatau ona tatou fa'atuatuaina i tatou lava po o a tatou galuega lelei, o tatou olaga o le a fa'aalia pe o lo'o mafuta i totonu o i tatou le alofa tunoa o le Atua. O le a va'aia se suiga i le amio, o maasaniga, ma fa'amoemoega. O le a manino le 'ese'esega ma filifili ai i le vā o tulaga na i ai ma le mea ua i ai nei. E fa'aalia le amio, e lē ala i le lelei i nai taimi ma sesē e tupu mai, a e ala i le aga'iga i 'upu ma āga ua fa'amasani i ai.

E moni atonu e i ai se fa'aaliga sa'o e iloa mai fafo o le uiga a e lē o le fa'afouina o le mana o Keriso. O le fiafia i le lauiloa ma le naunau i le ta'uleleia e isi e fotu mai ai se olaga e lē gaoiā. O le manatu iā te ia lava o le a ta'ita'iina i tatou ia lē fa'ailoa le foliga o le leaga. O le tagata e loto fa'apito e mafai ona faia galuega lelei. O le ā la le ala o le a tatou iloa ai po'o fea le itū o lo'o tatou i ai?

O ai e i ai se loto? Ma o ai o alu i ai o tatou manatunatuga? O ai e tatou te fiafia e autū i ai a tatou talanoaga? O ai e alu i ai lo tatou alofa fa'apitoa ma lo tatou malosi? Pe afai o tatou e ā Keriso, o le a i ai o tatou mafaufauga ma Ia, o a tatou manatunatuga e sili ona lelei lea e fa'atatau iā te Ia. O i tatou ma tatou mea uma ua fa'apa'iaina mo Ia. Ua tatou fa'anaunau e tau'ave Lona fa'atusa, ia mātāvaina Lona Agaga, faia Lona finagalo, ma fa'amalieina Ia i mea uma.

(3) O Ā UIGA O LE A ILOA MANINO I O TATOU OLAGA PE A UA FANAUFUINA MONI I TATOU?

A o fua o le Agaga o le alofa, o le oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā; e lē fa'atulafonoina mea fa'apenā. Kalatia 5:22, 23

Mau e Tau i ai: Kalatia 5:16, 17; Salamo 92:12-14; Mataio 12:33; Luka 8:14, 15

O i latou uma ua 'avea ma tagata

fou iā Keriso Iesu o le a lē toe fafauina a latou amioga e fa'atatau i tu'inanau ua mavae, a e ala i le fa'atuatua i le Ālo o le Atua o le a latou mulimuli i Ōna la'asaga, fa'aātaina Lona uiga, ma e fa'amamāina i latou e pei ona mamā o Ia. O mea sa latou ino'ino i ai ua fiafia nei i ai, ma o mea na fiafia i ai ua inosia nei. O lē sa mitamitavale ma manatu fa'amaualuga ua suia i le agamalū ma le loto maulalo. O le fa'alialia ma le fiatagata ua lē toe tausuaaina ma fia muamua. O lē sa onā ua lē toe afāina i se meainu malosī, o lē fai amiomatagā ua mamā. O āga fa'aalialia ma tū o le lalolagi ua tu'u'ese. O Kerisiano o le a lē sa'ilia "i le tino a latou teuga," a e "o le tagata lilo o le loto, ia teua lea i le mea e lē pala, o le loto agamalū ma le filemū, o le mea tau tele lava lea i luma o le Atua" (I Peteru 3:3, 4).

**(4) O LE Ā LE MEA O LE A
TATOU NAUNAU E FAIA MO I
LATOU NA TATOU
AGALEAGAINA, INA UA TOE
FANAUFUINA I TATOU?**

Ua tū mai Sakaio, ua fa'aapea mai i le Ali'i, Fa'auta, le Ali'i e, o le a 'ou vaeluaina atu a'u mea i ē matitiva; afai fo'i ua tigā se tasi i lo'u tu'ua'i ane, 'ou te tau i atu ai e taifā. Luka 19:8

Mau e Tau i ai: Esoto 22:1; Mataio 5:23, 24; Luka 3:8; I Samuelu 12:3; II Samuelu 12:6

E leai se fa'amaoniga o le salamō moni vaganā ua galueina ai le toe fa'afouina. Pe afai o le a toe fa'afou le

ta'utinoga, toe 'ave mea sa ia gaoi,
ta'uta'u ana agasala, ma alofa i le Atua
ma ōna uso ā tagata, ona mautinoa lea e
le tagata agasala o le a ia solo'ese mai le
oti i le ola.

Pe a tatou ō mai iā Keriso, o
tagata fai mea sesē ma agasala, ma
tofusia i Lona alofa tunoa e fa'amagalo
ai, o le a oso a'e loa le alofa i le loto. O
le a māmā 'avega uma, auā o le amo e
tu'u mai e Keriso e faigofie lava. O
galuega o le a fiafia i ai, ma e malie e
tu'u atu ia o le taulaga. O le ala sa foliga
pogisā, ua fa'amalamalamaina i 'ave mai
le Lā o le Amiotonu.

**(5) O LE Ā LE PUNA O LE
ALOFA E SUIA, FA'ATUMU, MA
FA'ATAFE MAI LE LOTO UA
FA'AFOUINA E ALA I LE ALOFA
MUTIMUTIVALE O KERISO?**

*Ia fa'atele fo'i e le Ali'i, ma ia fa'asilisili
ona tele o lo outou alofa, o le tasi i le
tasi, atoa ma tagata uma, fa'apei o i
matou nei lava i a te outou. I Tesalonia
3:12*

Mau e Tau i ai: I Ioane 4:7-13; I
Tesalonia 4:9; Iakopo 1:17; Kalatia
5:22; II Timoteo 1:7

O le matagofie o uiga o Keriso o
le a va'aia i ē e mulimuli iā te Ia. Sa
fa'afiafiaina lava o Ia i le faia o le
finagalo o le Atua. O le alofa i le Atua,
o le ma'elegā mo Lona fa'ane'etaga, o le
mana lea sa pulea le soifua o lo tatou
Fa'aola. O le alofa sa fa'amatagofieina
ma fa'amaoa'e ai Āna gaoioiga uma, ona
o le alofa e mai le Atua. O le loto e lē o

fa'apa'iaina e lē mafai ona amata mai ai pe fa'atupu ai le alofa. E na o le loto e afio ai Iesu e mafai ona maua ai. "Ua tatou alolofa iā te Ia, auā ua Ia mua'i alofa mai iā te i tatou" (I Ioane 4:19). I le loto ua fa'afouina e ala i le alofa tunoa fa'ale-Atua, o le alofa o le fa'avae lea o fa'agaoioiga. E suia ai le amio, e ulita'i manatu fai fa'afuase'i, e pulea tu'innanau, fa'ato'ilaloina le matau'a, ma fa'atatauina lagona o le loto. O lenei alofa, pe a teuina i le loto, o le a fa'asuamalieina le olaga ma fa'aילוa atu i le lalolagi se ola ua fa'amamāina.

**(6) O LE Ā LE MEA O LE A
TATOU FA'ANAUNAU E FAI INA
IA FA'AALIA AI LO TATOU
ALOFA I LE ATUA?**

Afai tou te alofa mai iā te A'u, ia outou tausi A'u poloa'iga. Ioane 14:15

Mau e Tau i ai: Ioane 14:21; 15:10-14; 21:15-17; Mataio 25:34-40; I Ioane 2:3-6; 4:19-21

**(7) AISEĀ E MANA'OMIA AI LE
USIUSITA'I, E ALA I LE MANA O
KERISO, I LE TATOU VĀ
FEĀLOA'I MA IA?**

O sē fa'aapea, Ua 'ou iloā o Ia, a e lē tausi e ia Ana poloa'iga, o le pepelo lava lea, e lē o i totonu iā te ia le 'upu moni. I Ioane 2:4

Mau e Tau iai: I Ioane 1:6-10; 4:20, 21; Iakopo 2:14-16; Tito 1:16; II Timoteo 3:5

E lua sesē e mana'omia ia puipuia mai ai le fanau a le Atua - a e maise i latou fa'ato'ā ō mai iā te Ia ma ua fa'atuatua i Lona alofa tunoa. O le mea muamua, ua tatou tagolimaina, o le va'ai lava lea i a latou lava galuega, ua fa'atuatuaina so'o se mea latou te mafai ona faia ina ia ō gatasi ai ma le Atua. O le tagata e taumafai ia fa'apa'iaina e ala i ana lava galuega e tausi ai le tulafono, o se taumafaiga e matuā lē mafai ona fa'ataunu'u. O mea uma e faia e le tagata a e lē i ai Keriso e fa'aleagaina i le manatu fa'apito ma le agasala. E na'o le alofa tunoa o Keriso, e ala i le fa'atuatua, e mafai ai ona fa'apa'iaina i tatou.

O le isi sesē ma e faigatā fo'i, fa'apea o le talitonu iā Keriso e fa'asa'oloto ai le tagata mai le tausiga o le tulafono a le Atua; pe ona e ala i le fa'atuatua o le a tatou tofusua ai i le alofa tunoa o Keriso, a e o le a leai se aogā o a tatou galuega e fa'atatau i lo tatou fa'aolataga.

(8) O LE Ā LE MEA UA FOLAFOLA MAI KERISO O LE A FAIA IĀ I TATOU PE A UA TOE FANAUFUINA I TATOU?

O le feagaiga lava lenei 'Ou te faia ma i latou pe a mavae atu ia aso, o lo'o fetalai mai ai le Ali'i, 'Ou te tu'uina atu A'u tulafono i o latou loto, ma 'Ou tusi ai i o latou mafaufau. Eperu 10:16

Mau e Tau i ai: Eperu 8:8-10; Ieremia 31:33, 34; 32:40; Roma 8:2-4; Teuter enome 30:6; Salamo 37:31; 40:8; Isaia 51:7; Esekielu 11:19, 20; 36:26, 27

A e ia matau mai, o le usiusita'i e lē na'o se tausia mo le va'aiga mai fafo, a e o le auaunaga o le alofa. O le tulafono a le Atua o se fa'a'upuga o Lona uiga moni lava; o le fa'atinoga o le fa'avae maoa'e o le alofa, ma o lea o le ta'ele ia o Lona malō i le lagi ma le lalolagi. Pe a fai ua fa'afouina o tatou loto i le fa'atusa o le Atua, pe afai ua totō mautū le alofa fa'ale-Atua i o tatou loto, o le a lē fa'ataunu'uina ea la i o tatou olaga le tulafono a le Atua? Pe a ua totōina i o tatou loto le fa'avae o le alofa, pe a toe fa'afou le tagata i le fa'atusa o Lē na faia ia, o le a fa'taunu'uina le folafolaga o le feagaigafou, "Ou te tu'uina La'u tulafono i totonu i a te i latou, ma 'Ou tusi ai i o latou loto..." (Jeremia 31:33). Pe afai o le a tusia le tulafono i totonu o le loto, o le a lē fa'atinoa ea i le olaga? O le usiusita'i - o le 'au'aunaga ma le tautua fa'amaoni o le alofa - o le fa'ailoga moni lea o lē ua 'avea ma so'o. Ua fa'apea mai le Afioga a le Atua, "Auā o lenei lava le alofa o le Atua, ia tatou tausi i Āna poloa'iga" (I Ioane 5:3). Ma "O sē fa'apea, Ua 'ou iloa o Ia, a e lē tausi e ia Āna poloa'iga, o le pepelo lava lea, e lē o i totonu iā te ia le 'upu moni" (I Ioane 2:4). E na'o le fa'atuatua o le a mafai ona tatou 'au'aumea fa'atasi ai i le alofa tunoa o Keriso, e mafai ai e tatou ona usiusita'i, a e lē o le fa'asa'olotoina o le tagata ia lē usita'i.

(9) O LE Ā SE FA'ASINOGA O LE ALI'I I LO TATOU 'AU'AUNAGA?

Tou te iloa i latou i o latou fua. Pe tau mai ea tagata se fuifui vine mai le la'au

*tuitui, po o mati mati mai le la'au
talatala?...O lea fo'i tou te iloa ai i
latou i o latou fua. Mataio 7:16, 20*

Mau e Tau i ai: Luka 6:43-45; Ioane
15:4-7; Iakopo 3:12

E tatou te lē maua le fa'aolataga e
ala i lo tatou usiusita'i; ona o le
fa'aolataga o le meaalofo maua fua a le
Atua, e tatau ona talia e ala i le
fa'atuatua. A e o le usiusita'i o le fua lea
o le fa'atuatua. "Ua outou iloa fo'i na
fa'aalia o Ia ina ia 'ave'eseina e Ia a
tatou agasala; e lē o iā te Ia fo'i se
agasala. E lē agasala se tasi o ē tumau iā
te Ia; o sē agasala ua lē va'ai o ia iā te
Ia, ua lē iloa fo'i o Ia e ia" (I Ioane 3:5,
6). O le tofotofoga moni lenei. Pe afai e
tatou te mafuta iā Keriso, pe afai o lo'o i
ai le alofa o le Atua i totonu o i tatou, o
tatou lagona, o tatou mafaufauga, o
fuafuāga, o tatou gaoioiga, o le a ō
gatasi ma le finagalo o le Atua e fa'apei
ona fa'ailoa mai i 'upu fa'atonu o Lana
tulafono pa'ia. "Le fanau e, 'aua ne'i
fa'asesē se tasi iā te outou; o lē e fai le
amiotonu, o le amiotonu lea, fa'apei ona
amiotonu o Ia" (I Ioane 3:7). O le
amiotonu e fa'amaninoina e ala i le
tapula'a o le tulafono pa'ia a le Atua, e
pei ona fa'amatalaina i fa'atonuga e
sefulu na tu'uina mai i Sinai.

**(10) O Ā MEA TĀUA E LUA E
TATAU ONA I AI TUTUSA I O
TATOU OLAGA INA UA TU'UINA
O TATOU LOTO I LE ATUA?**

*E fa'apea fo'i le fa'atuatua, pe afai e lē i
ai se galuega, e mate lava ia ua na o ia.*

Iakopo 2:17

Mau e Tau i ai: Iakopo 2:14, 19, 20, 26; I Tesalonia 1:3; I Timoteo 1:5; II Peteru 1:5-9; Kalatia 5:6; II Tesalonia 1:11; Efeso 2:8-10

O le fa'atuatua iā Keriso ua ta'ua mai e fa'a'apea o le a fa'asa'olotoina tagata mai le una'iga ia usita'i i le Atua, e lē o se fa'atuatua moni a e o le tapāfua a e lē tatau. "O le alofa tunoa ua fa'aolaina ai outou i le fa'atuatua" (Efeso 2:8). Ae peita'i "o le fa'atuatua e mate pe a leai ni galuega" (Iakopo 2:26). Na fetalai Iesu e uiga iā te Ia a e le'i afio mai i le lalolagi, "Lo'u Atua e, 'Ou te fiafia e fai Lou finagalo; o lo'o i totonu lava iā te A'u Lau tulafono" (Salamo 40:8). Ma ina ua lata ona afio a'e o Ia i le lagi, na fa'a'apea mai, "Na 'Ou tausia poloa'iga a Lo'u Tamā, ma 'Ou tumau i Lona alofa" (Ioane 15:10). Ua ta'u mai e le Tusi Pa'ia, "O le mea lea e tatou iloa ai ua tatou iloa o Ia pe afai tatou te tausi i Āna poloa'iga....O lē e fa'a'apea o lo'o tumau ia i totonu iā te Ia, e tatau ona savali lenā tagata fa'a'apei ona savali o Ia" (I Ioane 2:3-6).

**(11) O AI LE FA'AA'OA'O E
TATAU ONA TATOU
MULIMULITA'I I LE
FA'ATINOGA O LO TATOU
FA'ATUATUA MA LE OLAGA O
LE 'AU'AUNA ATU?**

Auā na vala'auina outou ona o lea lava mea; auā na tigāina Keriso lava o le sui o outou, ua tu'uina mai ai e Ia le fa'aa'oa'o mo outou, ina ia outou

mulimuli atu i Ōna tulaga'a'ao. I Peteru 2:21

Mau e Tau i ai: Mataio 10:38, 39; Salamo 85:13; Efeso 5:1, 2; Filipi 2:4, 5; I Ioane 2:3-6; 3:16-18; Luka 9:23, 25; Eperu 12:1, 2

(12) O LE Ā LE UIGA FA'APITOA E TATAU ONA TATOU SA'ILIA MA O LO'O FOLAFOLA MAI E KERISO MO LATOU UMA E FIA 'A'AI MA FIA INU I AI?

Amuia ē fia 'a'ai ma fia inu i le amiotonu, auā e ma'o'ona i latou.
Mataio 5:6

Mau e Tau i ai: Filipi 1:6; 3:9, 12-14; Fa'ata'oto 15:9; I Timoteo 6:11; II Timoteo 2:22

O le tulaga o le ola e fa'avavau o lo'o i ai pea e pei lava ona i ai i taimi uma,- fa'apei ona i ai i Parataiso a e le'i pa'u'ū o tatou ulua'i matua,- o le usiusita'i ato'atoa i le tulafono a le Atua, o le amiotonu e ato'atoa. Pe ana fai e tu'uina mai le ola e fa'avavau i se isi tapula'a e maulalo ifo i lo o lenei, o le a fa'amalaiaina loa le tulaga fiasia o le lalolagi atoa. O le a tatalaina le ala mo le agasala, ma o ōna puapuagā ma fa'anoanoāga uma, o le a mānu a'e e fa'avavau.

(13) O LE Ā LE AVANOA TĀUA O LO'O OFOINA MAI E LE ATUA MO I TATOU TA'ITO'ATASI?

Ona o lea ua Ia folafolaina mai ai o mea e silisili 'ese lava ma le aogā, ina

*ia tofusia fa'atasi ai outou i le amio
Atua, ina ua sosola 'ese outou i le amio
leaga o i le lalolagi i le tu'inanau.*

II Peteru 1:4

Mau e Tau i ai: Esekielu 36:25-27; II Korinito 3:18; 6:17, 18; Efeso 4:23, 24; Eperu 8:10-12; 12:10; Ioane 1:12, 13; Kolose 3:10

**(14) O LE Ā LE MEAALOFA E
LUA ONA VAEGA UA SAUNIA E
ALA I LE TOTO O KERISO MA E
TU'UINA MAI AI LE AMIOTONU,
E ALA I LONA ALOFA TUNOA?**

*O Ia fo'i ua tatou maua ai le togiola i
Lona toto, o le fa'amagaloina o
agasala, e tusa ma le 'oloa faula'i o
Lona alofa tunoa. Efeso 1:7*

Mau e Tau i ai: Kolose 1:14; I Korinito 1:30; Roma 3:24-26; Eperu 9:12-15; 10:16-19; I Peteru 1:18, 19; I Ioane 2:2; 4:10; Fa'aaliga 5:9; Salamo 130:7

Sa mafai lava e Atamu, i le taimi a e le'i pa'ū, ona maua se uiga amiotonu e ala i le usiusita'i i le tulafono a le Atua. A e peita'i sa ia lē faia fa'aapea, ma ona o lana agasala o tatou uiga moni ua pa'ū fo'i ma e lē mafai e i tatou ona fai fa'aamiotonu i tatou lava ia. Ona o tatou e agasala, e lē pa'ia, e lē mafai ona tatou tausi ato'atoa le tulafono pa'ia. E leai so tatou amiotonu o le a mafai ai ona fetaia'i ma fa'atonuga aiā o le tulafono a le Atua. A e na faia e Keriso se ala e fa'asa'oloto ai tatou. Na afio mai o Ia ma mau i totonugalemū o tofotofoga ma fa'aosoosoga uma fa'apei lava ona

feagai ma i tatou. Na Ia soifua i se soifuāga e lē agasala. Sa maliu o Ia mo i tatou, ma o nei ua ofo mai ia Ia 'ave'esea a tatou agasala ma tu'u iā i tatou Lona lava amiotonu. Afai e te tu'uina atu 'oe iā te Ia, ma talia o Ia e fai ma ōu Fa'aola, e ui ina o 'oe o se tagata e matuā agasala lava, o le a faitauina 'oe e amiotonu ona o Lona suafa. O uiga o Keriso o le a tū mai e sui ai lou uiga, ma o le a talia 'oe i luma o le Atua fa'apei o se tagata e le'i i ai lava se agasala.

(15) INA UA TOE FANAUFUINA I TATOU IĀ KERISO, E FA'APEFEA ONA FA'AAUAU ONA TATOU MAFUTA MA LE TUPUTUPU A'E PEA IĀ TE IA?

*Ua fa'asatauroina fa'atasi i ma'ua ma Keriso; a e 'ou te lē toe ola a'u, a o Keriso i totonu iā te a'u; o le ola fo'i 'ou te ola ai nei ile tino, 'ou te ola ai lava i le fa'atuatua i le Alo o le Atua, o Lē na alofa mai iā te a'u ma foa'iina mai o Ia e Ia e fai mo'u sui. **Kalatia 2:20***

Mau e Tau i ai: Roma 1:17; 5:2; I Peteru 1:5-9; II Korinito 1:24; 5:7; Eperu 12:2; 11:6

E suia e Keriso le loto o le tagata. E tumau o Ia i lou loto e ala i le fa'atuatua. E tatau iā te 'oe ona feso'ota'i pea ma Keriso e ala i le fa'atuatua, ma ia tu'u atu pea lava lou loto iā te Ia; ma a e faia pea lea mea, o le a galue o Ia i totonu i a te 'oe ona e loto ai lea ma faia mea e fa'afiafia ai o Ia. o le a e fa'aapea ane loa, "O le ola fo'i 'ou te ola ai nei i le tino, 'ou te ola ai lava i le fa'atuatua i

le Ālo o le Atua, o Lē na alofa mai iā te a'u, ma foa'iina mai o Ia e Ia e fai mo'u sui." Na fetalai atu Iesu i Ōna so'o, "E lē o outou e tautala atu ai, a o le Agaga o lo outou Tamā e tautala mai ai i totonu iā te outou" (Mataio 10:20). A galue loa Keriso i totonu iā te 'oe, o le a e fa'atinoina le agaga lava lea e tasi ma faia galuega lelei o le amiotonu, o le usiusita'i lea.

E leai se mea o lo'o iā i tatou o le a tatou mitamitavale ai. E leai so tatou tulaga ia fa'avi'ia ai lava tatou ia. E pau lo tatou fa'amoemoe e i le amiotonu o Keriso ua tu'uina iā i tatou, ma o lea o lo'o galuea'iina i totonu o i tatou e ala i Lona Agaga ma e ui atu ai mai iā i tatou.

(16) O LE Ā LE FA'AMATALAGA I LENEI FUAI'UPU UA FA'AILOA MAI AI LE 'ESE'ESEGA O LE FA'ATUATUA MA LE TALITONU?

Ua e talitonu e to'atasi lava le Atua; ua lelei lava lea; ua talitonu fo'i temoni ma latou tetemū. Iakopo 2:19

Mau e Tau i ai: Iakopo 2:20; Mataio 8:29; Luka 4:34; Galuega 19:15; I Peteru 1:5

Pe a tatou tautala e fa'atatau i le fa'atuatua, e i ai se 'ese'esega e tatau ona mafaufau i ai. E i ai se itu'aiga talitonuga e matuā 'ese mai le fa'atuatua. O le fa'amaoniga ma le mana o le Atua soifua, o le fa'amaoni o Lana Afioga, o fa'amaoniga ia e o'o lava iā Satani ma āna 'au e lē mafai ona latou te'ena, a e lē o le fa'atuatua lea. Afai e lē o i ai na o le

talitonu i le Afioga a le Atua, a e o lo'o tu'u atu le loto iā te Ia; pe a o gaua'i atoa le loto iā te Ia, o fa'anaunauga uma ua fa'atumau i Ōna luga, ona i ai lea o le fa'atuatua - le fa'atuatua e galuea'iina mai le alofa ma e fa'amamāina ai le agaga. E ala mai lea fa'atuatua, o le loto o le a fa'afouina i le fa'atusa o le Atua. Ma o le loto e lē o i se tulaga e fa'afouina ai, o le a lē i lalo o le tulafono a le Atua, ma e lē mafai lava, e lē mafai nei fo'i ona fa'afiafiaina i Ōna fa'avae, a e fa'apea mai fa'atasi ma le faipese, "Ua tele lo'u naunau i Lau tulafono!..." (Salamo 119:97). Ma o lo'o fa'ataunu'uina iā i tatou le amiotonu o le tulafono, "o ē lē savavali i la le tulafono, a e lā le Agaga" (Roma 8:1).

(17) E FA'APEFEA LE UMI O LE A FA'AAUUAU AI PEA E KERISO LE GALUEGA O LE FA'AMAMĀINA O A TATOU AMIO?

Ua ou mautinoa lenei lava mea, o Ia na amataina le galuega lelei i totonu iā te outou, e fa'aato'atoaina ai lava e Ia e o'o atu lava i le aso o Iesu Keriso.

Filipi 1:6

Mau e Tau i ai: Eperu 12:2; 13:20, 21; Filipi 2:13; Salamo 138:8; I Tesalonia 5:23, 24; I Peteru 5:10; I Korinito 1:8, 9; II Korinito 9:8

E i ai i latou ua iloa le alofa fa'amagalo o Keriso ma ua fa'anaunau e 'avea ma fanau a le Atua, peita'i e iloa e lē o ato'atoa o latou uiga, o latou olaga e lē sa'osa'o, ma e i ai le masalosalo pe ua

fa'afouina o latou loto e ala i le Agaga Pa'ia. Mo i latou ia ou te fa'apea atu, 'Aua ne'i fo'i i tua i le atuatuvaale. O le a tatou ifo atu pea ma le tagi i a'ao o Iesu ona o a tatou sesē ma vaivaiga, a e lē tatau ona tatou fa'alotovaivai ai. E tusa lava pe afai ua fa'ato'ilalo i tatou e le fili, e lē o lafoa'i 'ese, lē tu'ulafoa'iina pe te'ena i tatou e le Atua.

(18) PE AFAI TATOU TE TOE PA'Ū A O FAIA PEA LENEI GAOIOIGA O LE FAUSIA O LE AMIO E TUMAU O LE OLAGA ATOA, O LE Ā SE FOLAFOLAGA OFOFOGIA E MAFAI ONA TATOU TAPAINA?

Si a'u fanau e, 'ou te tusi atu nei mea iā te outou, ina ne'i agasala outou; pe afai fo'i e agasala se tasi, o iā te i tatou le fautua i luma o le Tamā, o Iesu Keriso lea, o Lē amiotonu. I Ioane 2:1

Mau e Tau i ai: Roma 8:34; I Timoteo 2:5; Eperu 7:24, 25; 9:24

O Keriso o lo'o i le 'a'ao taumatau o le Atua, o Ia fo'i e fautua mo i tatou. Ma ia 'aua ne'i galo le fetalaiga a Keriso, "E alofa mai lava le Tamā iā te outou" (Ioane 16:27). O lo'o naunau lava Ia e toe fa'afo'i outou iā te Ia, ia va'aia Lona lava tulaga mamā ma le pa'ia ua fa'aātaina mai iā te outou. Afai tou te tu'u atu outou outou ma gaua'i iā te Ia, o Ia Lē na amataina le galuega lelei iā te outou, o le a tau'aveina mea uma aga'i i luma i le aso o le Ali'i o Iesu Keriso. Ia tatalo e lē aunoa; ia matuā talitonu ma le ato'atoa. Ona ua tatou lē

toe talitonu i lo tatou lava malosi, ia tatou fa'atuatua i le mana o lo tatou Fa'aola, ma o le a tatou fai vi'iga iā te Ia le pogai o le soifuamaua o lo tatou to'afilemū.

**(19) UA UMA ONA TOE
FANAUFUINA I TATOU MA UA
AMATA ONA TUPUTUPU A'E; O
LE Ā LE MEA O LE A TATOU
ILOAINA NEI?**

*O i matou nei e tusa ma le mea leaga i matou uma; o a matou amiotonu uma e tusa ia me le 'ie o le ma'i; ua mamae i matou uma e pei o le lau la'au, o a matou amiolētonu e pei o se matagi ua lelea ai i matou. **Isaia 64:6***

Mau e Tau i ai: Isaia 53:6; Failauga 7:20; Iopu 15:16; Efeso 2:1-3; Salamo 51:5; 130:3; Roma 7:18, 24; 3:23; I Ioane 1:8; Ioane 15:5

Ona e fa'amaninoina lau va'ai pe a e sau latalata iā Iesu, o le a iloa e ōu lava mata ōu sesē, ma o ōu lē ato'atoa o le a manino mai pe a fa'atusatusa atu i Lona uiga e matuā ato'atoa. O lea le fa'amaoniga o taofisesē a Satani ua leai se malosi; a e o le mana fa'afou a le Agaga o le Atua ua fafaguina ai 'oe.

O le alofa loloto mo Iesu o le a lē mafuta i le loto e lē iloa lona uiga agasala. O le agaga ua suia e ala i le alofa tunoa o Keriso o le a mata'ia fiafia Lona uiga Atua; a e afai tatou te lē iloa lo tatou uiga leaga, o lea le fa'amaoniga o tatou e le'i va'aia le matagofie ma le silisili'ese o Keriso.

A fa'aitiitia o tatou manatu iā i

Ou te filifili, e ala i le alofa tunoa, e savali i tulaga'a'ao o Keriso ma mulimuli iā te Ia o lo'u Matai. O la'u tatalo ia va'aia i lo'u olaga fua o Lona Agaga ina ia mafai ona ou fa'aalia Lona uiga e amiotonu ma le pa'ia.

[illegible]



Lesona 9

O le Tupu A'e Fa'ale-Agaga

**(1) A O FA'APEI O TAMA
MEAMEA IĀ KERISO, O LE Ā LE
FA'ANAUNAUGA E TATAU ONA I
A I TATOU INA IA MAFAI ONA
FA'ATUPU A'E AI PEA LA TATOU
VĀ FEALOA'I MA KERISO?**

*E fa'apei o tama meamea fa'ato'ā fanau
mai ia naunau outou i le suāsusu e lē
suia o le 'upu, ina ia outou tutupu ai. I
Peteru 2:2*

Mau e Tau i ai: I Peteru 1:23; Salamo
19:7; I Korinito 3:1, 2; Eperu 5:12, 13

O le suiga o le loto e 'avea ai i
tatou ma fanau a le Atua o lo'o ta'u mai i
le Tusi Pa'ia o le fanauga mai. Ua toe
fa'atusaina i le tuputupu a'e o le fatu
lelei sa totōina e le fai fa'ato'aga. E
fa'apea fo'i i latou sa fa'ato'ā liua iā

Keriso, "e fa'apei o tama meamea" (I Peteru 2:2), a e "ia tutupu i tatou" i le maua luga o ali'i ma tama'ita'i iā Keriso Iesu (Efeso 4:15). Pe e fa'apei o le fatu lelei sa totōina i le fanua, o le a ola ma tupu a'e ma fua mai. Ua fa'apea mai Isaia, "e igoa i latou, o la'au o le amiotonu, o le fa'ato'aga a le Ali'i, e fai Mona vi'iga" (Isaia 61:3). E mai le uiga moni o le olaga, ua tu'u mai fa'ata'ita'iga manino e fesoasoani ina ia tatou malamalama atili ai i mea lilo moni o le ola fa'aleagaga.

E lē mafai e le poto ma le atamai atoa o le tagata ona faia fa'aola se mea e aupito itiiti lava sa foafoaina. E na'o le ola na tu'uina mai e le Atua lava ia o le a mafai ai ona ola se manu po o se la'au. O le ola fo'i lea mai le Atua o le a maua ai i le loto o le tagata le ola fa'aleagaga. A lē ua "fanau mai lugā" se tagata, e lē mafai e ia ona tofusua i le ola na tu'uina mai e Keriso ina ua afio mai i le lalolagi (Ioane 3:3).

(2) AISEĀ E LĒ MAFAI AI ONA FA'APOGAI E TATOU LAVA IA LO TATOU TUPUTUPU A'E FA'ALEAGAGA?

A e lē talia e le tagata fa'aletino o mea a le Agaga o le Atua; auā o mea valea ia iā te ia, na te lē mafai fo'i ona iloa, a uā e fa'amasinoina fa'aleagaga. I Korinito 2:14

Mau e Tau i ai: I Korinito 1:18, 23, 25, 27; Mataio 13:11; Ioane 3:6; Roma 8:5-8

O le ola e fa'apei fo'i o le tuputupu a'e. O le Atua e aumaia le tatupu ia

fuamatala ma i'u ai i le fuāla'au e 'aina. Ma o Lona mana e fa'atupuina ai le fatu, "e muamua ōna lau, ona o'o lea i lona fuga mai, mulimuli ane fo'i ua i ai saito matua" (Mareko 4:28). Ua fa'apea le perofeta o Hosea e fa'atatau iā Isara'elu, "e fuga mai o ia e pei o le susana." Ma "e toe ola mai i latou e pei o saito, e fua mai e pei o le vine" (Hosea 14:5, 7). Sa fetalai Iesu mo i tatou ina "Ia outou mafaufau i lautalotalo pe fa'apefea ona tupu" (Luka 12:27). O la'au ma fugāla'au e lē tutupu a'e i so latou lava taumafaiga po o le tausiga mai iā i latou lava ia, a e ala i mea e tu'uina mai i ai e le Atua mo le tausiga o latou olaga. O le tamaitiiti fo'i e lē mafai, e ala i sona taumafaiga po o se malosi mai iā te ia lava, ona fa'aopoopo i lona tupu maua luga. E fa'apea fo'i iā te 'oe e lē mafai ona e tupu a'e fa'aleagaga e ala i so'o sau taumafaiga mai iā te 'oe lava.

(3) O Ā MAFUAGA E LUA O MEA 'AI E MANA'OMIA MO LE TUPUTUPU A'E O SE LA'AU MA E FA'AAOGĀ FA'AFA'AILOGA I NEI FUAU'UPU E FA'ASINO I LE MANA O LE ALI'I E PULEA AI LO TATOU TUPU A'E FA'ALEAGAGA?

Auā o le Ali'i le Atua o le lā lava ia ma le talitā; e foa'iina mai e le Ali'i le alofa tunoa ma le manuia; e lē taofia e Ia se mea lelei iē ua sa'o lo latou savavali.

Salamo 84:11

*E 'avea A'u ma sau iā Isara'elu; e fuga mai o ia e pei o le susana, e sosolo ōna a'a e pei o Lepanona. **Hosea 14:5***

Mau e Tau i ai: Malaki 4:2; Mika 5:7; Ioane 1:9-12; 8:12; Fa'aaliga 21:23; 22:17

O le la'au, o le tamaitiiti fo'i, e tuputupu a'e ona o lo'o maua mai ōna si'osi'omaga mea e mana'omia mo le ola - o le ea, susulu o le lā, ma mea 'ai. O nei mea uma o meaalofo mo manu ma la'au mai Lē na foafoaina i latou, e fa'apea Keriso mo i latou e fa'atuatua iā te Ia. O Ia o lo latou "malamalama e fa'avavau" (Isaia 60:19), ma "E alu ifo Ia e pei o le ua i le mutia ua seleseleina" (Salamo 72:6). O Ia o le vai o le ola, "O le Areto a le Atua...ua alu ifo mai le lagi lea, ma aumai le ola i le lalolagi" (Ioane 6:33).

Ina ua tu'uina mai Lona Ālo o le meaalofo e lē mafa'atusaina, ua si'omia e le Atua le lalolagi atoa i se savilito'a o le alofa tunoa e pei lava o le ea o lo'o fa'atumulia ai le lalolagi. O i latou uma e filifili e mănāvaina lenei ea fa'aola o le a ola ma tutupu a'e i le maualuga o ali'i ma tama'ita'i e iā Keriso Iesu.

E fa'apei ona taliu le fugāla'au aga'i i le lā, ina ia fa'a'ato'atoa lona matagofie mai 'ave pupula, ia fa'apea le tatau ona tatou fāliu atu i le Lā o le Amiotonu, ia mafai ona fa'asusuluina i o tatou luga le malamalama o le lagi, ma o le a mafai e la tatou amio ona tupu a'e i le fa'atusa o Keriso.

**(4) E FA'APEFEA ONA MAFAI
LE TUPUTUPU A'E PEA O I
TATOU IĀ IESU MA TAU'AVE
FUA LELEI?**

O A'u nei o le vine, o lā outou. O lē

tumau iā te A'u, ma A'u iā te ia, o ia lava e fua tele mai; auā e lē mafai e outou ona fai o se mea e tasi pe a A'u lē i ai. Ioane 15:5

Mau e Tau i ai: Ioane 15:4-7; Kolose 2:6; Roma 6:22; Salamo 91:1; Ioane 14:16

O lo'o a'oa'o mai Iesu e te mana'omia e fa'alagolago pea iā Keriso ina ia ola ai i se olaga e fa'apa'iaina, fa'apei o le lālā e fa'alagolago i le pogaila'au ia tuputupu a'e ma fua lelei mai ai. E te lē ola pe a vavae'ese mai iā te Ia. E leai sou malosi e tete'e ai fa'aosoosoga po o le tupu a'e i le alofa tunoa ma le fa'apa'iaina. A mafuta ma Ia ona e olaola lelei ai lea. Pe a tō mai lou ola mai iā te Ia, o le a e lē mamae atu pe lē fua mai. O le a fa'apei 'oe o le la'au na totō i tafatafa o vaitafe lemū.

(5) O AI LE POGAI O LO TATOU FA'ATUATUA MA E FA'APEFEA ONA TUPUTUPU A'E A O FA'AGASOLO LA TATOU SAVALIGA FA'AKERISIANO?

Ia va'ava'ai atu iā Iesu o Lē na te ta'ita'iina ma Lē na te fa'aato'atoaina le fa'atuatua; o Lē na onosa'i i le satauro, na fa'atauva'a iā te Ia le mā, ona o le oli'oli sa tu'u i Ōna luma, ua nofo fo'i o Ia i le itu taumatau o le nofoali'i o le Atua. Eperu 12:2

Mau e Tau i ai: Efeso 2:8; Luka 17:5; Mika 7:7; Eperu 2:10; Isaia 8:17; 45:22

E to'atele ua manatu e tatau ona

faia e na'o latou lava se vaega o le galuega. Ua latou talitonu iā Keriso mo le fa'amagaloina o agasala, a e o lea ua sa'ili e ala i a latou lava taumafaiga ia ola ai i se olaga e agatonu. A e peita'i o nei taumafaiga uma e lē manuia. Ua fetalai Iesu, "E lē mafaia e outou ona fai o se mea e tasi pe a A'u lē i ai" (Ioane 15:5). O lo tatou tupu a'e i le alofa tunoa, o lo tatou fiafia, o lo tatou aogā,- e fa'alagolago uma lava i le tatou so'otaga ma Keriso. E ala fo'i lea i le feso'ota'iga ma Ia i aso ta'itasi ma itulā uma,- pe a mafuta ma Ia,- o le a tatou tuputupu ai pea i le alofa tunoa. O Ia e lē na'o le Amataga, a e o le I'uga o lo tatou fa'atuatua. O Keriso lava e muamua ma e mulimuli ma e fa'avavau. E tatau ona i ai o Ia ma i tatou i le amataga ma le fa'ai'uga o la tatou gasologa, atoa ma la'asaga uma o lo tatou ala. Ua fai mai Tavita, "'Ou te tu'u le Ali'i i o'u luma e lē aunoa; auā o i lo'i itū taumatau o Ia, e lē fa'agae'etia ai lava a'u" (Salamo 16:8).

(6) E FA'APEFEA ONA TUMAU PEA LA TATOU MAFUTAGA MA KERISO?

O lenei, fa'apei ona outou talia o le Ali'i Keriso Iesu, ia savavali ai outou o iā te Ia. Ia maua'a outou ma ia atina'e iā te Ia, ma ia fa'atumaui i le fa'atuatua, fa'apei ona a'oa'oina outou, ia fa'atele i ai ma le fa'afetai.

Kolose 2:6, 7

Mau e Tau i ai: Kolose 1:30; I Ioane 5:11, 12, 20; Ioane 14:6; II Korinito 5:7

Ia fa'apei o le taimi muamua lava

na e maua ai Keriso; "E ola lē amiotonu i le fa'atuatua" (Eperu 10:38). Na e tu'u atu atoa 'oe lava i le Atua, e 'au'auna ma le usiusita'i iā te Ia, ma e 'avea Keriso e fai mou Fa'aola. E te lē mafai e 'oe lava ia ona fai se togiola mo au agasala pe suia lou loto; a e ina ua tu'uina atu 'oe i le Atua, ua e talitonu e Na te faia nei mea uma mo 'oe ona o le sua fa o Keriso. E ā Keriso 'oe, e ala i le fa'atuatua, ma e ala i le fa'atuatua e tatau ona e tupu a'e iā te Ia - ia e avatu ma e aumai. E tatau ona e tu'u atu mea uma, - o lou loto, lou mafaufau, ma lau tautua, - tu'u atu 'oe iā te Ia ia e usiusita'i i Ōna mana'oga uma; ma e tatau ona e talia mea uma, - o Keriso, o le atoāga o fa'amanuiāga uma, ia mafuta Ia i lou loto, e 'avea ma ōu malosi, o lou amiotonu, o lau fesoasoani e fa'avavau, - ina ia tu'uina iā te 'oe le mana e usiusita'i ai.

**(7) AISEĀ E MATUĀ TĀUA AI
LE SA'ILI O LE ALI'I MA LONA
ATAMAI MO O TATOU OLAGA I
LE AMATAGA O ASO TA'ITASI
UMA?**

'Ou te alofa atu iā i latou o ē alofa mai iā te A'u; o ē sa'il'ili mai fo'i iā te A'u, latou te maua A'u.

Fa'ata'oto 8:17

Mau e Tau i ai: Salamo 143:8-10; 91:14-16; II Korinito 3:18; Mataio 5:6; 6:33; 7:7-11

Ia fa'apa'iaina 'oe mo le Atua i le taeao; ia 'avea lea ma āu galuega muamua o le aso. Ia fa'aapea lau tatalo,

"Le Ali'i e, ia e 'avea a'u e fai Mou. Ou te fa'ata'atia a'u fuafuāga uma i Ōu 'a'ao. Fa'aaogā a'u i Lau galuega i le asō. Mafuta ma a'u ina ia 'avea a'u galuega uma lava ia aogā mo 'Oe." O lenei le mea e tatau mo aso uma. Ia fa'apa'iaina 'oe i le Atua i taeao o aso ta'itasi. Tu'u atu āu fuafuāga uma iā te Ia, o le a Ia fa'aailoa mai pe e fa'agaoioi po o le a tu'u'ese. Atonu o le a e tu'u atu lou ola i 'a'ao o le Atua i lea aso ma lea aso, ma o le a fafauina pea lou olaga e tusa ma le soifuāga o Keriso.

(8) O LE Ā LE ALA E MAFAI AI ONA TUMAU LE FILEMŪ I O TATOU LOTO?

E te leoleoina ia fīfilemū lava lē ua mausalī lona loto; auā ua ia fa'atuatua iā te 'Oe. Inā fa'atuatua ia outou i le Ali'i e fa'avavau lava; auā o le Ali'i le Atua, o le papa e fa'avavau Ia. Isaia 26:3, 4

A o i tatou uma, o lo'o va'ava'ai i tatou i le pupula o le Ali'i e peiseā'ī o i se fa'aata ma o tatou mata, e lē ufitia, ua liua ai i tatou ua foliga i ai nai le pupula e o'o i le pupula, fa'apei ona mai le Ali'i le Agaga. II Korinito 3:18

Mau e Tau i ai: Roma 5:1; Isaia 57:19-21; Ioane 14:27; 17:3; Efeso 2:14-16

O le ola e iā Keriso o se olaga lea e filemū. Atonu e leai se lagona e mālīe, a e tatau ona i ai se mapusaga filemū ma e fa'afiafia loto. O lou fa'amoemoe e iā Kerisolea, a e lē o 'oe lava ia. O lou vaivaiga o le a feso'ota'i atu i Lona

malosi, o lou pouliuli i Lona atamai, o lou tino vaivai i Lona mana e lē gata. O lea ia e lē va'ai ai iā te 'oe lava, ia lē manatu pea iā te 'oe, a e ia tepataula'i iā Keriso. Ia mafuta pea lou loto i Lona alofa, i le matagofie, i le ato'atoa o Lona uiga. O Keriso i Lona lē fa'apito, Keriso i Lona fa'alumaina, Keriso i Lona tulaga mamā ma le pa'ia, o Keriso i Lona alofa e lē mafa'atusaina - o lea le autū mo manatunatuga loloto o le agaga. E ala i le alofa iā te Ia, fa'ata'ita'i iā te Ia, fa'alagolago atoa iā te Ia, o le a suia ai 'oe ia fa'apei o Ia.

(9) O LE Ā LE VALA'AU UA TU'U MAI E KERISO MO LE FANAU A TAGATA?

*Ia outou ō mai iā te A'u, outou uma o ē tigāina ma mafatia i 'avega, o A'u fo'i e malolo ai outou. **Mataio 11:28***

Mau e Tau i ai: Mataio 11:29; Ieremia 6:16; Isaia 28:10-12; 48:17, 18; Salamo 94:11-13; 116:7-9; Fa'aaliga 22:17; Eperu 4:1-9; Ioane 6:37; 7:37, 38

Ua fetalai Iesu, "Ia mafuta iā te A'u." O nei 'upu e fa'ailoa ai le manatu i le tulaga e malōlō, tumau, ma le mautinoa. O lenei lava manatu ua fa'aalia mai fo'i e le faipese, "Ia e fa'alologo i le Ali'i, ma fa'amoemoe iā te Ia" (Salamo 37:7). Ma ua tu'u mai le ta'utinoga e Isaia, "O le filemū ma le fa'atuatua o lo outou malosi lea" (Isaia 30:15). E lē o le malōlō lenei e maua i le lē gaoioi; auā o i le vala'au a le Fa'aola le folafolaga o le malōlōga ma e aofia ai ma le vala'au ia galulue: "Ia

'outou amoina La'u amo,...ona maua lea e outou o le malōlōga" (Mataio 11:29). O le loto e malōlō ato'atoa iā Keriso o le a aupito fa'amaoni ma ma'elegā e galue mo Ia.

(10) O Ā AUALA E TOLU E FA'AAOGĀINA E SATANI INA IA TAUMAFAI E FA'ATAFA 'ESE I TATOU MAI LE SO'OTAGA MA LE MAFUTAGA MA KERISO?

O le loto popole i mea o lenei lalolagi, ma le pepelo o le 'oa, ma le tu'inanau i nisi mea, ua o'o atu i totonu o le loto, ua fetina'iina ai le 'upu, ona lē fua mai lava lea. Mareko 4:19

Mau e Tau i ai: I Timoteo 6:9, 10, 17; I Ioane 2:15-17; Luka 14:18-20; 21:34-46

Pe afai e nofomau le loto o le tagata iā te ia lava, o le a fa'aliliu'ese ia mai iā Keriso, le pogai o le malosi ma le ola. O le a taumafai ai pea Satani e fa'atosina 'ese mai le tagata mai le Fa'aola ma fa'alavelavea ai le so'otaga ma le feso'ota'iga o le agaga ma Keriso. O tu'inanau o le lalolagi, o mea o le olaga e popole ai ma fememēa'iga ma fa'anoanoāga, o le leaga o isi, po o ōu lava sesē ma le lē ato'atoa - o so'o se mea po o mea uma lava ia o le a ia sa'ili e fa'atosina 'ese ai le mafaufau. Ia 'aua ne'i fa'au'i'esea se isi e āna togafiti.

(11) E FA'APEFEA ONA MAFAI SA TATOU MALŌLŌGA I LE ILOA MAUTINOA UA TATOU MAUA LE OLA E FA'AVAVAU?

O lē o iā te ia le Alo, o iā te ia le ola; o lē e lē o iā te ia le Alo o le Atua, e lē o iā te ia le ola. Ua 'ou tusi atu nei mea iā te outou o ē fa'atuatua i le suafo o le Alo o le Atua, ina ia outou iloa ai ua iā te outou le ola e fa'avavau, ina ia outou fa'atuatua fo'i i le suafo o le Alo o le Atua. I Ioane 5:12, 13

Mau e Tau i ai: II Ioane 9; Ioane 17:2; 3:16-18; 10:28, 29; 1:12; 6:54-58; 15:4-6; Isaia 41:10

E to'atele o lo'o taumafai ma le fa'amaoni, ma o lo'o naunau ia ola mo le Atua, a e o le tele o taimi e ta'ita'iina i latou e Satani ia mafuta i o latou lava sesē ma vaivaiga, ma o lea, ona ua vavae'ese i latou mai iā Keriso ua fa'amoemoe ia o le a manumalō i o latou agaga. E lē tatau ona faia i tatou lava ma totonugalemū ma teu pea le atuatuvaletu ma le fefe po o le a fa'asaoina i tatou. O nei mea uma e fa'aliliu'ese ai le agaga mai le Pogai o lo tatou malosi. Ia tautala ma manatunatu iā Iesu. Ia i ai Ia iā te 'oe. Tu'u'ese masalosalo uma; Tuli'ese mea e te fefe ai. Ia e fa'aapea ma le aposetolo o Paulo, "Ou te lē toe ola a'u, a o Keriso o lo'o ola i totonu iā te a'u; o le ola fo'i 'ou te ola ai nei i le tino, 'ou te ola ai lava i le fa'atuatua i le Alo o le Atua, o Lē na alofa mai iā te a'u, ma foa'iina mai o Ia e Ia mo a'u" (Kalatia 2:20). Ia e malōlō i le Atua. E mafai e Ia ona teuina le mea ua e tu'u iā te Ia. Pe afai e te tu'uina atu 'oe i Ōna 'a'ao, e Na te aumaia 'oe e sili atu i lē ua manumalō, e ala iā te Ia Lē ua alofa iā te 'oe.

(12) O LE Ā LE MEA E TUPU I LĒ NA AMIOTONU A E UA FILIFILI E TOE FO'I I ALA AGASALA?

*A e afai e liliu 'ese lē ua amiotonu i
lana amiotonu, ma ua fai amio leaga,
ma ua fai e tusa ma mea uma e 'inosia e
faia e lē ua amio leaga, e ola ea ia? O
lana amiotonu uma na ia faia, e lē
manatua; o lana agasala ua ia agasala
ai, ma ona sesē ua ia sesē ai, ona o ia
mea e oti ai o ia. Esekielu 18:24*

Mau e Tau i ai: Esekielu 18:20-23;
3:20, 21; 33:12-19; I Samuelu 15:11;
Salamo 125:4, 5; II Peteru 2:20-22;
1:10; Eperu 10:29, 38, 39; 6:4-6

Ina ua 'avea e Keriso uiga
fa'aletagata, na Ia fusia le aigātagata iā
te Ia lava, e ala i le fusi o le alofa e lē
mafai lava ona motusia e so'o se malosi
vaganā le filifiliga a le tagata lava ia
(Eperu 10:29; Fa'ata'oto 28:18). E tu'u
mai pea e Satani mea fa'amailei ia
fa'atosina atu ai i tatou ia motusia lea
fusi - e filifili ia vavae'ese tatou mai iā
Keriso. O iinei e mana'omia ai ia tatou
mataāla, ia taumafai, ia tatalo ina ia leai
se mea e fa'atosina ai tatou e filifili se
isi ta'ita'i; auā e sa'oloto pea i tatou e
mafai ona filifili lea mea. A e peita'i ia
tumau pea la tatou va'ai iā Iesu, o le a Ia
fa'asao i tatou. Va'ai iā Iesu, e saogalemū
ai tatou. E leai se mea e mafai ona
to'esea i tatou mai Ōna 'a'ao. A o taula'i
pea lava pea iā te Ia, "ua liua ai i tatou
ua foliga i ai nai le pupula e o'o i le
pupula, fa'apei ona mai le Ali'i, o Ia o le
Agaga" (II Korinito 3:18).

**(13) PE A TATOU FA'ALOGO I LE
VALA'AU A KERISO, O LE A
FA'APEFEA ONA TATOU MAUA
O IA?**

*E sa'ili mai outou iā te A'u, tou te maua
fo'i, pe a outou sa'ili mai iā te A'u ma
outou loto atoa. **Jeremia 29:13***

Mau e Tau i ai: Jeremia 29:11-14;
Teuterenome 4:29-31; 30:2-6; Isaia
55:6, 7

Sa fa'aapea ona maua e 'au so'o
muamua le fa'atusa na pei o lo latou
Fa'aola pele. Ina ua fa'alogo i latou i
'upu a Iesu, na latou lagona le latou
mana'omia o Ia. Sa latou sa'ili, sa latou
maua, ma sa latou mulimuli iā te Ia. Na
fa'atasi i latou ma Ia i le fale, i le la'o'ai,
i le afeafe, i le fanua. Sa fa'atasi i latou
ma Ia o ni tagata o lo'o a'oa'oina ma le
faia'oga, sa maua mai Ōna laufofoga i
aso ta'itasi o a'oa'oga o le 'upu moni. Sa
latou vā'ai atu iā te Ia, e pei o 'au'auna i
lo latou Matai, ina ia a'oa'oina i la latou
galuega. O nei so'o o tagata ia "e tusa
ma i tatou" (Iakopo 5:17). Sa latou
tauina fo'i se taua ma le agasala. Sa
latou mana'omia le alofa tunoa fo'i lea e
tasi, ina ia mafai ona ola i se olaga e
fa'apa'iaina.

**(14) O LE Ā LE FA'AMATALAGA
I LENEI MAU E FA'AALI AI O
TAGATA O LE ATUA E FETAIA'I
FO'I LATOU MA
FA'AOSOOSOGA?**

*'Ou te lē faia o le mea lelei 'ou te loto i
ai, a o le mea leaga 'ou te lē loto i ai, o*

le mea lea 'ou te faia. Roma 7:19

Mau e Tau i ai: Kalatia 5:17; Iakopo 5:17; Salamo 119:5; Filipi 2:13; 1:6

E o'o fo'i iā Ioane le so'o pele, o lē na sili ona ātagia mai ai le fa'atusa o le fa'aola, sa le'i i ai i lona uiga moni lea amio matagofie. Sa le'i na'o lona fiasili ma le fia vi'ia, a e osovale ma māitaita pe a ua manu'a. A e peita'i ina ua fa'atinoina iā te ia le uiga o le Atua pa'ia, sa va'aia loa e ia lona lava tulaga lē atoa ma ua fa'amaulaloina ina ua malamalama i ai. O le malosi ma le onosa'i, o le mana ma le fa'apalepale, o le mamalu ma le agamalū sa ia vaa'ia i le soifuāga i aso ta'itasi o le Ālo o le Atua, na fa'atumulia ai lona agaga i le fiasia ma le alofa. O lona loto sa tosina atu iā Keriso i lea aso ma lea aso, se'i o'o ina ua mou'ese atu ia lava ona o le alofa mo lona Matai. O lona fiavi'ia ma le loto ita ua tu'u'esea ona ua gaua'i i le mana fa'aliua o Keriso. O le mana toe fa'afou a le Agaga Pa'ia ua fa'afouina ai lona loto. O le mana o le alofa o Keriso ua aumai ai se suiga o le amio. O le i'uga mautinoa lea o le so'otaga ma Iesu. Pe afai e mafuta Keriso i le loto, o le a suia ai le uiga moni atoa. O le Agaga o Keriso, o Lona alofa, e fa'amalūina ai le loto, e tu'u ifo ia fa'amaulalo le agaga, ma si'i a'e i luga mafaufauga ma fa'anaunauga ia aga'i i le Atua ma le lagi.

**(15) O LE Ā LE FOLAFOLAGA
OFOFOGIA NA TU'UINA E IESU
I ONA SO'O E
FA'AMAFANAFANA AI I LATOU**

A O AFIO A'E IA I LE LAGI?

Ia outou a'oa'o atu i a te i latouia tausī i mea uma ua 'Ou fai atu ai iā te outou; fa'auta fo'i, 'Ou te iā te outou i aso uma lava, e o'o lava i le gata'aga o le lalolagi. Mataio 28:20

Mau e Tau i ai: Ioane 14:3, 12, 16, 18, 26; Luka 24:50, 51; Isaia 41:10, 13

Ina ua afio a'e Keriso i le lagi, sa lagona pea e Ōna so'o Lona fa'atasi ai ma i latou. O se lagona e i ai i le tagata lava ia, e tumu i le alofa ma le malamalama. o Iesu le Fa'aola, o Lē sa femalagaa'i ma talanoa ma tatalo fa'atasi ma i latou, o Lē na fetalai i le fa'amoemoe ma le fa'amafanafanaga i o latou loto, ina o i ai pea le fea'u o le filemū i Ōna lafofoga, na 'ave a'e i le lagi mai iā i latou, ma o le leo o Lona si'ufogoga sa i ai pea ma i latou, a o talia o Ia e ao o agelu - "Fa'auta foi, 'Ou te iā te outou i aso uma lava, e o'o lava i le gata'aga o le lalolagi" (Mataio 28:20). Na afio a'e Ia i le lagi i le tino fa'aletagata. Sa latou iloa o Ia ua i luma o le nofoāli'i o le Atua, o Ia lava o lo latou Uō ma le Fa'aola; o Ōna tigāalofa e lē suia; o lo'o mātaulia pea Ia ma le aigātagata o lo'o puapuagātia. Ua Ia fa'aailoa i luma o le Atua le aogā o Lona lava toto tāua, fa'aali manu'anu'a o Ōna 'a'ao, o le fa'amanatuga o le tau na Ia totogiina mo Lana 'au fa'aolaina. Sa latou iloa ua afio a'e Ia i le lagi e sauniuni mea e nonofo ai i latou, ma o le a toe afio mai o Ia e 'ave a'e i latou ina ia fa'atasi ma Ia.

(16) E FA'APEFEA ONA MAFAI ONA FA'ATASI PEA IESU I LOTO O ŌNA SO'O?

*'Ou te fai atu fo'i i le Tamā, ona foa'i
mai ai lea e Ia iā te outou le tasi
Fesoasoani, ina ia tumau pea o Ia iā te
outou e fa'avavau. Ioane 14:16*

Mau e Tau i ai: Ioane 14:17, 23; 16:7-11, 13; 15:26; Roma 8:14-16

A o fa'apotopoto i latou ina ua mavae Lona afio a'e, sa naunau i latou e fa'aali o latou mana'oga i le Tamā e ala i le suafa o Iesu. Ma le fa'aaloalo tele, sa punonou ifo i latou i le tatalo, ua fa'amanatu le ta'utinoga, "O mea uma tou te ole atu ai i le Tamā i Lo'u igoa, e foa'i mai e Ia iā te 'outou. Ua o'o mai nei lava tou te le'i ōle atu i se mea i Lo'u igoa; inā ōle atu ia, ona 'outou maua ai lea, ina ia ato'atoa ai lo 'outou 'oli'oli" (Ioane 16:23, 24). Sa latou si'i a'e fa'amaualuga le lima o le fa'atuatua ma le fa'amatalaga e malosi lava, "O Keriso o Ia na maliu, a ua toe tū mai lava o Ia; o lo'o i le itu taumatau fo'i o le Atua, o lo'o fautua fo'i o Ia mo i tatou" (Roma 8:34). Ma na aumai iā i latou le Fesoasoani i le aso Penetekoso, o Lē na fetalai ai Iesu, " E i ai fo'i o Ia i totonu iā te 'outou" (Ioane 14:17). Ma na toe fa'aauau Lana fetalaiga, "E aogā iā te 'outou pe a A'u alu 'ese; auā afai 'Ou te lē alu 'ese e lē maliu mai le Fesoasoani iā te 'outou; a e afai 'Ou te alu 'ou te 'auina mai o Ia iā te 'outou" (Ioane 16:7). O le mea lea, e ala i le Agaga, O Keriso o le a mafuta i loto o Lana fanau. O la latou so'otaga ma Ia ua sili le

latalata i lo o le taimi a o fa'atasi Ia ma i latou i le tino. O le malamalama, o le alofa, ma le mana o le fa'atasi ai o Keriso o lo'o susulu e ala iā i latou, ina ia iloa mai i le va'aiga a tagata, "ua latou ofo ai; ma latou iloa fo'i o i latou sa latou fa'atasi ma Iesu" (Galuega 4:13).

**(17) O AI NISI NA TATALO
FA'APITOA AI KERISO E FA'APEI
FO'I ONA IA TATALO MO ŌNA
SO'O?**

*E lē fa'apito La'u tatalo mo i latou nei,
a o i latou fo'i e fa'atuatua i a te A'u ona
o la la tou 'upu. Ioane 17:20*

Mau e Tau i ai: Ioane 17:9; 16:26;
Eperu 7:25; 9:24; I Ioane 2:1, 2

O mea uma sa i le 'au so'o e fa'atatau iā Keriso, o lo'o Ia naunau ia i ai i Lana fanau i le asō; ona i lenā tatalo mulimuli lava, a o si'omia Ia e Ōna so'o, na tatalo Iesu mo i tatou; ma na Ia ōle mai ia tasi i tatou ma Ia, fa'apei ona tasi o Ia ma le Tamā. Oi se so'otaga fa'apenei! Sa fetalai le Fa'aola e uiga iā te Ia, "E lē mafai e le Atali'i ona fai se mea na o Ia lava" (Ioane 5:19), ma "O le Tamā o lo'o nofo i totonu iā te A'u, o Ia lava Na te faia Āna galuega" (Ioane 14:10).

**(18) PE AFAI TATOU TE TUMAU
IĀ TE IA I ASO TA'ITASI MA
GALULUE MA IA E ALA I LE
FA'ASOA ATU O LE 'UPU MONI
MA LE ALOFA, MATE O LE Ā LE
MEA O LE A I'U I AI?**

A ia amio fa'amaoni i le alofa, ia tutupu i tatou iā te Ia i mea uma, o le ūlu lava Ia, o IA fo'i Keriso. Efeso 4:15

Mau e Tau i ai: I Peteru 1:22; 2:2;
Ioane 15:5; I Ioane 3:18, 19, 22;
Fa'ata'oto 11:25

Pe afai o lo'o mafuta Keriso i o tatou loto, o le a galue Ia i totonu iā i tatou "ina ia 'outou loto i mea e finagalo malie ai o Ia ma ia 'outou galulue ai" (Filipi 2:13). O le a tatou galulue e pei ona galue o Ia; o le a tatou fa'atinoia lea lava agaga. O lea, pe a alolofa iā te Ia ma mafuta iā te Ia, o le a tatou "tutupu a'e iā te Ia i mea uma, o le ūlu lea, o Keriso lava lea."

Ou te iloa pe a ou sau iā Keriso, o le a amata ona ou tupu a'e ina ia galue ai o Ia i lo'u olaga atoa.

Li'o le tali: Ioe Lē mautonu

I le ma vā fealoa'i ma Keriso e leai se mea e mafai ona ou faia: po o le popole po o galuega, o le a mafai ai lo'u tuputupu a'e fa'aleagaga.

Li'o le tali: Ioe Lē mautonu

Ua ou filifili e fai la'u vaega ina ia sa'ili o Ia ma tu'u atu a'u i Lana si'osi'omaga ola ina ia fesoasoani mai ai Ia i lo'u tuputupu a'e.

Li'o le tali: Ioe Lē mautonu



Lesona 10

O le Galuega Ma Le Olaga

**(1) O LE Ā LE FA'AVAE
FA'ALELAGI UA FETALAI MAI
IESU IA TATOU MULIMULI I AI?**

*O le poloa'iga fou 'Ou te tu'u atu ai iā te outou, ia outou feālofani; fa'apei ona 'Ou alofa atu iā te outou, ia feālofani fo'i outou. **Ioane 13:34***

Mau e Tau i ai: I Ioane 4:7-12, 16, 21; 2:8-10; 3:14-18, 23; II Ioane 1:5, 6; Ioane 15:12, 13, 17; Levitiko 19:18, 34; Roma 12:10; Efeso 5:2; Iakopo 2:8; I Peteru 1:22

O le Atua o le pogai o le ola, o le malamalama, ma le fiafia o le atulaulau atoa. E fa'apei o 'ave malamalama mai le lā, pei o alāvai o lo'o tafe mai se vaipuna ola, e fa'aapea ona tafe o

fa'amanuiāga mai iā te Ia mo Āna meaola uma. Ma e so'o se mea e i ai le ola mai le Atua i loto o tagata, o le a fa'atafe atu fo'i i nisi i le alofa ma fa'amanuiāga.

Sa maua e lo tatou Fa'aola le fiafia i le si'itia a'e ma le togiolaina o le aigātagata ua pa'ū. Mo lenei mea, sa Ia lē fa'aapelepele i Lona lava soifua, a e na lavātia le satauro, ma lē amana'ia le fa'alumaina. O agelu o lo'o fa'aapea fo'i le galulue mo le fa'afiafiaina o isi. O lenei lo latou oli'olisaga. O le fa'atatau a ē loto fa'apito o lenei galuega e fa'atauva'a, o le 'au'aunaga mo i latou o mafatia ma e maulalo i so'o se itū matulaga, a e o le galuega lea e fai a agelu e lē o agasala. O le agaga alofa lē fa'apito o Keriso o le agaga lea ua fa'atumulia ai le lagi ma o le pogai loloto o lona fiafiāga. O lenei le agaga e i ai iā i latou e mulimuli iā Keriso, o le galuega o le a latou faia.

Pe a fa'asusuluina le alofa o Keriso i le loto, o le a pei o le mea manogi e lē mafai ona fa'aliloina. O lona uiga pa'ia o le a lagona e latou uma e tatou te tū lata i ai. O le agaga o Keriso i le loto e pei o se vaipuna i le toāfa, e tafe mai e fa'asūsū ai uma i latou ua matelāina, o lo'o naunau e feinu i le vai o le ola.

(2) AISEĀ NA AFIO MAI AI IESU I LE LALOLAGI?

*E pei o le Atali'i o le tagata e le'i sau Ia ia au'auna mai tagata iā te Ia, a ia au'auna atu Ia, ma foa'iina atu Lona ola e fai ma togiola e sui a'i tagata e to'atele. **Mataio 20:28***

Mau e Tau i ai: Luka 22:27; 5:31, 32; Isaia 61:1-3; 53:4, 5; Filipi 2:4-8; Salamo 146:7-9; Efeso 5:2; Eperu 9:28; I Ioane 2:2

O le alofa iā Iesu o le a fa'atinoina i le naunau e galue fa'apei ona galue o Ia mo le fa'amanuiaina ma le si'itiaina i luga o le aigātagata. E ta'ita'iina ai ia alofa, fa'apalepale, ma le tigāalofa mo meaola uma o i le tausiga a lo tatou Tamā i le lagi.

O le soifuāga a le Fa'aola i le lalolagi e le'i faigofie ma manatu alofa fa'apito mo Ia lava, a e sa Ia galue ma le fa'amaoni, ma'elegā, ma le'i fa'avaivai i taumafaiga mo le fa'asaoina o le aigātagata ua lēiloa. Mai le fale o povi e o'o i Kalevario sa Ia savali i le auala o le te'ena o Ia lava, ma sa'ili ina ia lē fa'asa'olotoina mai galuega fitā, o malaga faigatā ma fe'au e fa'atigā ma mafatia ai. Sa fetalai o Ia, "E le'i sau Ia ina ia au'auna mai tagata iā te Ia, a ia 'aia'una atu Ia, ma foa'iina atu Lona ola e fai ma togiola e sui a'i tagata e to'atele." O le autū tāua e tasi lenei o Lona soifuāga. O isi uma mea e mulimuli mai ai ma e lē tāua. O Lana 'a'ano ma le vai inu lea, o le faia o le finagalo o le Atua ma ia fa'ai'uina Lana galuega. O Lona ia lava tagata ma mea fa'apitoa e leai se vaega i Lana galuega.

(3) PE A TATOU TOFUSIA LE ALOFA TUNOA O KERISO, O LE Ā LE MOLIMAU O LE A TA'ITA'IINA I TATOU E LE AGAGA PA'IA IA TA'U ATU, E FA'APEI ONA FAIA E IOANE?

*O le taeao ua va'ai atu ai Ioane iā Iesu
o maliu mai iā te ia, ona fai ane lea,
Fa'auta i le Tama'i Mamoe a le Atua,
na te 'ave'esea le agasala a le lalolagi.
Ioane 1:29*

Mau e Tau i ai: I Peteru 1:19, 20;
Fa'aaliga 5:12, 13; 13:8; Kalatia 1:4; I
Ioane 2:2; 3:5; 4:10; Isaia 53:5-7

O ē ua fa'asoa i le alofa tunoa o
Keriso o le a sauni e fai so'o se taulaga,
ina ia mafai ona tofusia e i latou na
maliu ai o Ia le meaalofo fa'alelagi. O le
a latou taumafai e fa'aleleia le lalolagi a
o latou mau ai. O le agaga lenei, o le
tatupu moni a le agaga ua liua
fa'amaoni. E sau loa le tagata iā Keriso
o le a ola a'e i lona loto se fa'anaunauga
e fa'ailoa atu i nisi le uō tāua ua ia maua
iā Iesu; e lē mafai ona teu fa'alilo i lona
loto le 'upu moni e fa'asao ma
fa'apa'iaina ai. Pe a ua fa'a'o'ofu i tatou i
le amiotonu o Keriso ma ua fa'atumulia
i le fiafia o Lona Agaga o lo'o i totonu o
i tatou, o le a lē mafai ona tatou
taofimau i se mea lelei. Pe afai ua tatou
tofoina ma va'aia le lelei o le Atua, o le
a i ai se mea e tatou te fia ta'u atu. E pei
o Filipo ina ua ia maua le Fa'aola, o le a
tatou vala'aulia mai nisi i Lona afio'aga.
O le a tatou sa'ili e fa'ailoa iā i latou le
ofoofogia o Keriso ma mea moni e lē o
va'aia o le lalolagi o lo'o i luma. O le a
fa'ateleina le naunau e mulimuli i le ala
na malaga ai Iesu. O le a i ai se
fa'anaunauga moni mo i latou o lo'o i lo
tatou si'osi'omaga ia fa'aapea "Fa'auta, le
Tama'i Mamoe a le Atua, Na te
'ave'esea le agasala a le lalolagi."

(4) O LE Ā LE I'UGA E MAUA MAI I GALUEGA E FAIA MO ISI MAI LE LĒ LOTO FA'APITO?

*E fa'atamāo'aigaina le tagata
matamau; o ia fo'i lē fa'asūsū i nisi, e
fa'asūsū lava o ia. Fa'ata'oto 11:25*

Mau e Tau i ai: Fa'ata'oto 28:27; Isaia
58:7-11; Iopu 29:13-17; Mataio 5:7;
25:34-36; II Korinito 9:6-13

O le taumafai e avatu se manuia i
nisi o le a fa'amanuiaina ai lava tatou. O
le fa'amoemoega lea a le Atua i le
tu'uina mai iā i tatou o se vaega i le
fuafuāga o le fa'aolataga. Ua Ia aumai i
tagata le avanoa e tofusia ai i le uiga
moni o le Atua, ma pe a o'o i le latou
taimi, ia fa'asoa atu fa'amanuiāga i o
latou uso ā tagata. O le fa'aaloaloga e
aupito maualuga lenei, o le fiafia e
aupito sili, ona e mafai e le Atua ona
tu'uina mai i luga o tagata. O i latou
uma e 'au'aumea fa'atasi i galuega o le
alofa ua sili le latalata atu i Lē na faia i
latou.

Atonu na tu'uina e le Atua le fe'au
o le tala lelei, ma galuega uma o
'au'aunaga o le alofa, i agelu o le lagi.
Atonu sa mafai e Ia ona fa'aaogā nisi
tulaga e fa'ataunu'uina ai Āna fuafuāga.
A e ona o Lona alofa e lē mafa'agataina
ua Ia filifili e 'avea i tatou ma ē galulue
fa'atasi ma Ia, ma Keriso ma agelu, ina
ia tatou tofusia i fa'amanuiāga, o le
fiafia, o le si'itia a'e fa'aleagaga, o le
i'uga lea mai lenei galuega lē fa'apito.

(5) O LE Ā SE FA'ATA'ITA'IGA NA TU'U MAI E KERISO

FA'ATATAU I LONA UIGA LĒ FA'APITO?

Auā ua outou iloa le alofa tunoa o lo tatou Ali'i o Iesu Keriso, sa tamāo'aiga Ia, a ua fa'amativaina ona o outou, ina ia fa'atamāo'aiga outou i Lona mativa.

II Korinito 8:9

Mau e Tau i ai: I Peteru 2:21; Filipi 2:6-8; Mareko 10:44, 45; Mataio 20:28; Ioane 13:3-5; I Timoteo 6:17-19; Iakopo 2:5; Eperu 2:9-18; Mataio 6:33

Ua iā i tatou le tigāalofa ma Keriso e ala i le so'otaga ma Ia i Ōna puapuagā. O gaoioiga uma e faia mo le lelei o isi e fa'amolsia ai le agaga faitaulaga i le loto o lē e foa'i atu, e fefa'aso'ota'i ai ia i le Fa'aola o le lalolagi, o Lē "sa tamāo'aiga a ua fa'amativaina ona o tatou, ina ia fa'atamāo'aigaina outou i Lona mativa." Ma pe a tatou fa'ataunu'uina le fuafuāga pa'ia ina ua faia i tatou, o le a mafai ona 'avea le ola o se fa'amanuiāga mo i tatou.

Pe afai tatou te ō atu e galulue pei ona fuafua e Keriso mo Ōna so'o, ma maua mai agaga mo Ia, o le a lagona lou mana'omia o se gaoioiga loloto ma se poto e sili atu i mea fa'aleagaga, ma o le a fia'ai ma fiainu mo le amiotonu. O le a e ōle atu i le Atua, ma o le a fa'amalosia lou fa'atuatua; o lou agaga o le a inu i le vaipuna o le fa'aolataga. Pe a e feagai ma tofotofoga ma mea e tete'e mai, o le a e sulufa'i i le Afioga Pa'ia ma le tatalo. O le a tupu a'e pea 'oe i le alofa tunoa ma le iloa o Keriso, ma o le a fa'atupu tele lou agaga galue.

**(6) O AI E AUMAIA IĀ I TATOU
LE FA'ANAUNAUGA E 'A'APA
ATU AI MA LE LIMA
FESOASOANI I ISI?**

*Auā o le Atua, o Ia Lē galue i totonu iā
te outou i Lona finagalo alofa, ina ia
outou loto ma galulue i ai. **Filipi 2:13***

Mau e tau i ai: Eperu 13:20, 21; II
Korinito 30:12; Isaia 26:12; Ieremia
31:33; Ioane 3:27; I Tupu 8:58; II
Tesalonia 1:11, 12; II Timoteo 1:9

**(7) O LE Ā LE MANUIA O LE A
MAUA E I LATOU E LOTO
NAUNAU E TU'U O LATOU OLA E
GALULUE MO LE LELEI O ISI?**

*Afai fo'i e te alofa atu i lē ua fia'ai, ma e
fafaga ia ma'ona o lē ua tigā, ona alu
a'e lea o lou malamalama i le pouliuli,
ma lou pogisā e pei o le aoauli ia. E
ta'ita'iina fo'i 'oe e lē aunoa e le Ali'i; e
fa'amalie fo'i o Ia iā te 'oe pe a ōge vai,
ma fa'amalosia ōu ivi; e 'avea fo'i 'oe e
pei o se fanua ua fa'asūsūina, e pei o le
punāvai fo'i e lē mate ona suāvai. **Isaia
58:10, 11***

Mau e Tau i ai: Salamo 41:1-3; 112:4-
9; Teuterenome 15:7-10; Fa'ata'oto
11:24, 25; 14:31; 28:27; Mataio 10:39

O le agaga o le galue lē fa'apito
mo isi e tu'u atu ai le tulaga loloto,
mautū, ma le uiga matagofie fa'apei o
Keriso, ma e aumaia le filemū ma le
fiafia i lē o lo'o maua ai. O
fa'amoemoega ua si'i a'e i luga. E leai se
avanoa mo le paiē ma le manatu

fa'apito. O i latou e i ai uiga alofa o le Kerisiano o le a tupu a'e ma maua le malosi e galue ai mo le Atua. O le a iā i latou manatu manino fa'aleagaga, o se fa'atuatua e tuputupu pea, ma se malosi e fa'ateleina i le tatalo. O le Agaga o le Atua, o lo'o galuea'iina o latou loto, e aumaia pese malie e taliina le vala'au fa'aleagaga. O latou ua tu'u atu i latou i taumafaiga e lē fa'apito a e mo le lelei o isi ua mautinoa o lo'o faia le galuega mo lo latou lava fa'aolataga.

**(8) O Ā FA'AGAOIOIGA E LUA
UA FA'AMANUIAINA E ALA MAI
LE AGAGA PA'IA, O LE A I'U AI I
LE TATOU TUPUTUPU A'E
FA'ALEAGAGA E AUPITO SILI
ONA MAUALUGA?**

*O lē matuā matamata'i i le tulafoni o le sa'olotoga ua ato'atoa lona lelei, ma ua tumau i ai o ia, e lē se fa'alogologo ma le fa'agalogalo lenā tagata, a o le 'ana'ana i le galuega, e manuia o ia i lona lava 'ana'ana. **Iakopo 1:25***

Mau e Tau i ai: Iakopo 2:12; Luka 6:46, 49; 11:28; Ioane 8:31; 13:17; 15:9, 10; Roma 11:22; I Timoteo 4:16; Salamo 119:2, 3; I Korinito 15:58; Fa'aaliga 22:14

E pau le ala o le a e tupu ai i le alofa tunoa o le faia lea o le galuega ua tu'u mai e Keriso iā i tatou - o le faia, i le lautele o lou agava'a, e fesoasoani ma fa'amanuia ē mana'omia le fesoasoani tatou te mafai ona avatu mo latou. E maua le malosi mai le galue; o le gaoioi e fa'atulagaina le olaga. O latou e

taumafai e fa'ataunu'u le olaga Kerisiano e ala i le talia o fa'amanuāga e maua mai le alofa tunoa, a e lē o faia se mea mo Keriso, e pei o le taumafai e 'ai ina ia ola a e lē faia se galuega. I le fa'aleagaga e fa'apei o le uiga moni o le lalolagi, e fa'ai'u lava nei mea uma i le tulagavale ma le pala. O le tagata e tete'e i le fa'amalosi tino e i'u i le leai o se malosi e fa'aaogā ai itu tino uma. E fa'apea le Kerisiano e lē fa'agaoioia ōna malosi na tu'u mai e le Atua, o le a lē na'o le lē tupu a'e iā Keriso, a e o le a 'ave'esea le malosi o lo'o iā te ia.

(9) O LE Ā LE GALUEGA UA TU'UINA MAI E KERISO I LANA EKALESIA?

*O lenei, ia outou ō atu e fai nu'u uma lava ma so'o, ma papatiso atu iā te i latou i le suafo o le Tamā, ma le Atali'i, ma le Agaga Pa'ia; Ia outou a'oa'o atu i a te i latouia tausī i mea uma ua 'Ou fai atu ai iā te outou; fa'auta fo'i, 'Ou te iā te outou i aso uma lava, e o'o lava i le gata'aga o le lalolagi. **Mataio 28:19, 20***

Mau e Tau i ai: Galuega 1:8; 26:16-18; 22:14, 15; Isaia 49:6, 22; 52:10; Mareko 16:15-18; Luka 24:47, 48; Mataio 5:13-16; 24:14

O le ekalesia a Keriso o le sui lea na tofia e le Atua mo le fa'asaoina o tagata. O lana galuega o le tau'aveina lea o le talalelei i le lalolagi. Ma o le tiute lea e i luga o tagata Kerisiano uma. O tagata ta'ito'atasi uma, e tataui ai ma lana taleni ma le avanoa, o le a fa'ataunu'uina le fe'au a le Fa'aola. O le

alofa o Keriso, ua fa'aalia iā i tatou, e 'avea ai tatou o tagata agasala iā i latou uma e lē iloa o Ia. Ua tu'u mai e le Atua le malamalama, ia lē mo na'o i tatou, a e ia fa'asusulu atu i o latou luga.

Pe ana fai o ē mulimuli iā Keriso ua ala mai e galulue, o le a i ai le to'a afe i le mea o lo'o i ai nei le to'atasi e tala'i le talalelei i nu'u fa'apaupau. Ma o latou uma e lē mafai ona ō atu i le galuega, a e o le a fesoasoani i le tausiga i a latou taulaga, lo latou tigāalofa, ma a latou talosaga. Ma o le a tele atu fo'i le galue fa'amaoni mo agaga o i nu'u Kerisiano.

(10) ONA O I TATOU O KERISIANO, O FEA O LO'O VALA'AUINA I AI I TATOU E GALULUE AI MO KERISO?

Le 'au uso ē, ia ta'ito'atasi ma nofo pea i luma o le Atua i le mea na vala'auina ai o ia. I Korinito 7:24

Mau e Tau i ai: Galuega 16:25; I Korinito 10:31; Kolose 3:17, 23, 24; Isaia 6:8; Filipi 4:11; II Korinito 3:3; Mataio 25:36; 28:19, 20; Iakopo 1:27; Galuega 22:21; 26:16, 17

E lē o mana'omia e tatou te ō i nu'u fa'apaupau, pe ō mamao mai le si'osi'omaga o lou aiga, pe afai o inā o lo'o i ai lou tiute ina ia e galue mo Keriso. E mafai lava ona tatou faia se galuega i le aiga, i lau ekalesia, i ē o lo'o e feso'ota'i ai, ma ē tou te galulue fa'atasi.

O le vaega tele o le soifuāga o Keriso i le lalolagi sa fa'aaluina e galue

i le fale kamuta i Nasareta. O agelu sa fa'atasi ma le Ali'i o le ola a o femalagaa'i ma ē galulue, o ē lē mamalu pe lauiloa. Na Ia galue fa'amaoni e fa'ataunu'u Lana galuega i Lona faiva fa'atauva'a, e tusa lava ma le fa'amalōlōina o ē mama'i po o le savali fo'i i luga o le sami sousou o Kalilaia. O lea, i so'o se tiute fa'atauva'a po o se tulaga e maulalo lava o le olaga, atonu o lo'o tatou savavali ma galulue ai fa'atasi ma Keriso.

Fai mai le aposetolo, "Ia ta'ito'atasi ma nofo pea i luma o le Atua i le mea na vala'auina ai o ia." O le tagata faipisinisi e tatau ona faia lana galuega i se ala o le a vi'ia ai lona Ali'i ona o lona fa'amaoni. Afai o ia o se so'o moni o Keriso o le a ia tau'ave lana tapua'iga i mea uma na te faia ma fa'aali i tagata le agaga o Keriso. O le tagata e galue i mea faimea atonu e ma'elegā ma fa'amaoni e fa'ailoa atu Ia Lē na galue mo ē tulaga maulalo i atumauga o Kalilaia. So'o se tasi e ta'uina le suafa o Keriso, e tatau ona galue ina ia iloa mai e isi galuega lelei, ma ta'ita'iina ai e vi'ia lo latou Fa'aola ma Lē na faia mea uma.

(11) E UI INA TATOU MANATU MAULALO I A TATOU TALENI, AISEĀ UA FA'ATĀUAINA AI LE FA'AAOGĀINA O TATOU MO LE GALUEGA A KERISO?

O lā uma lava o iā te A'u e lē fua, e 'ave'esesina e Ia; a o lā uma e fua, e teuteu e Ia, ina ia fua mai ai atili. Ioane 15:2

Mau e Tau i ai: Luka 19:17, 24; 12:48;

8:18; Mataio 25:28; I Korinito 1:27-29; 15:10

E to'atele ua 'ave'esea i latou lava ia mai le fa'aaogāina o a latou meaalofa mo le galuega a Keriso ona o isi ua i ai mea e sili atu ma isi mea aogā. E i ai le manatu fa'apea e na'o latou e i ai taleni fa'apitoa e mana'omia ia fa'apa'iaina mo le galuega a le Atua. E i ai fo'i se malamalamaga mai isi fa'apea o taleni ua tu'uina i se vasega o tagata fa'apitoa a e lē aofia ai i latou e lē o vala'auina ia tofusia i le galuega po o tau. A e peita'i e lē o fa'aילוaina fa'apea i le tala fa'ata'oto. Ina ua vala'auina e le matai o le fale āna 'au'auna, sa ia tu'u atu i tagata ta'ito'atasi lana ia lava galuega.

(12) PE A UA FA'ATUMUINA O TATOU LOTO I LE ALOFA MO LE ATUA, O LE A FA'APEFEA ONA TATOU FAIA TIUTE E FA'ALĒTĀUA O LE OLAGA?

'Aua ne'i fa'atagā au'auna, pei o ē fa'afiafia i tagata, a ia fa'apei o au'auna a Keriso, o ē fai le finagalo o le Atua ma le loto.

Efeso 6:6, 7

Mau e Tau i ai: Kolose 3:22, 23; I Tesalonia 2:3, 4; Mataio 7:2; I Peteru 2:15; 4:2; Eperu 13:5; I Timoteo 6:6; Kalatia 1:10

A i ai so tatou agaga alofa o le a mafai ona tatou faia tiute e aupito fa'atauva'a o le olaga "e pei ona faia i le Ali'i." Pe afai e i o tatou loto le alofa o le Atua, o le a fa'atinoina i le olaga. O le

manogi sasala o Keriso o le a si'omia i tatou, ma o le a fa'aeaina ma fa'amanuia lo tatou tulaga.

(13) AFAI E TONU LO TATOU VĀ FEĀLOA'I MA LE ATUA, O LE Ā SA TATOU FA'AMALOSI'AGA E FAIA AI MEA UMA?

O mea uma lava tou te faia, ia faia ma le loto, peiseā'i ua faia i le Ali'i, a e lē o tagata. Kolose 3:23

Mau e Tau i ai: Kolose 3:17; I Korinito 10:31; II Nofoa'iga Tupu 31:21; Salamo 103:1; 119:10, 34, 145

Ia e lē fa'atali mo se mea tele se'i tupu po o le fa'amoemoe i ni taleni fa'apitoa ona fa'ato'ā e alu lea e galue mo le Atua. E lē mana'omia ia i ai sou mafaufau po o le ā le manatu a le lalolagi e uiga iā te 'oe. Pe afai o lou olaga i aso ta'itasi o se molimau lea i le mamā ma le fa'amaoni o lou fa'atuatua, ma o isi ua mautinoa o lo'o e naunau e fesoasoani iā i latou, o le a lē fa'alēaogāina ōu taumafaiga uma.

(14) O LE Ā LE I'UGA MAI SE OLAGA E FA'ATUATUA MA E FA'ASOASOA ATU?

A o la'u nei e fai atu, O lē ua itiiti ana saito e lūlū, e itiiti fo'i ana e selesele mai; a o lē ua tele ana e lūlū, e tele fo'i ana e selesele mai. II Korinito 9:6

Mau e Tau i ai: Luka 6:38; Fa'ata'oto 11:18, 24; 22:9; Mataio 5:14; I Timoteo 5:25; Salamo 41:1-3; Failauga 11:1, 6;

Kalatia 6:7-9; Eperu 6:10

O so'o o Iesu e aupito tulaga maualalo ma mativa e mafai lava ona 'avea ma fa'amanuiāga i nisi. Atonu latou te lē o iloa o lo'o latou faia se mea e fa'apitoa le lelei, a e ala i o latou uiga lēmailoa, atonu e latou te amata fa'agaoioi ni galu o fa'amanuiāga o le a fa'alauteleina ma fa'aloloto, ma o le a latou lē iloa i'uga se'ia o'o i le aso o tauimulimuli. Latou te lē o lagona pe iloa o lo'o latou faia se mea lelei. E lē mana'omia i latou e fa'avaivai pe popole fa'atatau i fa'amanuiāga. Na'o le mana'omia o i latou ia aga'i filemū i luma, ia faia ma le fa'amaoni le galuega ua tu'u mai i le agalelei o le Atua, ma o lo latou olaga o le a lē fa'alēaogāina. O latou agaga o le a tupu ma aga'i pea i le fa'atusa o Keriso; o i latou o le 'au faigaluega fa'atasi ma le Atua i lenei olaga ma ua fa'atatauina mo le galuega maoa'e ma le fīafia e lē fa'amalumaluina, o le ola o le a o'o mai.

Ou te fa'afetai i a Iesu ona ua Ia tu'ua le mamalu o le lagi a e galue ia fa'amalieina mana'oga o le aigā tagata.

Li'o le tali: Ioe Lē mautonu

Ou te tatalo i le Agaga Pa'ia e ta'ita'iina a'u ia mulimuli i le fa'aa'oa'oga a Keriso e fa'atatau i le tala'i atu: 1) i tagata 'ese'ese ma ia fa'auō atu ai; 2) fa'aali le loto alofa mo latou mana'oga fa'aletino ma ia latou maua le talisapaia, ona ta'u atu lea le tala lelei o le 'upu moni.

Li'o le tali: Ioe Lē mautonu

*Ua ou iloa o le manuia fa'aleagaga e
aupito sili lea ma o le a tuputupu a'e
pea i latou o lo'o galulue mo isi. Ou te
tu'u atu lo'u ola mo le galuega a le Atua
ma tatalo ia Na ta'ita'i a'u ina ia ou
au'auna mo nisi.*

Li'o le tali: Ioe Lē maunonu

[illegible]



Lesona 11

O le Iloa o Le Atua

**(1) O LE Ā SE POGAI E TUMAU
PEA O LO'O FA'AALIA AI LE
ATUA MA LONA MAMALU
OFOOFOGIA?**

*Ua tala mai e le lagi le mamalu o le Atua; ua fa'aalia fo'i e le vā nimonimo le galuega a Ōna 'a'ao. **Salamo 19:1***

Mau e Tau i ai: Roma 1:19, 20; Isaia 40:22, 26; 44:24; 48:13; Salamo 8:3, 4; 33:6; Iopu 31:26-28; Kenese 1:1-20

E tele auala ua sa'ili ai le Atua ia fa'aailoa mai ai o Ia iā te i tatou ma aumai ai i tatou ia feso'ota'i ma Ia. O mea na foafoaina o lo'o talanoa mai i o tatou lagona e lē aunoa. O le loto e tatala mai o le a fa'ailogaina i le alofa

ma le mamalu o le Atua e pei ona fa'aalia mai i galuega a Ōna a'ao. O taliga e mafai ona fa'alogo ma malamalama i feso'ota'iga a le Atua e ala i mea na Ia foafoa. O fanua lanu lau'ava, o la'au mafolā, o fuga ma fugāla'au, o āo o le lagi, o le timu o lo'o pa'ū ifo, o vaitafe gasēsē, o le matagofie o lagi ma le vāteatea, o lo'o talanoa mai i o tatou loto, ma vala'aulia i tatou ia fa'amasani ma Ia o Lē na faia i latou uma lava.

O lo tatou Fa'aola ua fusia Āna a'oa'oga tāua ma mea uma o Lana foafoāga. O la'au, o manu felelei, o fugāla'au o vanu, o atumauga, o vaitūloto, ma lagi matagofie, fa'aapea ma mea o lo'o si'omia ai i tatou i aso ta'itasi, ua feso'ota'i uma ma 'upu moni ina ia fa'amanatu mai pea i le mafaufau Āna a'oa'oga, e o'o lava i taimi o le vevesi i tiute fa'aletagata o lona olaga galue.

O le Atua e finagalo ina ia i ai le agaga fa'afetai i Lana fanau mo Āna galuega ma ia fiafia i mea faigofie, o le matagofie o le to'afilemū na Ia fa'amatagofieina ai lo tatou aiga i le lalolagi. O Ia e fiafia i mea matagofie, ma e sili a'e i lea matagofie mai fafo, e fiafia o Ia i le matagofie o le amio; e finagalo o Ia ia atia'e le mamā ma le faigofie, o le onomea o le to'afilemū o fugāla'au.

(2) I LE TOTONUGALEMŪ O O TATOU OLAGA E TUMU I LE VEVESI, E FA'APEFEA ONA MAFAI ONA TATOU VA'AIA MA LAGONA LE ATUA O FETALAI MAI IĀ I TATOU?

Ia outou tetemū, ia 'aua ne'i agasala; ia 'outou manatunatu ifo i o outou loto i luga i o moega, ma ia outou fifilemū.

Salamo 4:4

Mau e Tau i ai: Salamo 33:8, 9; 46:10; Sapakuka 2:20

Pe afai o le a na o na tatou fa'alologologo, o le a a'oa'o mai iā i tatou e mea sa foafoaina e le Atua ni lesona tāua i le usiusita'i ma le fa'atuatua. Mai fetū i o latou ala i le vāteatea e augātupulaga a latou feuia'iga, e o'o lava i mea aupito nini'i, o mea uma o le foafoāga e usiusita'i i le finagalo o Lē na Foafoaina i latou.

**(3) E FA'APEFEA ONA
FA'AILOA E LE ATUA LONA
TIGĀALOFA MO MEA UMA NA
IA FAIA?**

Ai se tasi ua ia tu'ua o fale, po o uso, po otuafafine, po o le tamā, po o le tinā, po o le avā, po o le fanau, po o fanua ona o Lo'u igoa, e maua e ia e taisautuaselau, e fai fo'i mona tofi le ola e fa'avavau. A e to'atele o ē ua muamua e 'avea ma mulimuli; o ē ua mulimuli fo'i e 'avea ma muamua.

Mataio 10:29, 30

Mau e Tau i ai: Luka 12:24-28; Salamo 103:1-17; 104:27, 28; 139:1-18; 136:25; 145:15, 16; Auēga 3:22, 23

E tausia ma puipuia e le Atua mea uma na Ia foafoaina. O Ia na te taofimauina lalolagi e lē mafaitaulia o

lo'o salalau i le atu laulau, ma i lea lava taimi o lo'o Ia tausia si manulele itiiti ma ona mana'oga a o pese fiafia ma e leai se mea e fefe ai. Pe a o ō atu tagata i a latou galuega i aso ta'itasi, pei ona 'auai i a latou talosaga; pe a latou ta'o'oto i le pō, ma pe a latou ala a'e i le taeao; pe a o taumafa le tagata mau'oa i lona maota, po o le tagata mativa a o fa'apotopoto lona aiga i le la'o'ai fa'atauva'a, o i latou ta'ito'atasi o lo'o silasila ifo i ai ma le lotoalofa le Tamā o i le lagi. E leai se loimata e maligi e lē o silafia e le Atua, e leai fo'i se foliga fiafia e Na te lē amana'ia.

**(4) PE AFAI TATOU TE
ALOLOFA I LE ATUA MA TU'U
ATU LE TAUSIGA O TATOU OLA
I ŌNA 'A'AO, O LE Ā LE
SAOGALEMŪ O LE A TATOU
MAUA?**

Ua tatou iloa fo'i e galulue fa'atasi mea uma e lelei ai i latou ē ua alofa atu i le Atua, o ē ua vala'auina i Lona finagalo.
Roma 8:28

Mau e Tau i ai: Roma 8:35- 39; Isaia 26:3; Salamo 46:1, 2; Ieremia 29:11-13; Sakaria 13:9; Eperu 12:6-12; I Peteru 1:7, 8

Pe ana faitatou te matuā talitonu ato'atoa i lenei manatu, semanū o le a mavae 'ese atu mea uma tatou te popole ai. O le a lē fa'atumuina o tatou olaga i le fa'anoanoa e pei o le taimi nei; auā o mea uma, pe tele pe itiiti, o le a lafoa'i atu i 'a'ao o le Atua, o Lē e lē fenumia'i i le tele na'uā o avega, po o le lē

mautonu i le mamafa. O lea ia tatau ona tatou oli'oli i le malōlōga o le agaga ua leva ona faia i tatou ma tagata 'ese.

**(5) O LE Ā LE MEA O LE A FAIA
E LE ATUA I "MEA UMA" MO LE
LELEI O LANA FANAU UA
FA'AOLAINA O LE A SILI ATU LE
MATAGOFIE I LO O MEA UA
MAFAI ONA TATOU
MAFAUFAUINA?**

*Ua fetalai mai fo'i Lē ti'eti'e i le
nofoali'i, Fa'auta, 'Ou te faia ia fou mea
uma lava. Ua fetalai mai fo'i o Ia iā te
a'u, Ia e tusi; auā o 'upu nei e moni ma
le fa'amaoni ia. **Fa'aaliga 21:5***

Mau e Tau i ai: Fa'aaliga 21:1-4; Isaia
65:17; 43:18, 19; 42:9; I Korinito 2:9

E pei ona fa'amalieina ou lagona i
le matagofie tausa'afia o le lalolagi, se'i
manatunatu i le lalolagi o le a o'o mai, e
lē toe iloa ai le pagātia o le agasala ma
le oti; o le a lē toe va'aia ai i foliga o
mea na foafoaina le ata o le fetu'u. Se'i
va'ai fa'alemafaufau le ata o le aiga o le
'au fa'aolaina, ma manatua o le a sili atu
lona matagofie i lo sau va'aiga
fa'alemafaufau e mafai ona e fafauina. I
meaalofa 'ese'ese uma a le Atua o le
foafoāga tatou te va'aia ai na o se ataata
fa'anenefu o Lona mamalu.

E tele mea o lo'o fa'amatala ma
ta'u mai e le fai solo ma tagata su'esu'e
fa'atatau i mea o le foafoāga, a e o le
Kerisiano o lo'o fiasia i le matagofie o le
lalolagi ma le loto e matuā ave a'e le
fa'afetai, auā e na te iloa le galuega a
lona Tamā ma na va'aia Lona alofa i

fugāla'au, o la'au iti ma la'au o le vaomatua. E leai se tasi e malamalama ato'atoa i le tāua o le atumauga ma le vanu, o le vaitafe ma le sami, o ai se tasi e lē va'ai i ia mea ma iloa ai le alofa o le Atua mo le tagata.

(6) PE A UA TATOU Ō GATASI MA LONA AGAGA, O Ā A'OA'OGA O LE A FA'AALIA MAI E FA'ATATAU I LE ATUA?

E fiafia o Ia i le amiotonu ma le fa'amasinoga; ua tumu le lalolagi i le alofa o Ieova. Salamo 33:5

Mau e Tau i ai: Salamo 104:24; 119:64, 68; 97:2; Fa'aaliga 15:3, 4

E fetalai mai le Atua iā i tatou e ala mai i Āna galuega fa'avavega ma e ala mai fo'i i gaoioiga a Lona Agaga i le loto. I le tulaga o lo'o tatou i ai ma i o tatou si'osi'omaga, i fesuia'iga o lo'o tutupu i o tatou tafatafa i aso ta'itasi, e mafai ona tatou mauaina ai o a'oa'oga tāua pe afai o le a tatala atu o tatou loto ia iloa tonu ai ia mea.

(7) AISEĀ UA TUSI FA'AMAUINA AI I LE AFIOGA PA'IA GAOIOIGA A TAMĀ ALOA'IA MA PEROFETA?

O mea uma fo'i na tusia anamua, na tusia ia a'oa'o mai ai iā te i tatou; ina ia tatou maua le fa'amoemoe e tupu mai i le onosa'i, ma le fa'amafanafana mai o Tusi. Roma 15:4

Mau e Tau i ai: I Korinito 9:10; 10:6,

11; II Timoteo 3:16; Roma 4:23, 24

E fetalai mai le Atua i a te i tatou i Lana Afioga. O i'inei tatou te manino ai i auala o le fa'aaliga o Lona uiga, o Āna feagaiga ma tagata, ma le galuega tele o le fa'aolataga. O lo'o matala mai iā i tatou le tala fa'asolopito o pateriaka ma perofeta ma isi tagata pa'ia o aso anamua. O i latou o tagata e "tusa ma i tatou" (Iakopo 5:17). Tatou te va'ai ai pe na fa'aapefea ona latou fetalai'ai ma fa'avaivaiga e pei lava o tatou, pe na fa'aapefea ona latou pa'ū'ū i lalo o fa'aosoosoga e pei ona tatou faia, a e ui i lea na toe maua le loto tele ma manumalō ai e ala i le alofa tunoa o le Atua; e fa'auta, ua fa'amalosia i tatou i la tatou sa'iliga o le amiotonu. A o tatou faitauina mea tāua na o'o iā te i latou, e uiga i le malamalama ma le alofa ma le manuia na fa'afiafia ai ina ua latou maua, ma le galuega na latou faia e ala i le alofa tunoa na tu'uina iā te i latou, o le agaga na osofia i latou ia tutuina le afi i o tatou loto ina ia mana'o i le fa'apa'iaina ma se fa'anaunauga ia pei o i latou i le amio - ia savavali ma le Atua e pei o i latou.

**(8) O Ā FA'AMANUIĀGA
FA'APITOA E LUA O LE A
FA'AALIA MAI E ALA I LE
SU'ESU'EINA O LE AFIOGA A LE
ATUA?**

E su'esu'e outou i Tusi, auā ua outou manatu tou te maua ai le ola e fa'avavau; o Tusi fo'i ia o lo'o maolima iā te A'u.

Ioane 5:39

Mau e Tau i ai: Luka 24:27; Mataio 22:29; Fa'ata'oto 6:23; 8:33, 34

Na fetalai Iesu e fa'atatau i le Afioga a le Atua i le Feagaiga Tuai, - ma e fa'apea fo'i ona sili atu le moni o le Feagaiga Fou, - "O i latou o lo'o molimau iā te A'u," le Fa'aola, o Ia o le totonugalemū o lo tatou fa'amoemoe mo le ola e fa'avavau...Ioe, o le Tusi Pa'ia o lo'o fa'amatala mai ai Keriso. Mai le ulua'i fa'amaumauina o le foafoāga - auā "e leai fo'i se mea e tasi na faia e le'i faia e Ia" - e o'o i le folafolaga fa'ai'u, "Fa'auta fo'i, Ou te vave alu atu," o lo'o tatou faitau e fa'atatau i Āna galuega ma fa'alogoia Lona si'ufofoga (Ioane 1:3; Fa'aaliga 22:12). Afai e te fia iloa ma masani i le Fa'aola, ia su'esu'e le Afioga Pa'ia a le Atua.

(9) AISEĀ E MATUĀ TĀUA AI LE ILOA O LE ATUA E ALA I LE SU'ESU'E MA LE MANATUNATU LOLOTO I LANA AFIOGA?

O le agaga lea e tupu ai le ola, e lē aogā le tino i se mea; o 'upu 'Ou te fai atu iā te outou, o le agaga ia, o le ola fo'i ia. Ioane 6:63

Mau e Tau i ai: Salamo 119:103-105; Kolose 3:16; II Timoteo 3:14-17; 2:15

Ia fa'atumuina le loto atoa i fetalai a le Atua; o afioga ia o le vaiola lea, e fa'amalieina ai lou gālala. O le areto o le ola mai le lagi. Ua fa'ailoa mai e Iesu, "Afai tou te lē 'a'ai i le tino o le Atali'i o le tagata, ua lē i totonu iā te outou le ola" (Ioane 6:53).

O o tatou tino e tausia i mea tatou te 'a'ai ma inu ai; ma e fa'apei o le fai fuafua lelei i le uiga moni o mea, e fa'apea fo'i i le fa'aleagaga: o mea e tatou te mafaufau loloto i ai o le a avatu ai le solo lelei ma le malosi i lo tatou uiga moni fa'aleagaga.

(10) E FA'APEI O PAULO, E I LUGA O LE Ā LE AUTŪ MATAGOFIE O LE TUSI PA'IA O LE A TATAU ONA TATOU MAFUTA I AI MA FA'ASOA ATU?

Auā afai ou te fa'atigā iā te outou, po o ai se na te fa'afiafia mai iā te a'u, afai e lē o ia'ua fa'atigā e a'u? **I Korinito 2:2**

Mau e Tau i ai: Kalatia 6:14; Filipi 3:8-10; I Korinito 1:17, 18, 23

O le autū o le fa'aolataga o le tasi lea o mea sa naunau agelu ia latou va'ava'ai i ai; o le su'esu'ega ma le pese lea a le 'au fa'aolaina e o'o i le fa'avavau e lē mafa'agataina. E mata ea e lē tāua ona mafaufau ma le fa'aeteete ma su'esu'e nei i ai? O le alofa tunoa ma lē mafuatia o Iesu, o le taulaga ofo na faia e sui ai i tatou, e tatau ona mafaufau loloto ma le fa'amaoni i ai. E ao ona tatou matuā nonofo ma manatunatu i le uiga o lo tatou Fa'aola pele ma le Fautua. E tatau ona tatou manatunatu loloto i le galuega a Ia Lē na afio mai e fa'aola Ōna tagata mai a latou agasala. A o tatou mafaufau pea i matā'upu fa'alelagi, o le a fa'atupu pea lo tatou fa'atuatua ma le malosi, ma o a tatou talosaga o le a taliaina e le Atua, auā o le a aofia fa'atasi ai ma le fa'atuatua ma

le alofa. O le a fa'autauta ma naunauta'i.
O le a fa'aauauina le talitonu i a Iesu,
ma o aso ta'itasi o le a galue i se olaga e
i Lona mana ina ia fa'aola i latou uma e
ō mai i le Atua e ala iā te Ia.

**(11) O Ā ITUAIGA PULE O LO'O
FA'ATONU MAI LE AFIOGA A LE
ATUA IA TATOU TUTUMAU I AI
INA IA FA'AMALOSIA AI LA
TATOU AMIO?**

*Le au uso e, o le toe 'upu lenei; o mea
uma ua moni, o mea uma ua ta'uleleia,
o mea uma ua tonu, o mea uma ua
mamā, o mea uma ua matagofie, o mea
uma ua logoleleia, afai fo'i o se isi amio
lelei, po o se tasi mea e vi'ia, ia outou
manatunatu i ia lava mea. **Filipi 4:8***

Mau e Tau i ai: Roma 12:9, 10; 13:14;
Kalatia 5:22-26; Salamo 119:11, 37, 40

**(12) A O FA'ATELEINA LO
TATOU MALAMALAMAGA I LE
UIGA O LE ATUA E ALA I LE
MANATUNATU LOLOTO I LANA
AFIOGA MA LONA MAMALU, O
LE Ā LE I'UGA MO I TATOU MA
LE ĀFĀINA AI O LA TATOU
MOLIMAU ATU I ISI?**

*A o i tatou uma, o lo'o va'ava'ai i tatou i
le pupula o le Ali'i e peiseā'ī o i se
fa'aata ma o tatou mata, e lē ufitia, ua
liua ai i tatou ua foliga i ai nai le
pupula e o'o i le pupula, fa'apei ona mai
le Ali'i le Agaga. **II Korinito 3:18***

Mau e Tau i ai: I Korinito 15:48, 49;
Kenese 30:37-39; I Tupu 11:2-4; Roma

12:2; Efeso 4:23, 24; Salamo 106:35

A o tatou manatunatu i le ato'atoa o le Fa'aola, o le a tatou fa'anaunau ina ia suia ma fa'afouina ato'atoa i tatou i le fa'atusa o Lona mamā. O le a lagona le fia 'ai ma le fia inu i le agaga ina ia pei o Ia Lē o lo'o tatou vi'ia. O le tele o le tatou mafaufau i a Keriso, o le a tele fo'i lea ona tatou talanoa atu i isi tagata e fa'atatau i a te Ia ma fa'ailoa atu Ia i le lalolagi.

(13) O AI O LE A FA'AMALAMALAMAINA MA FA'APOTOINA E LE AFIOGA A LE ATUA?

E sao le tulafono a Ieova, e fa'afo'isia mai ai le agaga; e fa'amaoni poloa'iga a Ieova, e fa'apotoina ai lē ua faigofie.
Salamo 19:7

Mau e Tau i ai: I Korinito 2:9-16;
1:18-31; Roma 8:5,6; I Ioane 4:5, 6;
Ioane 16:13; 14:17; I Timoteo 6:19-21

O le Tusi Pa'ia e le'i tusia mo na'o ē atamamai; e leai, na fuafuaina fo'i mo tagata lautele. O 'upu moni e tatau mo le fa'aolataga ua fa'amalamalamaina ma le manino e pei o le tūtonu o le lā; ma e leai se tasi o le a sesē ma lē iloa le auala vaganā i latou o ē mulimuli i o latou lava manatu a e lē o le finagalo o le Atua ua fa'ailoa mai ma le manino.

(14) AISEĀ UA MATUĀ MANA'OMIA AI LE SU'ESU'E E LE TAGATA LAVA IA O LE AFIOGA A LE ATUA?

*Ia e taumafai ina ia 'avea 'oe ma lē ua
fiafia mai i ai le Atua, o lē faigaluega e
leai se mea e mā ai, na te
vaevaetonuina le 'upu moni.*

II Timoteo 2:15

Mau e Tau i ai: II Timoteo 3:15-17; II
Peteru 1:5, 10, 15; Salamo 119:24, 41,
105, 130; I Korinito 10:6, 11; Roma
15:4; Ioane 17:17

E lē tatau ona tatou aveina se
molimau a so'o se tagata pe o le ā le
a'oa'oga a le Afioga a le Atua, a e ao
ona su'esu'e le 'Upu mo i tatou lava ia.
Afai e tatou te fa'atagaina isi e mafaufau
mo i tatou, o le a afāina lo tatou malosi
ma mea e mafai ona tatou faia. O le
malosi o le mafaufau o le a lē tupu ona
o le lē fa'agaoioia i autū tāua e tatau ona
fa'aogātotonu a o le a lē iloa ma lē
mafai ona maua le uiga loloto o le
afioga a le Atua. O le a lē fa'alauteleina
le mafaufau pe afai e fa'aaogā i le
fa'ailogaina o le feso'ota'iga o matā'upu
o le Tusi Pa'ia, e fa'atusatusa mau o le
Tusi Pa'ia i mau o le Tusi Pa'ia, ma mea
fa'aleagaga i mea fa'aleagaga.

E leai se isi auala e fa'amalosia ai
le mafaufau nai lo le su'esu'eina o le
Tusi Pa'ia. E leai se isi tusi e sili atu
lona malosi e si'itia ai manatu, e avatu
ai le malosi i le mafaufau, e pei o le
lautele o 'upu moni e atina'e ai o lo'o i le
Tusi Pa'ia. Pe ana su'esu'eina e tagata le
Afioga a le Atua e pei ona tatau ai, se
manū o le a fa'alauteleina le mafaufau o
tagata, e amio tusa'afia, ma o le a
tumau i fa'avae ua seāseā va'aia i nei
ōna pō.

**(15) O LE Ā LE ITU'AIGA
SU'ESU'EGA O LE A MATUĀ
MANUIA TELE AI I TATOU?**

*Ua ou teu i lo'u loto Lau afioga, ina ne'i
ou agasala iā te 'Oe. Salamo 119:11*

Mau e Tau i ai: Salamo 119:97; 1:2;
37:31; 40:8; Iopu 22:22; Ieremia 15:16;
Kolose 3:16

E itiiti lava se aogā e maua mai le
faitauina fa'anatinati o le Tusi Pa'ia. E
mafai ona faitau e se tasi le Tusi Pa'ia i
lona ato'atoa a e aunoa ma le va'aia o
lona matagofie pe malamalama i le
loloto ma uiga lilo. A tasi se vaega e
su'esu'eina se'ia manino i le mafaufau le
aogā ma ua fa'amaonia lona so'otaga ma
le fuafuaga o le fa'aolataga, e sili atu le
tāua nai lo le faitauina o matā'upu e tele
a e leai se mafua'aga mautinoa e va'ai
aga'i i ai ma e lē o maua ai se a'oa'oga.
Ia e taofi mau i lau Tusi Pa'ia. A i ai lou
avanoa, faitau i ai; ia e manatua mau i
lou mafaufau. E tusa lava pe o e savali i
le auala e mafai ona e faitau se mau ma
mafaufau loloto i ai, o le a fa'amautū ai
lea i lou mafaufau.

**(16) E FA'APEFEA ONA TATOU
AMATA LE SU'ESU'EINA O LE
TUSI PA'IA INA IA TATOU
MALAMALAMA TONU AI I ŌNA
'UPU MONI LOLOTO?**

*Auā o lo'o i ai le 'upu ma le 'upu, o le
'upu ma le 'upu; o le vavao ma le vavao,
o le vavao ma le vavao; o sina mea itiiti
i'inei ma sina mea itiiti i inā. Isaia
28:10*

Mau e Tau i ai: Isaia 28:13; I Timoteo 4:15, 16; Ioane 14:26; 16:13; Ieremia 29:13; Ioane 5:39; Galuega 17:11

E lē mafai ona tatou maua le potō e aunoa ma le su'esu'e ma le loto fa'amaoni ma le tatalo. O isi vaega o le Tusi Pa'ia e tonu e matuā faigofie ona malamalama i ai, peita'i e i ai fo'i nisi e lē o ta'atia mai i luga o latou uiga ina ia iloa atu pe na'o se va'ai. E tatau ona fa'atusatusa lava le Tusi Pa'ia i le Tusi Pa'ia. E ao ona su'esu'eina ma le matuā fa'aeteete ma le agaga tatalo; ma o le a tauia lenā su'esu'ega. E pei ona maua e le tagata 'eli mea le aūtū e maua ai ma'a tāua ua fa'alilo i lalo ifo o le fogā'elele, o le a fa'apea lē e sa'ili ma le naunauta'i le afioga a le Atua e pei o ma'a tāua ua natia le maua o le 'upu moni e pito sili ona tāua, o lo'o fa'alilo mai le va'ai a lē e sa'ili ma le lē fa'autauta. O 'upu e fa'aosofia ai le agaga, ma manatunatu loloto i ai, o le a pei o vaitafe lemū e tafe mai le puna o le ola.

**(17) AISEĀ E TĀUA AI LE
TATALO MO LE
FA'AMALAMALAMAGA O LE
AGAGA PA'IA A E TATOU TE
LE'I SU'ESU'EINA LE AFIOGA A
LE ATUA?**

*Ia e vala'au mai iā te A'u, ona 'Ou tali atu ai lea iā te 'oe, ma 'Ou fa'aali atu iā te oe o mea tetele ma le faigatā, o mea ua e lē iloa. **Ieremia 33:3***

Mau e Tau i ai: Ieremia 29:12; Ioane 14:26; 16:13; Salamo 145:18; I Korinito 2:9-11

E lē tatau ona su'esu'eina le Tusi Pa'ia e aunoa ma le tatalo. A o le'i tatalaina ona itulau e ao ona tatou ōle atu mo le fa'amalamalamaga a le Agaga Pa'ia, ona tu'uina mai ai lea. Ina ua sau Natanielu iā Iesu, na fetalai atu le Fa'aola, "Fa'auta, o le Israelu moni, e leai sona pepelo!" Na fai mai Natanielu iā te Ia, "Na e silafia a'u i fea?" Sa tali atu Iesu, "Na Ou iloa 'oe i lalo o le mati, a o le'i vala'au atu lava Filipino iā te 'oe" (Ioane 1:47, 48). Ma o le a silafia fo'i e Iesu i tatou i nofoāga lilo e fai ai talosaga pe afai o le a tatou sa'ili o Ia mo le malamalama ina ia mafai ona tatou iloa po o le ā le 'upu moni. O agelu mai le lalolagi o le malamalama o le a fa'atasi ma o latou o ē sa'ili i le loto maulalo mo le ta'ita'iga fa'alelagi.

(18) O AI O LO'O ALA MAI AI LE FA'AALIGA O LE 'UPU MONI FA'ALEAGAGA?

A e a maliu mai o Ia, o le Agaga lea e tupu mai ai le 'upu moni, e ta'ita'i e Ia iā te outou i upu moni uma; auā e lē tautala fua Ia na o Ia, a o mea uma e fa'logo i ai o Ia, e tautala a'i lava, ma fa'aailoa mai iā te outou mea e o'o mai.
Ioane 16:13

Mau e Tau i ai: Ioane 16:8; 14:17, 26; 15:26; Kalatia 5:16; Sakaria 12:10; II Peteru 1:21

O le Agaga Pa'ia na te fa'aeaina ma fa'amamaluina le Fa'aola. O Lana galuega o le fa'aailoa atu lea o Keriso, o le mamā o Lona amiotonu, ma le fa'aolataga tele ua tatou maua e ala iā te

Ia. Ua fetalai mai Iesu, "O Ia lava e
vivi'i mai iā te A'u, auā e maua e Ia mai
iā te A'u, ma fa'ailoa atu ai iā te outou"
(Ioane 16:14). O le Agaga o le 'upu
moni o le faia'oga moni lea o le 'upu
moni a le Atua. E fa'apea ona tāua i le
Atua le aigā tagata, talu ai ua Ia aumaia
Lona Ālo ia maliu mo i latou ma tofia
Lona Agaga ia 'avea o le a'oa'o ma le
ta'ita'i o le tagata i taimi uma!

*Ou te maua i totonu o le Afioga a le
Atua le a'oa'oina, onosa'i,
fa'amafanafanaga, ma le fa'amoemoe.
Ua ou tatalo iā te Ia mo se
fa'anaunauga e su'esu'e ai ina ia mafai
ona ou teuina Lana 'upu moni i lo'u loto
ma ia 'aua ne'i ou agasala.*

Li'o le tali: Ioe Lē mautonu

*Ou te tatalo mo le Agaga Pa'ia ia 'avea
ma o'u Faia'oga ma ia tu'u iā te a'u se
lotomaulalo. Ou te tatalo mo le poto ia
mafai ai ona ou tu'utonu 'upu i luga o
'upu, o tulafono i luga o tulafono ma ia
malamalama i le 'upu moni.*

Li'o le tali: Ioe Lē mautonu

*O lo'u fa'amoemoe ia sa'ili le Ali'i ma
lo'u loto, o le mafaufau, ma le agaga
atoa. O le fa'anaunauga o lo'u loto ia
malamalama i le ta'ita'iga a le Agaga
Pa'ia ina ia ou savali i le malamalama
mai le Afioga a le Atua ua fa'asusuluina
i le ala o le ola e fa'avavau.*

Li'o le tali: Ioe Lē mautonu



Lesona 12

O Le Avanoa Mana'omia O Le Tatalo

(1) AISEĀ E MATUĀ TĀUA AI LE SO'OTAGA MA LE ATUA E ALA I LE TATALO?

*Ona outou vala'au ai lea iā te A'u, e ō fo'i outou ma tatalo iā te A'u, Ou te te fa'alogo fo'i iā te outou. **Ieremia 29:12***

Mau e Tau i ai: Ieremia 31:9; Salamo 50:15; 102:17; Isaia 65:24; Mataio 7:7, 8

O le Atua e fetalai mai iā te i tatou e ala i mea na Ia foafoa ma fa'aaliga, mai Lona mana ma le musumusuga o Lona Agaga Pa'ia. Peita'i e lē o lava ai i

inei; e mana'omia ia sasa'a atu o tatou loto iā te Ia. E ao ona i ai se tatou feso'ota'iga vāvā lalata ma Ia ina ia mafai ona tatou maua le olaga fa'aleagaga ma le malosi. E mafai ona tosina atu o tatou mafaufau iā te Ia; e mafai ona tatou manatunatu i Āna galuega, o Lona alofa tunoa, o Āna fa'amanuiāga, a e lē o ato'atoa la tatou feso'ota'iga ma Ia. E tataua ona i ai sa tatou talanoaga ma Ia e fa'atatau i o tatou olaga pe afai e tatou te feso'ota'i atu i le Atua.

O le tatalo o le tatalaina atu lea o le loto i le Atua e pei ona tatala atu i se uō. E lē fa'aapea e mana'omia ina ia fa'aailoa atu i le Atua pe o ai tatou, a e ina ia mafai ai ona tatou talia o Ia. O le tatalo e lē aumaia ai le Atua i lalo iā i tatou, a e ia 'ave a'e ai tatou i luga iā te Ia.

(2) O LE Ā LE MEA UA FETALAI IESU IA TATOU FAIA A O TATOU Ō ATU IĀ TE IA I LE TATALO?

Ia tu'uina atu iā te Ia mea uma tou te popole ai, auā o lo'o manatu mai o Ia iā te outou. I Peteru 5:7

Mau e Tau i ai: Filipi 4:6, 7; Salamo 55:16-18; 34:5-8, 15-20; 60:8; Ieremia 33:3; II Nofoa'iga Tupu 7:14

A o i ai Iesu i le lalolagi, na Ia a'oa'o Ōna so'o pe fa'aapefea ona tatalo. Na Ia fa'asino i latou ia tu'uina atu o latou ana'oga o aso ta'itasi i luma o le Atua, ma ia lafoa'i atu uma a latou 'avega iā te Ia. O le mautinoāga na Ia tu'uina atu iā i latou o a latou talosaga e

fa'afofogaina, o le mautinoāga fo'i lea mo i tatou.

(3) A O MAFUTA KERISO I LE LALOLAGI, O LE Ā LE FA'ATA'ITA'IGA NA IA TU'U MAI FA'ATATAU I LE FESO'OTA'IGA MA LE TAMĀ I LE TALOSAGA?

O le taeao ua al pō ai o Ia, ona ulufafo lea o Ia ma maliu atu i le mea tu'ufua, ma tatalo ai. Mareko 1:35

Mau e Tau i ai: Mareko 6:46; Mataio 6:6; 14:23; Luka 6:12; I Peteru 2:21

O Iesu lava ia, a o fa'atasi ma tagata, na Ia tatalo so'o. O lo tatou Fa'aola e masani ma o tatou mana'oga ma vaivaiga, sa 'avea o Ia o se tasi na ōle atu, na fa'atoga ma sa'ili atu mo le malosi fou, ina ia mafai ona tula'i atu a e ua sauni mo tiute ma tofotofoga. O Ia lo tatou fa'aa'oa'o i mea uma lava. O Ia lo tatou uso i o tatou mafatiāga, "na tofotofoina pei o tatou i mea uma lava;" a e ona o Ia e le'i agasala o Lona uiga moni na 'alo'ese ai mai le leaga; sa onosa'i Ia i tigā ma faigatā o le agaga i le lalolagi agasala. O Lona itu tagata na 'avea ai le tatalo o se mea e mana'omia ma se fa'amanuiāga. Na Ia maua le fa'amafanafanaga ma le 'oli'oli i le so'otaga ma Lona Tamā. Ma pe afai o le Fa'aola o tagata, le Ālo o le Atua, na lagona le mana'omia o le tatalo, pe le sili atu ai fo'i i le tagata vaivai ma le agasala ona lagona le mana'omia tele o le tatalo fa'atauānau e lē aunoa.

(4) E FA'APEFEA LE TATAU

ONA TATOU Ō ATU I LE ATUA I LE TATALO?

O le mea lea ia tatou fa'alatalata atu ai ma le fa'amalosi i le nofoali'i o le alofa tunoa, ina ia alofaina ai o i tatou, ia maua ai fo'i le alofa tunoa e fesoasoani mai i ona aso e tatau ai. Eperu 4:16

Mau e Tau i ai: Filipi 4:6, 7; Efeso 2:18; 3:12; Isaia 55:6; Mataio 7:7-11; I Peteru 5:7

O lo tatou Tamā i le lagi o lo'o fa'atali e fo'ai mai iā te i tatou le ato'atoa o Āna fa'amanuiāga. O le tatou avanoa o le feinu lea i le vaipuna o Lona alofa e lē fa'atuā'oia. O se mea e ofo ai ona e itiiti lava se taimi tatou te tatalo ai! Ua sauni le Atua ma e finagalo e fa'afofoga i le tatalo fa'atauānau a so'o se tasi o Lana fanau, a e peita'i o lo'o fa'atino le tele o lo tatou lē loto atu e fa'ailoa o tatou mana'oga i le Atua. Pe o ā fo'i ni manatu o agelu o le lagi i a i tatou o tagata mafatia, o ē feagai pea ma fa'aosoosoga, a o le finagalo alofa o le Atua o lo'o naunau mai iā te i latou, ua sauni e tu'uina mai iā i latou mea e sili atu i lo mea e ōle atu pe mafaufau i ai, a e itiiti se taimi e tatalo ai ma e itiiti fo'i le fa'atuatua? O agelu e fiafia e ifo i luma o le Atua; e fia latalata i latou iā te Ia i taimi uma. O lo latou oli'olisaga sili o lo latou feso'ota'iga ma le Atua, a e o le fanau a le lalolagi, o ē sili atu ona latou mana'omia le fesoasoani e na'o Ia e mafai ona maua mai ai, e foliga mai ua malilie e savavali e aunoa ma le malamalama o Lona Agaga, le 'au'aumea ma Ia i Lona fa'atasi ai.

**(5) O Ā ALA E LUA IA
MANUMALŌ AI MAI
FA'AOSOOSOGA?**

*Ina outou mataāla ma tatalo, ina ne'i
o'o mai le fa'aosoosoga iā te outou; ua
mana'o i ai le loto, a e o le tino ua
vaivai. Mataio 26:41*

Mau e Tau i ai: Luka 21:36; Mareko
14:38; 13: 37; Kalatia 5:16; Iakopo 4:7,
8; 1:2-5; Mataio 7:7

O le pouliuli o le amioleaga e
si'omia ai latou e lē ma'elegā e tatalo. O
fa'aosoosoga e musumusu mai e le fili e
tosina ai i latou ia agasala; ma e mafua
ona o lo laltou lē fa'aaogāina o le
avanoa ua tu'uina mai e le Atua iā te i
latou e feagai ai ma talosaga. Aiseā e
fa'atamala ai le fanau a le Atua e tatalo,,
pe afai o le tatalo o le ki i le lima o lē
fa'atuatua e tatala ai fale teu'oa a le lagi,
o lo'o teu ai le puna o fa'amanuiāga a Lē
e mafaia mea uma lava? A leai se tatalo
e lē aunoa ma lē mataāla o le a tatou i ai
i le faigatā o le tutupu a'e ma le lē
fa'autauta ma alu sesē mai le ala tonu. O
lo'o sa'ili le fili i taimi uma ia tu'uina
mea e fa'alavelave ai i le ala i le nofoa o
le alofa tunoa, ina ia tatou lē mafai ona
maua le alofa tunoa ma le malosi e
tete'e ai fa'aosoosoga e ala i le ōle
fa'atauānau ma le loto maulalo.

**(6) E PEI O TAVITA, O LE Ā LE
TULAGA FA'ALEAGAGA E
TATAU ONA TATOU I AI INA IA
TALI MAI AI LE ATUA I A TATOU
TALOSAGA?**

Le Atua e, o lo'u Atua lava 'Oe; ou te ala sa'ili iā te 'Oe; ua fia inu lo'u agaga iā te 'Oe, ua ou naunau atu iā te 'Oe i le nu'u naumati, e lailoa ai, e leai ni vai.
Salamo 63:1

Mau e Tau i ai: Isaia 44:3; 41:17; 48:21; Ioane 4:10; 7:37-39; Fa'aaliga 21:6; 22:17

E i ai tulaga ua tatou iloa e fa'afofoga mai ai le Atua ma talia a tatou talosaga. O le tasi o nei mea muamua o lo tatou lagona e mana'omia le fesoasoani mai iā te Ia. Ua Ia folafola mai, "Ou te liligi le vai i luga o lē e fia inu, ma le suāvai i luga o le fanua matūtū." O i latou e fia 'a'ai ma fia inu i le amiotonu, o ē fa'anaunau i le Atua, e mautinoa e fa'atumuina i latou. E tatau ona tatalaina le loto i le musumusuga a le Agaga Pa'ia, a e a leai, o le a lē maua fa'amanuiāga mai le Atua.

(7) O Ā LA'ASAGA E TOLU E TATAU ONA TATOU 'AVEINA INA IA MAUA AI TALO A TATOU TALOSAGA?

*'Ou te fai atu fo'i A'u iā te outou, Ia outou ole atu, ona foa'iina mai ai lea iā te outou; ia outou sa'ili, ona outou maua ai lea; ia outou tu'itu'i atu, ona tōina mai ai lea i a te outou. **Luka 11:9***

Mau e Tau i ai: Ieremia 33:3; Mataio 21:22; Salamo 50:15; 118:5; 91:14, 15; Isaia 55:6

O le tatou mana'oga e aupito sili o le fa'a'upuina o le finauga ma ōlega mo i

tatou lava. A e peita'i ia matuā sa'ili le Ali'i ina ia na faia ia mea mo i tatou. Ua Ia fetalai mai, "Ia outou ōle atu ona foa'iina mai ai lea iā te outou" (Mataio 7:7). Ma fa'aapea mai fo'i, "O Ia lava sa na lē fa'asaoina Lona lava Ālo, a ua tu'uina mai o Ia e sui a'i i tatou uma lava, e lē foa'i fua mai ea e Ia iā te i tatou mea uma lava fa'atasi ma Ia i se ā?" (Roma 8:30).

(8) E FA'APEFEA ONA AFĀINA A TATOU TALOSAGA I LE FOUVALE?

O lē ua liliu 'ese ona taliga a e lē fa'alologologo i le tulafono, e inosia lana lava tatalo. Fa'ata'oto 28:9

Mau e Tau i ai: Isaia 1:15, 16; Sakaria 7:11-13; Fa'ata'oto 15:8-10; Salamo 66:18; 109:7

Pe a o tatou manatu i le solitulafono i o tatou loto, afai tatou te taofimau i se agasala ma le iloa, o le a lē fa'afofoga mai le Ali'i; a e o le tatalo alē ua salamō fa'amaoni e talia lava. Pe afai ua fa'asa'o sesē o lo'o iloa, e mafai ona tatou talitonu o le a talia e le Atua a tatou ōlega. E lē o so tatou lelei o le a ta'uleleia ai tatou i luma o le Atua; o le amiotonu o Iesu o le a lavea'ina ai tatou, o Lona toto e fa'amamāina ai tatou; a e peita'i e i ai la tatou galuega e fai ina ia feagai ma tulaga o le taliaina.

(9) O LE Ā LE MEA TĀUA E SOSO'O I LE MAUA O TALII O Ā TATOU TALOSAGA?

O le mea lea 'Ou te fai atu ai iā te outou, o mea uma lava tou te ōle mai ai i a outou tatalo, inā fa'atuatua ia o le a maua e outou, ona faia lea mo outou.
Mareko 11:24

Mau e Tau i ai: Iakopo 1:6; Mataio 21:22; Mareko 11:22-24; I Timoteo 2:8

O le isi vaega o le tatalo fa'atauānau o le fa'atuatua lea. "Auā e tatau i lē alu atu i le Atua ona talitonu o lo'o soifua o Ia, o Ia fo'i Nate tauia mai o ē matuā sa'ili iā te Ia" (Eperu 11:6). E tatou te talitonu ea i Lana Afioga?

O le mautinoāga e lautele ma e lē fa'atuā'oia, ma e fa'amaoni o Ia Lē na folafolaina mai. Pe afai ua tatou lē maua mea na tatou ōle atu ai, i le taimi na tatou ōle atu ai, e tatau lava ona tatou talitonu e fa'afofoga mai le Ali'i ma e Na te talia fo'i a tatou talosaga. O i tatou e sesē ma e lē alu mamao la tatou va'ai, e i ai taimi tatou te ōle atu ai mo mea e lē maua ai so tatou manuia, ma ona o le alofa o lo tatou Tamā i le lagi e Na te tali a tatou tatalo e ala i le tu'uina mai iā te i tatou mea e sili atu mo lo tatou lelei - o mea e tatou te naunau i ai pe ana fai o la tatou va'ai e fa'amalamalamaina e le Agaga ma mafai ai ona tatou iloa atu mea uma e pei ona i ai. Pe afai e foliga mai ua lē talia a tatou tatalo, e ao ona tatou taofi mau i Āna folafola; o le taimi o le taliina e mautinoa e o'o mai lava, ma o le tatou maua le fa'amanuiāga e sili ona tatou mana'omia. A e afai tatou te fa'apea o le a taliina le tatalo i le ala tonu lava ma le mea e tasi o lo'o tatou naunau i ai, o se manatu lea e lē talafeagai. O le Atua e silisili le poto, e

lē mafa'asesēina, ma e silisili Lona lelei e Na te lē taofia se mea lelei mai iā i latou e savavali ma le agatonu. O lea ia 'aia ne'i e fefe e fa'atuatua iā te Ia, e ui ina e lē o va'aia le tali o āu tatalo i lea lava taimi. Ia fa'alagolago i Lana folafola 'auā e mautinoa, "Ai sē ōle atu, e maua e ia."

(10) PE A TATOU FA'AILOA ATU I SE LOTO MAULALO MA LE FA'ATUATUA I LE ATUA O TATOU MANA'OGA, O LE Ā LE FOLAFOLAGA TELE E MAFAI ONA TATOU TAPAINA?

O lenei fo'i le fa'amalosī ua tatou maua i Ōna luma, pe afai tatou te ōle atu ai se mea e tusa ma Lona finagalo, e fa'afofoga mai o Ia iā te i tatou. Afai fo'i ua tatou iloa, e fa'afofoga mai Ia iā te i tatou i se mea tatou te fa'atoga atu ai, ua tatou iloa e maua e i tatou mea tatou te fa'atoga atu ai iā te IA. I Ioane 5:14, 15

Mau e Tau i ai: Mataio 7:7-11; Efeso 3:12-14; 10:35

Afai e tatou te fa'atāua o tatou masalosalo ma mea tatou te fefefe ai, pe taumafai e sa'ili tali o mea uma e lē o manino i lo tatou va'ai, a e leai so tatou fa'atuatua, o le a fa'ateleina ma loloto le femēmēa'i. A e afai tatou te ō atu i le Atua, e lagona ua mana'omia le fesoasoani auā o lo tatou tulaga moni lea, ma a tatou ō atu ma le fa'amaulalo, talitonu, fa'atuatua, ma fa'aali atu uma o tatou mana'oga iā te Ia Lē e silafia mea uma, e silasila i mea uma o le foafoāga,

ma o lo'o pulea mea uma e ala i Lona finagalo ma Lana afioga, Na te mafai ma e fa'afofoga o Ia i la tatou tagi atu, ma o le a fa'asusulu le malamalama i o tatou loto. E ala i le tatalo fa'atauānau o le a aumaia ai le feso'ota'iga ma le finagalo o le Silisili 'Ese. Atonu e leai se fa'amaoniga manino i le taimi a o punou le Fa'aola ma silasila ifo Ōna fofoga alofa mutimutivale ma le fa'apalepale i luga iā i tatou. Atonu tatou te lē o lagonaina Lona pa'i mai, a e o Lona 'a'ao fa'apalepale ma le tigāalofa o lo'o i o tatou luga.

(11) E FA'APEFEA ONA TATOU MAUA LE FA'AMAGALOGA MAI LE ATUA?

Auā afai tou te fa'amagaloina atu tagata i a latou agasala, e fa'amagaloina fo'i outou e lo tatou Tamā o i le lagi. A e afai tou te lē fa'amagaloina atu tagata i a latou agasala, e lē fa'amagaloina fo'i e lo outou Tamā a outou agasala. Mataio 6:14, 15

Mau e Tau i ai: Mataio 6:12; 18:21-35; Luka 7:40-48; 11:4

Afai tatou te ō atu e talosaga mo le alofa tunoa ma fa'amanuiāga mai le Atua e tataua ona iā i tatou le agaga o le alofa ma le fa'amagalo i o tatou fo'i loto. E fa'aapefea le mafai ona tatou tatalo, "Ia e fa'amagalo mai iā matou agasala, e pei o i matou fo'i ona fa'amagaloina atu i ē agaleaga mai i a te i matou," a e o lo'o iā i tatou le agaga o le lē fa'amagalo atu? Afai tatou te manatu ia fa'afofogaina a

tatou tatalo, ia tatau ona tatou
fa'amagalo atu i isi i le ala e tasi e pei
ona tatou manatu e fa'amagaloina ai
tatou.

**(12) E FA'AFIA LE TATAU I O
TATOU LOTO ONA
SO'OFA'ATASI MA LE ATUA I LE
AGAGA O TALOSAGA?**

*Ia outou finafinau i le tatalo,, ia
mataāla i lea mea ma le fa'afetai.*

Kolose 4:2

Mau e Tau i ai: Kolose 4:12; Luka
21:36; I Tesalonia 5:17; Salamo 55:17;
86:3; Efeso 6:18

O le filigā i le tatalo ua 'avea o se
tulaga mo le taliina o talosaga. E ao ona
tatou tatalo e lē aunoa pe afai o le a
tatou tuputupu a'e i le fa'atuatua ma mea
e o'o mai o le olaga. E tatau ona tatou
"finafinau i le tatalo" (Roma 12:12). Sa
fa'amalosi atu Peteru i le 'au fa'atuatua
ina "ia fa'autauta ai, ma ia mataāla
outou ma le tatalo" (I Peteru 4:7). Na
apoapoa'i fo'i Paulo, "A ia fa'aali atu o
outou mana'o i mea uma lava i le Atua, i
le tatalo, ma le fa'atoga, atoa ma le
fa'afetai" (Filipi 4:6). Ua fai mai Iuta,
"A o outou le 'au pele e, ia outou atia'e
iā te outou i lo outou e fa'atuatua e
silisili ona pa'ia, o le Agaga Pa'ia tou te
tatalo ai, ia outou fa'atumau iā te outou i
le alofa o lo tatou Ali'i o Iesu Keriso, e
o'o atu i le ola e fa'avavau" (Iuta 20,
21). O le tatalo e lē motusia o le
mafutaga lea e lē motusia a le agaga ma
le Atua, ina ia mafai ona fa'atafe mai le
ola mai le Atua i o tatou olaga; ma e

mai o tatou olaga, o le pa'ia ma le mamā e toe tafe atu i le Atua.

E ao ona i ai le filigā i le tatalo; e lē tatau ona i ai se mea e fa'alavelave iā i tatou. Ia faia uma taumafaiga ina ia matala ai pea le feso'ota'iga i le vā o Iesu ma o tatou agaga. Sa'ili avanoa uma ia fa'atasi ai i mea uma e fai ai talosaga. O i latou e matuā sa'ili ina ia feso'ota'i ma le Atua e va'aia i fono tatalo, e fa'amaoni i o latou tiute ma e ma'elegā ma naunau e selesele mai fa'amanuiāga e mafai ona latou maua. E latou te fa'aleleia avanoa uma e tu'uina ai i latou i le mea e maua ai 'ave o le malamalama mai le lagi.

Ou te fa'afetai i le Atua mo le avanoa ofoofogia ua Ia tu'u mai iā te a'u e mafai ai ona ou alu atu iā te Ia i le tatalo, i so'o se taimi, e ala iā Keriso.

Li'o le tali: Ioe Lē mautonu

Ua ou iloa o le feso'ota'iga ma le Ali'i i talosaga o la tatou so'otaga fa'aola lea i le lagi. O lo'u fa'amoemoega ia ola i le so'otaga faifai pea ma Ia ma ia maua Lana mafutaga filemū e ala i le meaalofo o le tatalo.

Li'o le tali: Ioe Lē mautonu

Ou te fa'atuatua ma talitonu e fa'afofoga ma tali mai le Atua i a'u tatalo i Lona lava taimi atofaina ma e fa'atatau i Lona finagalo.

Li'o le tali: Ioe Lē mautonu

Ua ou talia le vala'au a le Atua ia ou

*sau "fa'amalosia i luma o Lona nofoali'i
o le alofa tunoa" i le tatalo ina ia ou
maua le fesoasoani, le alofa tunoa, ma
le alofa mutimutivale o lo'o ou
mana'omia i aso ta'itasi o la'u savaliga
ma Ia.*

Li'o le tali:

Io e

Lē mautonu

[illegible]



Lesona 13

O Le Mana O Le Tatalo

(1) O LE Ā LE I'UGA O LE TATALO E FAI TO'ATASI?

*A o 'oe, pe a e tatalo, inā ūlu atu ia i lou
afeafe, ma pupuni lona puipui, i le e
tatalo ai i lou Tamā o i le mea lilo; o
lou Tamā fo'i o Lē silasila i le mea lilo,
na te avatu fa'aaliali se tau i iā te 'oe.
Mataio 6:6*

Mau e Tau i ai: Salamo 34:15-19;
86:5-7; 50:15; 55:16; Isaia 65:24; Eperu
4:16; Roma 8:26, 27; 10:12; Iakopo
5:16

E ao ina tatou tatalo i le li'o o le
aiga, a e sili a'e ia 'aia le fa'atamala i le
tatalo i le mea lilo, auā o le ola lea o le

agaga. E lē mafai ona olaola lelei le agaga pe afai e fa'atamala i le tatalo. O le tatalo i le aiga po o le tatalo faitele e lē lava lea. Ia fa'aali atu le agaga i le silafaga a le Atua i se nofoāga tu'ufua. A o le tatalo lilo, ia na'o le Atua Na te fa'afofogaina. Ia lē tataui i taliga o le fia iloa ona fa'alogo i 'avega o ōlega vaganā le Atua fa'afofoga tatalo. O le tatalo fa'alilo e ao ina sa'oloto mai a'afiāga o le si'osi'omaga, sao mai le vevesi. E to'afilemū a e naunauta'i, o le a o'o atu i le Atua. E suamalie ma māfana le so'ota'iga ma Ia o Lē silasila i le mea lilo, e fa'afofoga o Ia i le tatalo e alu a'e mai le loto. E ala i le to'afilemū ma le fa'atuatua e feso'ota'i atu le agaga i le Atua ma e fa'apotopoto mai 'ave o le malamalama fa'aleagaga e fa'amalosia ma tausia o ia i le fete'ena'iga ma Satani. O le Atua o lo tataou 'olo malosi.

Tatalo i lou afeafe, ma a o e feagai ma āu galuega i aso ta'itasi ia si'itia a'e lou loto i le Atua. Sa fa'apea ona faia ina o feōā'i Enoka ma le Atua. O nei talosaga lē leoa e ō a'e e pei o le asu o mea manogi i luma o le nofoāli'i o le alofa tunoa. E lē mafai e Satani ona fa'ato'ilaloina se tasi e tumau lona loto i le Atua.

(2) O LE Ā LE FA'ATONUGA MAI LENEI FUAU'UPU O LO'O FA'AMALOSIA AI LE TĀUA O LE TATALO?

Ia tatalo e lē aunoa. I Tesalonia 5:17

Mau e Tau i ai: Il Nofoa'igā Tupu

7:14; alamo 145:18, 19; Ieremia 29:12, 13

E leai se taimi pe o se nofoāga o le a lē ōno ma tatau mo le tu'uina a'e o talosaga i le Atua. E leai se mea e mafai ona taofia tatou mai le si'itiaina a'e o tatou agaga i le tatalo fa'atauānau. I le tumutumu o tagata i le alatele, i le totonugalemū o galuega fa'apisinisi, e maafai ona momoli atu se ōlega i le Atua ma 'ai'oi atu mo Lana ta'ita'iga, e pei onas faia e Ne'emias a o ia faia le talosaga i luma o le Tupu o Aretaseta. E mafai lava ona maua se afeafe e so'o se mea tatou te i ai.

E ao ona matala le faitoto'a o le loto i taimi uma ma la tatou vala'aulia e alu a'e pea iā Iesu ina ia afio ma mafuta mai o Ia o se malō fa'alelagi i totonu o le loto.

E ui atonu o lo tatou si'osi'omaga e leaga ma 'ele'elea, e lē mana'omia e tatou te mānavaina lona 'ea lē manuia, a e ia ola i le 'ea mamā o le lagi. E mafai ona tapunia uma faitoto'a i mafaufauga lē mamā ma manatu e lē pa'ia i le si'itia a'e o le agaga i le afio'aga a le Atua e ala i le tatalo fa'amaoni. O ē tatala o latou loto ina ia talia le tausiga ma fa'amanuiāga a le Atua o le a savavali i se si'osi'omaga e sili atu ona pa'ia nai lo le lalolagi ma o le a maua pea le feso'ota'iga ma le lagi.

(3) PE AFAI E TATOU TE FESO'OTA'I PEA MA KERISO I TAIMI UMA, O LE Ā SE I'UGA O LE A MAUA?

E te leoleoina ia fīfilemū lava lē ua mausalī lona loto; auā ua ia fa'atuatua

iā te 'Oe. Inā fa'atuatua ia outou i le Ali'i e fa'avavau lava; auā o le Ali'i le Atua, o le papa e fa'avavau Ia. Isaia 26:3, 4

Mau e Tau i ai: Filipi 4:6, 7; Ioane 14:27; 16:33; Salamo 9:10; 57:1; Ieremia 17:7, 8

E tatou te mana'omia le manino o la tatou va'ai iā Iesu ma ia ato'atoa ona tatou malamalama i le tāua o mea moni e fa'avavau. O le matagofie o le fa'apa'iaina ia fa'atumulia ai loto o le fanau a le Atua; ma ina ia mafai ona fa'ataunu'uina, e tatau ona tatou sa'ili'ili mo le fa'ailoa mai o mea fa'alelagi.

Ia tosina i fafo ma lugā le agaga, ina ia foa'iina mai e le Atua iā i tatou le mānava o le ola fa'alelagi. E mafai ona tatou latalata i le Atua ma o taimi uma e tatou te feagai ai ma tofotofoga tatou te le'i fa'amoemoeina o le a fa'asaga o tatou mafaufau iā te Ia e pei o le fugāla'au i lona uiga moni e fa'asaga i le lā.

(4) O LE Ā LE FOLAFOLAGA NA TU'U MAI E LE ATUA AGAALOFA I LĒ E LOTO MAFATIA?

E fa'amalōlōina e Ia ē ua loto momomo; e fufusi e Ia o latou manu'a. Salamo 147:3

Mau e Tau i ai: Salamo 51:17; 34:18; Isaia 57:15; 61:1; Hosea 6:1

Ia tu'u atu ou mana'oga, ou fiafiāga, fa'anoanoāga, mea e te popole

ai, ma mea e te fefe ai i luma o le Atua. E te lē mafai ona fa'atigāina o Ia; e te lē mafai ona fa'avaivaiina o Ia. O Ia Lē e faitauina lauulu o lou ulu, e amana'ia e Ia mana'oga o Lana fanau. "Ua mutimutivale tele le Ali'i ma le alofa naunau" (Iakopo 5:11). O Lona finagalo alofa e pā'ia e o tatou fa'anoanoāga e o'o lava i le tatou fa'aleoina o ia lagona. Ave iā te Ia mea uma e femēmēa'i ai le mafaufau. E leai se 'avega Na te lē mafai ona tau'ave, auā o Ia e Na te taofimauina i luga lalolagi, e pulea e Ia tualumaga uma o le atu laulau. E leai se mea e 'a'afia ai lo tatou filemū e fa'atauva'a iā te Ia ma Na te lē silafiaina. E leai se vaega o mea tatou te fai e pogisā tele mo Lana faitau; e leai ni lavelave e faigatā ona Ia talatalaina. E leai ni mala e o'o i se tasi e aupito fa'atauva'a o Lana fanau, e leai se mea e fa'apopoleina ai le loto, leai se 'alaga fiafia, e leai se tatalo fa'amaoni e alu 'ese mai laugutu, e lē mātauina e lo tatou Tamā o i le lagi, pe Na te lē amana'ia. O le feso'ota'iga i le vā o le Atua ma tagata ta'ito'atasi e manino lelei lava ma ato'atoa e pei e leai lava se isi tagata i le fogā'ele'ele e fa'asoa i ai Lana tausiga ma le va'aiga, e leai lava se isi agaga na Ia aumaia ai Lona Ālo pele.

(5) I LE SUAFA O AI E TATAU ONA TATOU TATALO I AI?

Ua lē filifilia A'u e outou, a e ua filifilia outou e A'u; ua 'Ou tu'uina atu fo'i outou, ia outouō, ma ia outou fua mai ni fua, ma ia tumau o outou fua; ina ia foa'i atu iā te outou e le Tamā mea uma lava tou te ōle atu ai iā te Ia i Lo'u igoa.

Ioane 15:16

Mau e tau i ai: Mataio 28:18, 19;
Roma 1:5; Galuega 2:38; Malaki 1:11

Sa fetalai atu Iesu, "E ōle atu outou i Lo'u igoa; 'Ou te lē fai atu fo'i iā te outou 'Ou te fa'atoga i le Tamā mo outou; auā e alofa mai lava le Tamā iā te outou" (Ioane 16:26, 27). A e o le tatalo i le suafa o Iesu o se mea e sili atu i lo le na'o le ta'uta'u o lea suafa i le amataga ma le fa'ai'uga o le tatalo. E ao ona tatalo i le mafaufau ma le agaga o Iesu, a e o lo'o tatou talitonu i Āna folafolaga, fa'alagolago i Lona alofa tunoa, ma fai Lana galuega.

(6) O Ā NI FA'AGAOIOIGA O GALUEGA FA'A-KERISIANO E TATAU ONA FAIA FA'ATASI MA A TATOU TALOSAGA MA TAPUĀ'IGA?

*O lenei lava le amio Atua e lelei ma le fa'amaoni i luma o le Atua o le Tamā lea, ina ia tauasiasi atu i ē ua matua oti ma fafine ua oti a latou tane i o latou tigā, ia leoleo fo'i o ia iā te ia, ina ne'i pisia mai o ia i le lalolagi. **Iakopo 1:27***

Mau e Tau i ai: Mataio 25:34-46; I Ioane 3:17-19; I Timoteo 1:5; Iopu 29:12, 13; Isaia 1:17; 58:6-11; Kalatia 5:6; 6:9, 10

E lē o le finagalo o le Atua ia 'avea i tatou o ni tagata e nonofo i mea tu'ufua po'o monika ma tu'umuli mai le lalolagi ina ia tu'uina atu uma tatou i fa'agaoioiga tau tapua'iga. O le olaga e

tatau ona fa'apei o le soifuāga o Keriso -
e i le vā o le mauga ma le motu o tagata.
O le tagata e leai se mea e fai a e na'o le
tatalo o le a vave mai le taimi e lē toe
tatalo ai, po o le a 'avea ana tatalo o se
masaniga e faifai pea. Pe afai e 'ave'ese
e tagata i latou mai le olaga o fiafiāga,
mamao mai le si'osi'omaga o tiute
fa'aKerisiano ma lu'iga o le olaga; pe a
ua latou lē toe galulue fa'amaoni mo le
Matai, o Lē na galue fa'amaoni mo i
latou, o le a lē iloa e latou le manatu
autū o le tatalo ma o le a leai se
mafuaga o le alofa fa'amaoni. O a latou
tatalo e mo i latou lava ma e manatu
fa'apito. E lē mafai e latou ona tatalo
fa'atatau i mana'oga a le fanau a tagata
po o le fausia a'e o le malō o Keriso, ma
ōle atu mo le malosia e faia ai le galuega.

(7) O LE Ā LE UIGA LOLOTO O LE MAFUTAGA FA'A- KERISIANO?

*'Aua le lafoa'iina le fa'apotopotoina o i
tatou, pei o le masani a isi, a ia
fefa'amafanafana'i; ia atili ai fo'i ona
fa'apea ina ua outou iloa o le aso ua
taulata mai. Eperu 10:25*

Mau e Tau i ai: I Tesalonia 5:11;
Mataio 18:20; Galuega 2:42; 20:7

E faia'ina pea tatou pe a tatou
fa'atalalē i le avanoa e fa'apotopoto
fa'atasi ai ina ia fefa'amalosia'i ma
lagolago e le tasi le isi i le galuega a le
Atua. O 'upu moni o Lana afioga o le a
lē iloa atu le manino ma le tāua i o tatou
mafau. O o tatou loto o le a gata mai
le fa'amalamalamaina ma le fafaguina e

gaoioiga e fa'apa'iaina ai, ma o le a fāi ifo ai lo tatou tulaga fa'aleagaga. I lo tatou 'au'aumea fa'atasi fa'a-Kerisiano o le a lē iloa mai iā i tatou le tele o mea ona ua leai se tigāalofa o le tasi mo le tasi. O le tagata e tapunia ia lava o le a ia lē fa'ataunu'u le tofiga na fuafuaina e le Atua e tatau ona i ai. O le atina'e lelei o vaega o le feso'ota'iga mai o tatou uiga moni e aumai ai iā te i tatou le tigāalofa mo isi ma o se auala e e atina'e ma fa'amalosia ai tatou mo le galuega a le Atua.

Pe ana fai e 'au'aumea fa'atasi Kerisiano, talanoa atu i isi i le alofa o le Atua ma 'upu moni tāua o le fa'aolataga, o o latou loto semanū e fa'afouina ma o le a fa'afouina ai fo'i nisi. Atonu o lo'o tatou a'oa'oina i aso ta'itasi nisi mea e fa'atatau i lo tatou Tamā i le lagi, ma maua se lagona fou o Lona alofa tunoa; o le a tatou fa'anaunau e tautala fa'atatau i Lona alofa; ma a o tatou faia lea mea, o o tatou fo'i loto o le a fa'amafanafanaina ma fa'amalosia. Pe afai tatou te mafaufau ma talatalanoa e fa'atatau iā Iesu, a e itiiti iā i tatou lava ia, o le a tatau ona fa'ateleina lo tatou manuia i Lona fa'atasi ai.

(8) PE A O TATOU MAFUTA FA'ATASI I LE FILEMŪ, O FEA E TATAU ONA FA'ATOTONUGALEMŪ I O TATOU MAFAUFAUGA MA MANATU ALOFA?

E te leoleoina ia fifilemū lava lē ua mausalī lona loto; auā ua ia fa'atuatua iā te 'Oe. Inā fa'atuatua ia outou i le Ali'i e fa'avavau lava; auā o le Ali'i le

*Atua, o le papa e fa'avavau Ia. Isaia
26:3, 4*

*Ia outou loto lava i mea i lugā, a e lē o
mea i le lalolagi.*

Kolose 3:2

Mau e Tau i ai: Isaia 57:19-21; Ioane
14:27; Salamo 91:14; 119:36-40;
Fa'ata'oto 23:5; Mataio 16:23; Roma
8:4-6; I Ioane 2:15

Pe ana fai e tatou te mafaufau so'o
i le Atua e pei ona iā i tatou fa'amaoniga
o Lana tausiga iā i tatou e tatau ona
tumau pea Ia i o tatou mafaufau ma e
tatau ona tatou fiafia e talanoa fa'atatau
iā te Ia ma vi'ia o Ia. E tatou te talanoa i
mea fa'alelalolagi auā e tatou te fiafia i
ai. Tatou te talanoa fa'atatau i o tatou uō
auā tatou te alolofa iā i latou; o o tatou
fiafia ma fa'anoanoāga e fusia fa'atasi ai
tatou. Peita'i e mautinoa e i ai le
mafuaga e sili atu e ao ai ona tatou alofa
i le Atua i lo o le alofa i a tatou uō
fa'alelalolagi; e tatau ona 'avea o le mea
e sili atu i le lalolagi 'atoa ma e
fa'amuumua i o tatou mafaufauga uma,
e talatalanoa i Lona agaalofo ma ta'u atu
Lona mana. O mea alofa matagofie ua
Ia tu'uina mai iā i tatou e lē ina ia
fa'atumu ai o tatou mafaufau ma matuā
fa'amalieina ai ona leai lea o se mea e
mafai ona avatu i le Atua; o ia mea e
fa'amanatu mai ai pea Ia iā i tatou ma
fusia ai i tatou i fusi o le alofa ma le
fa'afetai i Lē e foa'i mai mea uma o lo'o
afio i le lagi. O lo'o tatou nonofo
latalata i mea maulalo o le lalolagi. Ia
tepa a'e o tatou mata i le faitoto'a o lo'o
matala o le malumalu i lugā, o lo'o

susulu mai ai le malamalama o le mamalu o le Atua i fofoga o Keriso, o Ia Lē "e mafai ai iā te Ia ona fa'aola pea lava i ē fa'alatalata atu i le Atua ona o Ia" (Eperu 7:25).

(9) O LE Ā LE MEA TĀUA E TATAU ONA AOFIA I A TATOU TALOSAGA?

Ia outou finafinau i le tatalo, ia mataāla i lea mea ma le fa'afetai. Kolose 4:2

Mau e Tau i ai: Kolose 2:7; 3:15, 17; Filipi 4:6; I Tesalonia 5:16-18

E mana'omia e fa'atele ona tatou vivi'i i le Atua "ona o Lona alofa ma Āna vavega ua fai i le fanau a tagata" (Salamo 107:8). O a tatou gaoioiga i tapua'iga e lē tatau ona na'o le fa'atoga atu ma le tali mai. Ia 'aia le na o tatou manatu i taimi uma i o tatou lava mana'oga ma lē manatua ai fa'amanuiāga o lo'o tatou maua. E lē o tele na'uā a tatou tatalo, a e o tatou e seāseā ona avatu se fa'afetai. O i tatou e lē aunoa ona maua le alofa tunoa o le Atua, a e peita'i e itiiti lava ona tatou fa'aailoa atu le loto fa'afetai, e la'itiiti ona tatou vi'ia o Ia ona o mea ua Ia faia mo i tatou.

(10) O LE Ā LE MEA O LE A FA'ATAFE MAI I LOTO O I LATOU UA TU'U ATU MA LE FIAFIA O LATOU OLA MA TAMĀO'AIGA MO KERISO?

Tou te 'a'ai ai i lea mea i luma o le Ali'i lo outou Atua, tou te oli'oli fo'i i mea

*uma lava e faia i o outou lima, o outou
atoa ma o outou aiga, o mea ua
fa'amanuia ai 'oe e le Ali'i lou Atua.*

Teuterenome 12:7

Mau e Tau i ai: Teuterenome 26:11;
Salamo 111:1-5; 9:1; 103:1-5

O le mea e faia mo le vi'iga o le
Atua e ao ona faia ma le fiafia, fa'atasi
ma pesega o le loto fa'afetai, a e lē o le
fa'anoanoa ma le fa'avauvau. O lo tatou
Atua o le Tamā e agalelei ma alofa fua.
O Lana galuega e lē tatau ona va'aia i ai
o se gaoioiga e maua ai le loto
fa'anoanoa ma le tigāina. E ao ina 'avea
le tapua'iga ma le 'auai i Lana galuega o
se mea e fiafia ai. E lē finagalo le Atua
mo Lana fanau, o ē na Ia saunia ai le
fa'aolataga, e fa'apea o Ia e sauā ma o se
ali'i e fa'amaliegatā. O Ia o la latou uō
sili; pe afai latou te tapua'i iā te Ia, e
finagalo Ia e fa'atasi ma i latou, e
fa'amanuia ma fa'amafanafana i latou,
ma fa'atumuina o latou loto i le oli'oli
ma le alofa. E fa'anaunau le Ali'i mo
Lana fanau ia to'afilemū ma sa'oloto i
Lana galuega ma ia atili maua le fiafia a
e lē o fa'afitāuli i lea galuega. E naunau
o Ia mo i latou uma e ō mai e tapua'i iā
te Ia o le a ō 'ese atu ma manatu tāua i
Lana tausiga ma le alofa, ina ia
fa'afiafiaina ai i latou i galuega o aso
faiso'o, ina ia i ai le agaga alofa e feagai
ai ma la'asaga uma i le fa'amaoni ma le
fa'autauta.

(11) PE A TATOU

**FA'AMAMALUINA MA VI'IA LE
ATUA I O TATOU MANATU,
TALANOĀGA, MA TALOSAGA, O**

LE Ā LE MEA O LE A FA'AILOAINA MAI?

*O lē faia le vi'iga ma le taulaga, o lē āva lea iā te A'u; ma lē ua mafaufau i lona ala, 'Ou te fa'ailoa atu iā te ia fa'aolataga mai le Atua. **Salamo 50:23***

Mau e Tau i ai: Salamo 50:14, 15; 85:9; Roma 15:6, 9; I Peteru 2:9

E tatau ona taou fa'apotopoto i tafatafa o le satauro. E tatau ona 'avea Keriso ma o Ia Lē na fa'asatauroina ma autū o manatunatuga loloto, o talanoāga, ma o tatou lagona e aupito fiafia i ai. E ao ina taofi i o tatou mafaufauga fa'amanuiāga uma e tatou te maua mai le Atua, ma afai tatou te iloa Lona alofa tele e tatau ona tatou loto malie e tu'uina atu mea uma i le 'a'ao na tu'ia i le satauro mo i tatou.

(12) O LE Ā LE MEA E TATAU ONA I AI PEA I O TATOU LAUGUTU ONA UA TATOU ILOA MANINO LE AGALELEI O LE ATUA?

*Ia vivi'i atu i latou i Ieova ona o Lona alofa, ma Ōna vavega na faia i le fanau a tagata. Ia latou fai taulaga fo'i i taulaga o le vi'iga, ma ta'u atu ma le oli'oli Ana galuega. **Salamo 107:21, 22***

Mau e Tau i ai: Salamo 107:15, 31, 32; 34:3; 92:1, 2; 147:1; Isaia 63:7

O le agaga e mafai ona si'itia a'e e latalata i le lagi i apa'au o vi'iga. E tapua'i i le Atua i vi'iga ma pesega i le

lagi i lugā, ma a o tatou fa'ailoa atu la taou fa'afetai o lo'o tatou tau latalata ai i le tapua'iga a 'au o le lagi. "O lē faia vi'iga ma taulaga, o lē āva lea iā te A'u" (Salamo 50:23). Ia tatou ō atu ma le 'oli'oli i luma o Lē na faia i tatou, "o le fa'afetai ma le leo o le pese" (Isaia 51:3).

Ua ou iloa e mana'omia pea i taimi uma le feso'ota'iga ma le Atua e ala i le tatalo i so'o se la'asaga o la'u mafutaga ma Ia.

Li'o le tali: **Ioe** **Lē mautonu**

Ou te malamalama i le aofia fa'atasi o le vi'iga ma le fa'afetai a o 'ou tatalo i le Atua ona o Lona alofa mutimutivale ma le agalelei i lo'u olaga.

Li'o le tali: **Ioe** **Lē mautonu**

Ou te fa'afetai mo le avanoa e sau ai i luma o le nofoali'i o le Atua e ala i le fa'amanuiāga o le tatalo ma tapaina Lona mana ofoofogia i lo'u olaga ma olaga o i latou fo'i o lo'o si'i a'e i talosaga.

Li'o le tali: **Ioe** **Lē mautonu**



Lesona 14

O Le Mea e Fai i Le Masalosalo

(1) O LE Ā LE TALI A IESU IĀ I LATOU SA LĒ TALITONU I LONA UIGA ATUA?

*Ona tali mai lea o isi o le 'au tusi'upu ma le 'au Faresaio, ua fa'aapea mai, Le A'oa'o e, ua matou fia iloa se fa'ailoga i a te 'Oe. A ua tali atu o Ia, ua fa'aapea atu i a te i latou, O le tupulaga leaga ma le mulilua ua latou sa'ilia mai se fa'ailoga; a e leai se fa'ailoga e avatua i ai, ua na o le fa'ailoga o Iona le perofeta. **Mataio 12:38, 39***

Mau e Tau i ai: Mataio 16:1-4; Luka 11:16, 29, 30; Mareko 8:11, 12; Ioane 2:18; 4:48

O le to'atele, a e maise i latou o lo'o fou i le olaga fa'aKerisiano, e i ai taimi e fa'apopoleina ai ma le manatu e masalosalo ai. E i le Tusi Pa'ia mea e tele e lē mafai ona fa'amalamalamaina, pe malamalama ai fo'i, ma ua galue Satani e fa'aaogā ina ia lē mautonu ai lo latou fa'atuatua i le Afioga a le Atua o le fa'aaliga mai iā te Ia. Ua latou fesili, "E fa'apefea ona ou iloa le ala sa'o? Afai o le Tusi Pa'ia o le afioga a le Atua, e fa'apefea ona fa'asa'olotoina a'u mai nei masalosaloga ma fete'ena'iga?"

E lē finagalo le Atua ia tatou talitonu e aunoa ma le tu'uina mai o ni fa'amaoniga ia lava e fa'avae ai lo tatou fa'atuatua. O lo'o soifua o Ia, o Lona uiga, o le fa'amaoni o Lana afioga, e fa'avae uma i molimau e mafua ai ona faia o a tatou fa'ai'uga; ma o nei molimau e matuā tele lava. A e peita'i e le'i 'ave'esea e le Atua le mafai ona i ai le masalosalo. O lo tatou fa'atuatua e tatau ona fa'avaeina i mea e mafai ona fa'amaonia, a e lē o mea e na'o le fa'asino mai. O ē e mana'omia ia masalosalo o le a i ai le avanoa; a e o i latou e naunau ia iloa le 'upu moni o le a maua fa'amaoniga e tele e fa'avae ai lo latou fa'atuatua.

(2) AISEĀ E LĒ MAFAI AI E LE TAGATA ONA MALAMALAMA I ALA O LE ATUA?

Auā o O'u manatu e lē o outou manatu, o O'u ala e lē o o outou ala, ua fetalai mai ai le Ali'i. Auā e pei ona sili ona maualuga o le lagi i le lalolagi, ua fa'aapea ona sili ona maualuga o O'u ala i o outou ala, ma O'u manatu e sili i o

outou manatu. Isaia 55:8, 9

Mau e Tau i ai: Salamo 92:5; 77:19;
Mataio 11:25; Roma 11:34-36

E lē mafai i le mafaufau o tagata ona malamalama ato'atoa i le uiga po o galuega a le Silisili 'Ese. I le poto e sili le maoa'e, o le mafaufau e matuā a'oa'oina, e tumau pea le ufitia o Lē e pa'ia ma e lē miloa. "O le su'esu'e e te maua ai ea le Atua? E te maua ai ea Lē e ona le malosi uma lava? Ua maualuga i le lagi; se ā se mea e te faia? Ua sili le loloto i seoli; se ā se mea e te iloa ai?" (Iopu 11:7, 8).

Ua fa'apea mai fo'i le aposetolo o Paulo, "Aue! le loloto o le tamāo'aiga o le poto atoa ma le silafaga a le Atua. E lē masu'esu'eina Āna fa'amasinoga, e lē mafai fo'i ona iloa Ōna ala" (Roma 11:33). A e ui lava "ua si'osi'omia o Ia i ao ma le pogisā,...o le amiotonu ma le fa'amasinoga o lo'o tumau i Lona nofoāli'i" (Salamo 92:2). Ua mafai ona tatou malamalama i sina vaega o Āna faiga i Lona vā ma i tatou, ma le mafuaga o Āna galuega, ina ia tatou iloa o Lona alofa e lē mafa'atuā'oia ma le alofa tunoa ua so'ofa'atasi e le mana e leai se gata'aga. E mafai ona tatou malamalama o le tele o Āna fuafuāga ia tatou iloa, e mo lo tatou lelei; ma o tua atu o iinei e tatau ina ia tatou talitonu pea i le 'a'ao e mafaia mea uma lava, o le finagalo e tumu i le alofa.

**(3) PE A UA LĒ MAFAI ONA
TATOU MALAMALAMA I LE
AFIOGA A LE ATUA, O LE Ā LE
LAPATA'IGA E TATAU ONA**

TATOU FA'ALOGO I AI?

*Fa'apei o Ana tusi uma lava, o lo'o talatalaina ai nei mea; o i ai nisi 'upu fa'amatalagatā, ua fa'auiga'eseina e tagata e le'i a'oa'oina, ma ua lē fa'atumaui, fa'apei o isi Tusi fo'i e o'o ai lo latou lava malaia. O lenei le 'au pele e, ia outou fa'aeteete i a te outou, auā ua mua'i iloa e outou, ne'i ta'ita'i'eseina outou i le sesē o ē fa'alētaupulea, tou te pa'ū'ū ai i le mea sa outou tumau ai. **II Peteru 3:16, 17***

Mau e Tau i ai: Roma 16:17, 18; II Timoteo 3:5-7; 2:16, 23; Ieremia 23:35, 36

O le afioga a le Atua, e pei o le uiga o le Tusitala pa'ia, ua tu'uina mai ai mea lilo e lē mafai ona malamalama ato'atoa i ai le tagata. O le ulufale mai o le agasala i le lalolagi, o le liu tino tagata o Keriso, o Lona soifuāga, o le toe tū, ma le tele o isi matā'upu ua ta'ua i le Tusi Pa'ia, o mea lilo ia e loloto tele mo le fa'amatalaina i le mafaufau o le tagata, po o le malamalama ato'atoa i ai. A e peita'i e leai se mafua'aga e tatou te masalosalo ai i le afioga a le Atua auā e lē mafai ona tatou malamalama i mea lilo o Lona mana. I le uiga o lenei lalolagi o lo'o si'omia pea tatou e lē aunoa i mea lilo e lē mafai ona tatou fuaina. O meaola e aupito fa'atauva'a o lo'o aumaia ai fesili e o'o i tagata e sili le maoa'e o le poto e leai se malosi e fa'amalamalama ai. I so'o se mea o lo'o i ai mea ofoofogia i tua atu o lo tatou malamalama. O se mea e tatau ona tatou ofo ai pe a tatou iloa e i ai fo'i mea lilo i le lalolagi fa'aleagaga e lē mafai e tatou

ona fuafua? O le fa'afitauli e māfua mai i le vaivai ma le lauitiiti o le mafaufau o le tagata. Ua uma ona tu'uina mai e le Atua iā i tatou i Lana Afioga fa'amaoniga e fa'atatau i lo latou uiga fa'ale-Atua, ma e tatau iā i tatou ona leai se masalosalo i Āna afioga, auā e lē mafai lava ona tatou malamalama i mea lilo uma a Lē Silisili 'Ese.

Ua fa'aapea mai le aposetolo o Peteru ua i ai i le Tusi Pa'ia "nisi 'upu fa'amatalagatā, ua fa'au'eseina e tagata e le'i a'oa'oina, ma ua lē fa'atumauiina...e o'o ai lo latou malaia" (II Peteru 3:16). O le faigatā o le Afioga a le Atua ua 'u'una'iina e latou e lē talitonu e fai ma finauga e tete'e ai i le Tusi Pa'ia; a e mamao mai lenā, ua 'avea o se molimau malosi i le osofa'iga a le Agaga. Pe afai e lē o aofia ai se fa'amatalaga e fa'atatau i le Atua a e na o mea e faigofie ona tatou malamalama i ai; afai o Lona silisili 'ese ma Lona mamalu e mafai ona maua e mafaufau e gata mai, o le a lē tau'aveina e le Tusi Pa'ia fa'ailoga e lē masesē o le pule a le Atua. O le matagofie ma le lilo o autū o matā'upu ua tu'uina mai e tatau ona fa'aosofia ai le fa'atuatua o lea le Afioga a le Atua.

(4) AISEĀ E LĒ MAFAI AI E LE ATAMAI FA'ALELALOLAGI ONA TU'U MAI SE MALAMALAMAGA O LE AFIGA A LE ATUA?

A e lē talia e le tagata fa'aletino o mea a le Agaga o le Atua; auā o mea valea ia iā te ia, na te lē mafai fo'i ona iloa, a uā e fa'amasinoina fa'aleagaga. I Korinito 2:14

Mau e Tau i ai: I Korinito 2:12, 13; Mataio 13:11; Ioane 3:6; 8:43; 16:13; 14:26; Fa'ata'oto 14:6; Roma 8:5, 6

O le Tusi Pa'ia o lo'o fofolaina mai le 'upu moni e faigofie ma e ato'atoa ona fa'afetaui i mana'oga ma fa'anaunauga o le loto o le tagata, o lea ua maofa ai ma ua fa'agae'etia mafaufau ua a'oa'oina, a e ua mafai fo'i e tagata fa'atauva'a ma le 'au lē a'oa'oina ona malamalama i le ala o le fa'aolataga. A e o nei 'upu moni ua fa'ailoa mai e aofia ai mata'upu e matuā maua, e lautele, e i tala atu o le malosi o le malamalama fa'aletagata, o lea e tatau ai ona tatou talia ia mea auā o le Atua na fa'ailoaina mai iā i tatou. O lea ua folasia mo i tatou le fuafuāga o le fa'aolataga, ina ia va'ai uma tagata ta'ito'atasi i la'asaga e tatau ona uia i le salamō aga'i i le Atua ma le fa'atuatua i lo tatou Ali'i o Iesu Keriso, ina ia fa'asaoina i le ala ua atofaina e le Atua; peita'i e i lalo ifo o nei 'upu moni e faigofie ona malamalama i ai, e i ai mea lilo o lo'o natia Lona mamalu - mea lilo e maofa ai le mafaufau pe a su'esu'e i ai, a e fa'aosofia ai le su'esu'e fa'amaoni mo le 'upu moni ma le āva ma le fa'atuatua. O le tele o lona sa'iliili i le Tusi Pa'ia, o le loloto lea o lona talitonu o le afioga lea a le Atua soifua, ma o le mafaufau o le tagata o le a ifo i le mamalu o fa'aaliga pa'ia.

A fa'ailoa atu e tatou te lē mafai ona malamalama ato'atoa i 'upu moni maoa'e o le Tusi Pa'ia o le fa'ailoa atu lea o le mafaufau fa'atauva'a e lē mafai ona iloa le uiga o Lē e fa'avavau; o le tagata lea ma lona iloa e gata mai, e lē mafai ona malamalama i fuafuāga a le

Atua e silafia mea uma.

**(5) O LE Ā LE MEA O LO'O
LAPATA'I MAI IĀ I TATOU IA
'AUA NE'I FA'AOFI I TOTONU O
TATOU LOTO?**

*Le 'au uso e, ia outou ne'i i ai i so
outou le loto leaga ma le lē talitonu, tou
te ō 'ese ai i le Atua soifua. Eperu 3:12*

Mau e Tau i ai: Eperu 3:19; 10:38;
Mataio 13:58; 17:20; Mareko 9:24;
Roma 3:3, 4; 11:20

Talu ai latou te lē mafai ona
malamalama i mea lilo uma, o ē e lē
talitonu ma le tauēmu e tete'e le Afioga
a le Atua; ma e lē o tagata uma fo'i e
fa'apea e talitonu i le Tusi Pa'ia e sao
mai le faigatā o ia mea. E sa'o le matuā
su'esu'e mae'ae'a a'oa'oga a le Tusi Pa'ia
ma sa'ili'ili i "mea loloto a le Atua" o
lo'o fa'aalia mai i Lana afioga (I
Korinito 2:10). A o "su'esu'e ifo le
agaga i mea uma, o mea loloto fo'i a le
Atua," a e o le galuega a Satani o le
fa'asesēina lea o le malosi o le mafaufau
e su'esu'e ai. E i ai le tulaga
mitamitavale ua fa'afefilo'i fa'atasi ma
le su'esu'eina o le 'upu moni o le Tusi
Pa'ia, o lea e lagona ai e tagata le lē
onosa'i ma le to'ilalo pe afai e lē mafai
ona latou fa'amalamalamaina vaega
uma o le Afioga a le Atua i le mea e
fa'amalieina ai i latou. E matuā
fa'alumaina i latou pe a fa'ailoa mai ua
latou lē malamalama i le afioga pa'ia.
Latou te lē mafai ona fa'atali ma le
onosa'i se'ia finagalo le Atua e fa'ailoa
le 'upu moni iā te i latou. Ua latou

lagona o lo latou lava poto fa'aletagata e lava lea e mafai ai ona malamalama i le Tusi Pa'ia, ma a lē mafai ona faia lea mea, ua latou tete'e loa i lana pule. E tele talitonuga ma manatu lauiloa e fa'aapea na maua mai le Tusi Pa'ia a e leai ni fa'avae i ia a'oa'oga, ma e matuā fete'ena'i ma le finagalo o le Atua. O nei mea ua fai a pogai o le masalosalo ma le lē mautonu i le tele o mafaufau. Peita'i, e lē tu'ua'ia le Afioga a le Atua, a e ona o le fa'auiga sesē e le tagata.

(6) AISEĀ O LE A LĒ MAFAI AI LAVA ONA TATOU MALAMALAMA ATO'ATO A E UIGAI I LE ATUA?

*O i le Ali'i lo tatou Atua mea lilo; a o mea ua fa'aailoa mai o i a te i tatou ia ma a tatou fanau e fa'avavau, ina ia faia e i tatou o 'upu uma o lenei tulafono. **Teuterenome 29:29***

Mau e Tau i ai: Roma 11:33, 34; Tanielu 2:22; Mataio 13:35; Galuega 1:7

Pe ana mafai e tagata na foafoaina ona ausia se malamalama ato'atoa o le Atua ma Āna galuega, ma a taunu'u i lenā tulaga o le a lē toe i ai se isi 'upu moni e toe maua, leai se toe tuputupu a'e i le poto, e lē toe i ai fo'i se toe atina'e o le mafaufau ma le loto. O le a lē toe silisili le maoa'e o le Atua; ma o le tagata, ina ua ausia le mea e gata ai le poto ma le taunu'uga, o le a pau ai iinei le aga'i i luma. Ia tatou fa'afetai i le Atua e lē o se mea tonu lea. O le Atua e silisili 'ese; e iā te Ia o "le 'oloa uma o le

poto ma le malamalama" (Kolose 2:3). Ma e o'o i le fa'avavau e mafai pea e tagata ona sa'il'ili, e a'oa'o pea, a e peita'i e lē uma ai lava le tamāo'aiga o Lona poto, o Lona agalelei, ma Lona mana.

(7) E NA'O FEA O LE A MAUA MAI AI LE POTO FA'ALE-ATUA?

A ua maua e i matou e lē o le agaga o lenei lalolagi, a o le agaga mai le Atua, ina ia matou iloa mea ua foa'ifuaina mai e le Atua i a te i matou. I Korinito 2:12

Mau e Tau i ai: Iakopo 1:5; Roma 8:1, 5, 6; II Korinito 4:4; Ioane 16:14, 15; I Ioane 2:20, 27; 5:20

E finagalo le Atua o 'upu moni o Lana Afioga o le a fofolaina pea i Ōna tagata, e o'o lava i le olaga lenei. E na'o le tasi le ala e mafai ona maua ai lenei malamalama. E pau le auala e mafai ai ona tatou 'ausia se malamalamaga i le Afioga a le Atua pe a fa'asusuluina mai e lea Agaga na tu'u mai ai Lana afioga. "O mea a le Atua e lē iloa e se tagata, a e na'o le Agaga o le Atua;...auā o le Agaga e su'esu'e i mea uma, ioe, o mea loloto a le Atua."

(8) O LE Ā LE MEA O LE A TATOU MAUA PE A TATOU FA'ATAGAINA LE AGAGA PA'IA E TA'ITA'I I TATOU A O TATOU SU'ESU'E?

A e a maliu mai o Ia, o le Agaga lea e tupu mai ai le 'upu moni, e ta'ita'i e Ia

*iā te outou i upu moni uma; auā e lē
tautala fua Ia na o Ia, a o mea uma e
fa'logo i ai o Ia, e tautala a'i lava, ma
fa'aioa mai iā te outou mea e o'o mai.*
Ioane 16:13

Mau e Tau i ai: Ioane 14:17, 26; 15:6;
8:32; 7:16-18; I Ioane 4:6

E finagalo le Atua e galuea'iina e
le tagata lona mana e mafaufau ai; ma o
le su'esu'e i le Tusi Pa'ia e fa'amalosia
ma si'itia ai le mafaufau e sili atu i lo o
se isi lava su'esu'ega. A e e ao ona tatou
fa'aeteete ne'i manatu ua fia atua, e
mafai ai ona fa'aliua i le uiga vaivai ma
le lē atoa o le aigātagata. Pe afai e tatou
te lē fa'apuaoa lo tatou malamalamaga o
le Afioga Pa'ia, o le a lē malamalama ai
i 'upu moni e matuā faigofie lava, e
tatau iā i tatou ona maua le fa'atuatua o
le tamaitiiti, ua sauni e a'oa'oina, ma e
matuā ōle fa'atauānau mo le fesoasoani
a le Agaga Pa'ia. O le lagona o le mana
ma le poto o le Atua, ma o le tatou lē
mafai ona malamalama i Lona silisili
'ese, e tatau ona tatou lagona ai le loto
maulalo, ma tatou tatala Lana afioga, a
o tatou ulu atu i Ōna luma ma le āva ma
le mata'u. Pe a tatou ō atu i le Afioga
Pa'ia, e tatau e le mafaufau ona talia ma
fa'aioa atu le pule e sili atu i lo o ia
lava, ma o le loto ma le mafaufau e
tatau ona ifo atu
i le Silisili 'Ese, O A'U O LĒ OLA.

(9) O AI LE POGAI O LO TATOU POTO?

*A e afai ua leai se poto i so outou, inā
ōle atu ia i le Atua, oLē foa'i tele mai i*

*tagata uma ma le lē toe ta'uta'ua; ua
foa'iina mai ai lea i a te ia. Iakopo 1:5*

Mau e Tau i ai: Iakopo 1:17; 3:17;
Iopu 28:12-28; Fa'ata'oto 3:5-7; 9:4-6;
2:3-11; Mataio 7:7-11

E tele mea e foliga mai e faigatā ma lē manino, o mea e fa'amanino ma fa'afaigofie e le Atua iā i latou e sa'ili se malamalama e fa'atatau i ai. A e afai e aunoa ma le ta'ita'iga a le Agaga Pa'ia e fa'aauau pea lo tatou fa'alētonu po o le fa'auigasesēina o le Afioga a le Atua. E tele faitauga o le Tusi Pa'ia e foliga e leai se aogā ma e āfāina ai i le tele o taimi. Pe afa e su'esu'eina le Afioga a le Atua e aunoa ma le āva ma le tatalo; pe afai o lagona mamanatu e lē o taula'i atu i le Atua, pe e lē o ō gatasi ma Lona finagalo, o le mafaufau fo'i e puaoa i masalosalo; i le su'esu'eina o le Tusi Pa'ia, o le a fa'amalosia ai le lē talitonu. O le a pulea mafaufauga e le fili, ma ia aumaia fa'amatalaga e lē sa'o. O so'o se taimi e lē ō gatasi ai 'upu ma amio i le sa'iliga ia tutusa ma le Atua, e tusa lava pe o le ā le a'oa'oina o i latou, o le a mafai ona sesē i lo latou malamalama o le Afioga Pa'ia, ma e lē saogalemū le fa'atuatua i a latou fa'amatalaga. O i latou e va'ava'ai ina ia maua fe'ese'esea'iga i le Tusi Pa'ia, e leai se malamalama fa'aleagaga. Ina ua fa'asesēina la latou va'ai latou te iloa ai le tele o mafua'aga o le masalosalo ma le lē talitonu i mea e manino ma faigofie.

**(10) PE AFAI TATOU TE FAIA
PEA AGASALA O LO'O TATOU**

ILOA, O LE A FA'APEFEA ONA ĀFĀINA AI LA TATOU VĀ FEĀLOA'I MA LE ATUA?

*A e peita'i o a outou amio leaga ua fai
ia ma pupuni i le vā o outou ma lo
outou Atua, o a outou agasala fo'i ua
'alo ai Ōna fofoga i a te outou ua Ia lē
fa'afofoga mai ai. **Isaia 59:2***

Mau e Tau i ai: Isaia 57:17; Fa'ata'oto
15:29; Ieremia 5:25; Teuterenome
31:17, 18; 32:20; Esekielu 39:24; Mika
3:4

Po o le ā le fa'afoliga e aumai ai, o
le mafua'aga moni o le masalosalo ma
le lē talitonu i le tele o taimi, o le alofa
lea i le agasala. O a'oa'oga ma mea e
fa'asā i le Afioga a le Atua e lē taliaina e
le loto mitamitavale, e alofa i le agasala,
ma i latou o ē lēloto atu e usiusita'i i
mea e tatau ona fai a e ua sauni lava e
masalosalo i lana pule. Ina ia tatou
taunu'u i le 'upu moni, e tatau ona iā i
tatou le fa'anaunauga e iloa le 'upu moni
ma le loto gaua'i e usiusita'i i ai. O i
latou uma e ō mai ma lenei agaga e
su'esu'eina le Tusi Pa'ia, o le a maua
fa'amaoniga e tele na'uā o lo'o i Lana
afioga, ma latou te maua le
malamalamaga o le mea moni o le a
fa'apotoina ai i latou i le fa'aolataga.

(11) O LE Ā LE MEA E MANA'OMIA E LE ATUA A E LE'I FA'AILOAINA MAI SE MALAMALAMA FOU IĀ I TATOU?

*Ai se tasi e fia fai Lona finagalo, e iloa
ai e ia le mata'upu, pe mai le Atua, pe*

'Ou te tautala fua lava A'u. Ioane 7:17

Mau e Tau i ai: Ioane 8:31, 32; Salamo 119:10, 101, 102; Mika 4:2; Galuega 17:11

Ia lē o le fesiligia ma le faifai 'upu e fa'atatau i mea e te lē o malamalama ai, a e ia mafaufau i le malamalama o lo'o susulu mai i ou luga, ona e maua lea le malamalama e malosi atu. E ala i le alofa tunoa o Keriso, ia e fa'atinoina tiute i aso ta'itsi o mea uma ua fa'amanino i lou mafaufau, ma o le a mafai ai ona e malamalama ma faia mea e te lē o mautinoa nei.

E i ai le fa'amaoniga o lo'o fofola mai mo tagata uma - o ē e aupito a'oa'oina, ma ē fo'i e lē a'oa'oina,- o fa'amaoniga o mea na tutupu. Ua vala'aulia i tataou e le Atua ia tatou fa'amaonia mo i tatou lava ia le moni o Lana afioga, ma le moni o Āna folafolaga. Ua Ia vala'aulia i tatou, "Inā tofotofo ia outou, ma ia outou iloa e lelei le Ali'i" (Salamo 34:8). Ia 'aua ne'i tatou fa'alagolago i le 'upu a se tasi, a ia tatou tofo mo i tatou lava. Ua Ia fetalai mai, "Inā ōle atu ia, ona outou maua ai lea" (Ioane 16:24). E fa'ataunu'uina Āna folafolaga. E leai se taimi na le'i taunu'u ai; e lē mafai ona lē fa'ataunu'uina. A o tosina i tatou e fa'alatalata iā Iesu, ma 'oli'oli i le ato'atoa o Lona alofa, o tatou masalosologa ma le pouliuli o le a mavae 'ese i le malamalama o Lona fa'atasi mai.

**(12) A O TUPUTUPU A'E LO
TATOU VĀ FEAGAI MA IESU,
MATA O LE Ā SA TATOU**

MOLIMAU I AI?

O Ia ua na lavea'i mai i a te i tatou nai le pule a le pouliuli, a ua na aumaia i latou i le malō o Lona lava Alo pele.

Kolose 1:13

Mau e Tau i ai: Efeso 5:7-9; I Peteru 2:9; I Ioane 2:8; Roma 6:20-22; 4:20, 21; Tito 3:3-7

Ua fa'apea mai le aposetolo o Paulo, o le Atua "ua na lavea'i mai iā te i tatou na i le pule a le pouliuli, a ua na aumaia i tatou i le malō o Lona lava Alo pele" (Kolose 1:13). Ma o i latou uma ua te'a mai le oti i le ola e mafai ona "o le talia o lana mau ua na fa'ailoa ai lona taofi, e fa'amaoni lava le Atua" (Ioane 3:33). E mafai fo'i ona ia molimau, "Na ou mana'omia le fesoasoani, ma 'ou maua lea i a Iesu, O mana'oga uma, ua Ia aumai, o le matelāina o lo'u agaga na fa'amalieina; ma o nei o le Tusi Pa'ia i a te a'u, o le fa'aaliga a Iesu Keriso. E te fesiligia a'u pe aiseā 'ou te talitonu ai iā Iesu? Auā o Ia iā te a'u, o le Fa'aola lea. Aiseā ou te talitonu ai i le Tusi Pa'ia? Auā ua ou maua o le si'ufofoga lea o le Atua i lo'u agaga." Atonu e iā i tatou lava ia le molimau i le fa'amaoniga o le Tusi Pa'ia, ma o Keriso o le Alo o le Atua. Tatou te iloa e lē o tatou mulimuli i tala fatu na faia i le poto.

(13) PE A TATOU MULIMULI I LE MALAMALAMA UA TU'UINA MAI IĀ I TATOU, O LE A 'A'AFIA FA'APEFEA LA TATOU SAVALIGA FA'ALEAGAGA?

*O lenei le 'au pele e, ia outou fa'aeteete i a te outou, auā ua mua'i iloa e outou, ne'i ta'ita'i'eseina outou i le sesē o ē fa'alētaupulea, tou te pa'ū'ū ai i le mea sa outou tumau ai. A ia tutupu outou i le alofa tunoa ma le poto i a lo tatou Ali'i o lo tatou Fa'aola lea o Iesu Keriso. Ia i a te outou le vi'iga i ōna pō nei, ma ia o'o i le fa'avavau lava. **II Peteru 3:17, 18***

Mau e Tau i ai: Luka 24:32; Salamo 92:12; Hosea 14:1-7; Malaki 4:2; Efeso 4:15; II Tesalonia 1:3; I Peteru 2:2-5

Pe afai ua tutupu a'e tagata o le Atua i le alofa tunoa, o le a fa'aauau pea ona latou maua le malamalama manino o Lana afioga. O le a latou iloa le malamalama fou ma le matagofie i ōna 'upu moni pa'ia. Sa fa'aapea ona moni i tala fa'asolopito o le ekalesia i augā tupulaga uma, ma o le a fa'aapea lava se'ia o'o i le i'uga. "A o le ala o ē amiotonu e tusa ma le malamalama o le ao, o lo'o tupu pea lona malamalama e o'o i le tūtonu o le lā" (Fa'ata'oto 4:18).

(14) E FA'APEFEA ONA FA'AMATALA E LENEI FUA'I'UPU LE MAFAI E TATOU I SE TAIMI O I LUMA ONA MALAMALAMA I LE MANA FA'AMANUIA O LE ATUA?

*Auā o ōna po nei tatou te va'ava'ai ai fa'anenefu i le fa'aata, a o ia ōna po tatou te fesaga'i ai; o nei ōna po ou te iloa ai fa'alē'atoa, a o ia ōna pō ou te iloa tino ai, pei ona iloatinoina o a'u. **I Korinito 13:12***

Mau e Tau i ai: I Korinito 6:3; 15:52;
II Korinito 3:18; Roma 8:18; I Ioane
3:2; Fa'aaliga 20:4

O le fa'atuatua e mafai ai ona tatou
va'ai i le lumana'i ma maua le folafolaga
a le Atua mo le tuputupu a'e o le poto, o
le tu'ufa'atasia o le mafaufau o le tagata
ma le fa'aleagaga, ma o le malosi uma o
le agaga ua aumai e feso'ota'i ma le
Pogai o le malamalama. Atonu o le a
tatou fiafia i mea uma e fenumia'i ai i le
silisili 'ese o le Atua o le a Ia
fa'amaninoina ai, o mea e faigatā ona
malamalama o le a i ai le
fa'amalamalamaga; ma pe o fea ua
maua ai e o tatou mafaufau fa'atauva'a e
na'o le fenumia'i ma fuafuāga
malepelepe, o le a tatou va'aia le mea e
sili ona matagofie ma le talafeagai
ato'atoa. "Auā o ōna po nei tatou te
va'ava'ai ai fa'anenefu i le fa'ata; a o ia
ōna po tatou te fesaga'i ai; o nei ōna po
ou te iloa ai fa'alēatoa; a o ia ōna po ou
te iloa tino ai, pei ona iloa tino o a'u" (I
Korinito 13:12).

*Ou te iloa i aso fa'ai'u o le tala'aga o le
lalolagi e to'atele o le a masalosalo i le
Atua. Ua ou filifili e fa'avae lo'u
fa'atuatua i luga o fa'amaoniga ua Ia
aumai ma talitonu iā te Ia.*

Li'o le tali: Ioe Lē mautonu

*E mafanafana iā te a'u le iloa o le poto
o le Atua e lē mafai ona malamalama i
ai se tagata. E mafai ona ou tu'u lo'u
olaga i Ōna 'a'ao ma iloa o Ia e pule i
mea uma lava.*

Li'o le tali: Ioe Lē mautonu

Ua ou iloa e ui ina e lē mafai ona ou malamalama i mea uma o lo'o ta'u mai e le Tusi Pa'ia e fa'atatau i le Atua, a e o lenei lava le fa'amaoniga o Lona silisili 'ese. Ua fa'amaonia o le Afioga a le Atua na aumaia a ala i le osofiaina mai iā te Ia.

Li'o le tali: Ioe Lē mautonu

*Ua ou filifili e tu'u 'ese masalosologa
uma mai lo'u mafaufau o lo'o totōina e
lē e fa'aosooso e fa'aataau i le Atua ma
Lana Afioga. Ou te filifili e mulimuli i le
malamalama pei ona fa'aailoa mai e le
Atua iā te a'u pe a tatau ai.*

Li'o le tali: Ioe Lē mautonu

This image shows a single page of white paper with horizontal ruling lines. The lines are evenly spaced and run across the width of the page. There are no margins, text, or other markings on the paper.



Lesona 15

O le 'Oli'oli i le Ali'i

**(1) ONA O TATOU O
KERISIANO, O AI E TATAU ONA
TATOU FA'AILOA I AI LE
AGALELEI, O LE ALOFA
MUTIMUTIVALE, MA LE ALOFA
TUNOA O KERISO?**

*O lea aso fo'i tou te fa'apea atu ai, Ia outou vivi'i i le Ali'i, inā vala'au atu ia i Lona suafa; ia outou fa'ailoa atu i nu'u o Āna galuega; ia outou ta'uta'u atu ua vi'ia Lona suafa. Pepese atu ia i le Ali'i, auā ua faia e Ia mea silisili 'ese; inā fa'ailoa atu ia o lea mea i le lalolagi uma. **Isaia 12:4, 5***

Mau e Tau i ai: Isaia 66:19; Ioane 17:18; I Nofoa'iga Tupu 16:8; Salamo

9:11; 96:3; 105:1; 107:22

O le fanau a le Atua ua vala'auina e 'avea ma sui o Keriso, e fa'ailoa atu le agalelei ma le alofa mutimutivale o le Ali'i. E pei ona fa'aalia mai e Iesu i a i tatou le uiga moni o le Tamā, e fa'apea fo'i ona tatau ona tatou fa'ailoa atu i le lalolagi e lē o iloa Lona alofa fa'apalepale ma le mutimutivale.

(2) PE A TATOU TALIA MA MULIMULI IĀ KERISO, O LE Ā LA TATOU VAEGA E TATAU ONA FA'ATAUNU'UINA?

O outou o la matou tusi, o tusia i o matou nei loto, ua iloa ma faitaulia e tagata uma. O lo'o fa'aalia outou, o outou o le tusi a Keriso ua saunia e i matou, e le'i tusia i le vaitausi, a o le Agaga o le Atua soifua; ua lē tusia i papatusi ma'a, a o papatusi o le loto.
II Korinito 3:2, 3

I tagata ta'ito'atasi uma o Lana fanau, o lo'o auina ai e Iesu se tusi i le lalolagi. Afai o oe e te mulimuli iā Keriso, ua auina atu iā te 'oe se tusi mo le aiga, i le nu'u, o le ala ma le mea e te nofo ai. O Iesu o lo'o mafuta iā te 'oe, ma e naunau ia talanoa i agaga o i latou e lē iloa o Ia. Atonu e latou te lē o faitau i le Tusi Pa'ia, po'o lē lagona le si'ufofoga o lo'o talanoa mai i ōna itulau; latou te lē va'aia le alofa o le Atua i Āna galuega. A e afai o oe o se sui moni o Iesu, atonu o le a auala atu iā te 'oe le ta'ita'iga e malamalama ai e uiga i Lona lelei ma maua mai ai ina ia

alofa ma 'au'auna iā te Ia.

**(3) O Ā UIGA E LUA E TATAU
ONA FA'AALI MANINO I O
TATOU OLAGA A O TATOU FAIA
LE GALUEGA A KERISO E
TAU'AVE LE MALAMALAMA I
LE LALOLAGI?**

*A o le amio Atua ma le loto malie, o le
oloa tele lava lea. I Timoteo 6:6*

Mau e Tau i ai: Filipi 4:11; Salamo
34:5; 4:3; Kalatia 5:22, 23; I Timoteo
2:2; 4:8; 6:11; Fa'ata'oto 19:23; 30:8;
Failauga 4:6

O Kerisiano ua tū mai e tau'ave le
malamalama i le ala i le lagi. E ao ona
latou fa'aāta atu i le lalolagi le
malamalama o Keriso o lo'o fa'asusulu
mai i o latou luga. O o latou olaga ia
tatau ona fai ma auala e maua ai e nisi
le malamalamaga moni e fa'atatau iā
Keriso fa'aapea ma Lana galuega.

A o faia tatou ma sui o Keriso, e
tatau ona tatou faia Lana galuega ia
foliga matagofie ma e fa'atosina, e pei
ona tatau ai. O Kerisiano e fa'aputu
tulaga pogisā ma le fa'anoanoa i o latou
agaga, ma e muimui ma fa'atu'i'ese, o le
a tu'uina atu i isi manatu sesē e uiga i le
Atua ma le olaga fa'a-Kerisiano. Latou
te tu'uina atu le manatu o le Atua e lē
finagalo ia fiafia Lana fanau, ma i lenei
itū ua latou aumai se molimau pepelo ia
tete'e i lo tatou Tamā i le lagi.

**(4) O LE Ā LE FA'AVAE AUTŪ A
FA'APEA UA MAU I O TATOU
MAFAUFAU O LE A TETE'E ATU**

I LE LĒ TALITONU, O LE LEAI O SE FA'AMOEMOE, MA LE TALIAINA O FA'AMATALAGA PEPELO A SATANI E UIGA I LE ATUA?

O ē fa'alagolago i le Ali'i e fa'apei o le mauga o Siona i latou, e lē fa'agae'etia, a e tumau e fa'avavau.

Salamo 125:1

Mau e Tau i ai: Salamo 4:5; 64:10; 57:1; 40:4; 34:8; 141:8; Fa'ata'oto 29:25; 30:5; 3:5

E matuā fīafia lava Satani pe a ia mafai ona ta'ita'iina le fanau a le Atua ia lē talitonu ma ia fa'avaivai. E fa'afiafiaina o ia i le va'ai mai ua tatou lē fa'atuatuaina le Atua, ua masalosalo i Lona finagalo malie ma le mana e fa'aolaina ai tatou. E fīafia pe a fa'apea o le Ali'i e afāina ai tatou i Āna mea e fai. O le galuega a Satani o le fa'ailoa atu o le Ali'i e leai se fa'apalepale ma se tigāalofa. E na te fa'asesēina le 'upu moni e uiga i le Atua. Na te fa'atumuina le mafaufau i manatu sesē e fa'atatau i le Atua; ona ua tatou lē tumau i le 'upu moni e fa'atatau i lo tatou Tamā i le lagi, o le tele o taimi ua alu o tatou mafaufau i tau fa'asesē a Satani ma ua lē vi'ia ai le Atua i lo tatou lē talitonuina o Ia ma muimui ai aga'i iā te Ia. O lo'o sa'ili pea Satani ia 'avea le olaga fa'alelotu o se olaga e lē fīafia. E naunau o ia ina ia foliga mai e pologa ma faigatā; ma pe afai e fa'ailoa mai e le Kerisiano i lona lava olaga lenei va'aiga o le tapua'iga, o ia lava, e ala i lona lē talitonu, ua fa'amalosia le pepelo a Satani.

**(5) E FA'APEI O PAULO, O LE Ā
LE TALĪ E TATAU ONA TATOU
TU'U ATU PE A TATOU FETAIA'I
MA FAIGATĀ I LE SAVALIGA O
LE OLAGA?**

*Ona fa'aapea mai ai lea o Ia iā te a'u, O
Lo'u nei alofa tunoa e lava lea
efesoasoani iā te 'oe; auā o le vaivai e
fa'aatoaina ai Lo'u mana. O lea ua tele
ai lava lo'u fiafia i le mitamita i mea ua
'ou vaivai ai, ina ia tumau i 'ou luga le
mana o Keriso. O lea ou te fiafia ai i
mea e vaivai ai, o lē fa'aleaga mai, e
malaia, o lē agatele mai, o le atuatuvaile
ona o Keriso; auā pe a 'ou vaivai, ona
'ou malosī ai lea. **II Korinito 12:9, 10***

Mau e Tau i ai: II Korinito 3:5; Iosua
1:9; Isaia 43:2-5; Ieremia 1:6-9; I
Korinito 10:13; 15:10

O le to'atele e savavali i le auala o
le olaga, e nonofo pea i o latou sesē ma
mea sa to'ilalo ai ma fa'amoemoega ua
lē taunu'u, ma fa'atumulia ai lea o latou
loto i le fa'anoanoa ma le loto vaivai. A
o ou i ai i Europa, sa i ai se uso
tama'ita'i sa fa'apenā, ma sa ia matuā
mafatia lava; sa tusi mai iā te a'u ma
talosaga mai mo se 'upu fa'alototele. O
le po ina ua ma'ea ona faitau o lana tusi,
sa ou miti ai ua ou i totonu o se
fa'ato'aga fugāla'au, ma e foliga mai o lē
ōna le fa'ato'aga o lo'o ta'ita'i a'u i auala
o le fa'ato'aga. Sa ou tauina fugāla'au
ma ou fiafia i le manogi, a o le uso lea o
lo'o savali i o'u autafa, sa ia fa'assino i
la'au tuitui o lo'o i le auala. Sa ōi o ia
ma le fa'anoanoa tele. A e o ia e lē o
savali i le auala ma mulimuli i le ta'ita'i,

o lo'o savali i totonu o vao tuitui ma la'au talatala. Na ōi o ia, "Oi, e lē o se mea e fa'anoanoa ai ona o lenei togāla'au matagofie ua fa'aleagaina e la'au matuitui?" Ona tali lea o le ta'ita'i, "Tu'u pea la'au tuitui, auā e pau le mea e latou te mafai o le fa'amanu'a o 'oe. Tau mai rosa, o lili, ma isi fugāla'au."

E le'i i ai ea ni vaega matagofie i lou olaga? E le'i i ai ni vaitaimi tāua na fa'agae'etia ai lou loto i le 'oli'oli e tali atu i le Agaga o le Atua? Pe a e toe tepa i tua i ni vaega o mea na tutupu i lou olaga, e te maua ai ea ni itulau e matagofie ma fiafia? E lē pei folafolaga a le Atua o le manogi o fugāla'au, o lo'o ola i autafa o le auala i ōna itu uma? O le a e lē fa'atagaina ea le matagofie ma le suamalie ia fa'atumuina ai lou loto i le fiafia?

O vao tuitui ma la'au talatala e na'o le manu'a ma le fa'anoanoa e te maua ai; ma afai e te fa'aputu mai na'o ia mea ma e foa'i atu i nisi, pe mata e lē gata ua e ta'u fa'atauva'aina le agalelei o le Atua, a e ua e taofia i latou mai le filifiliga e savavali i le auala o le ola?

E lē o se mea lelei le fa'apotopoto fa'atasi o mea uma o le olaga ua mavae sa lē fiafia ai,- o ōna sesē ma fa'amoemoega e lē taunu'u. O le agaga ua fa'avaivai e fa'atumuina i le pogisā, e tapunia ai le malamalama o le Atua mai lona lava ia agaga a e lafoia le ata o le pouliuli i le auala o isi tagata.

(6) PE A 'U'UMAU E LE TAGATA AGASALA LĒ AOGĀ LE ĀTA O LE FA'AOLATAGA, MATA O LE Ā SANA IA MOLIMAU?

*O lea aso fo'i tou te fa'apea atu ai, Ia outou vivi'i i le Ali'i, inā vala'au atu ia i Lona suafo; ia outou fa'ailoa atu i nu'u o Āna galuega; ia outou ta'uta'u atu ua vi'ia Lona suafo. **Isaia 12:4***

Mau e Tau i ai: Isaia 12:5; Salamo 107:47, 48; 113:1-3; 117:1, 2; 105:1; I Nofoa'iga Tupu 16:8-11

Ia fa'afetai i le Atua mo ata manino ma le matagofie ua Ia tu'uina mai iā i tatou. Se'i tatou fa'apotopoto fa'atasi ta'utinoga o Lona alofa, ina ia tatou va'ai pea i ai i aso uma: O le Ālo o le Atua ua tu'ua le nofoāli'i o Lona Tamā, fa'aofuina Lona itū Atua i le tino tagata, ina ia Na mafai ona laveā'i le tagata mai le malosi o Satani; o Lona manumalō ina ua fai ma o tatou sui, na Ia tatala le lagi mo tagata, ma fa'aali i le va'aiga a le tagata le afio'aga e fa'ailoa ai e le Atua Lona mamalu; o le fanau a tagata na pa'ū ua 'aveina a'e mai le lua o le fa'afanoga ua lafoa'i i ai e le agasala, ma toe aumaia ai i le feso'ota'iga ma le Atua silisili 'ese, ma onosa'i i le tofotofoga fa'aleagaga e ala i le fa'atuatua i lo tatou Fa'aola, e fa'aofu i le amiotonu a Keriso, ma fa'aeaina i Lona nofoāli'i - o āta uma ia o lo'o finagalo le Atua ia tatou mafaufau loloto i ai.

(7) SA FA'APEFEA ONA FA'AMAONIA E LE ATUA LONA ALOFA MO I TATOU E MATUĀ LĒ MASALOMIA?

O Ia lava sa lē fa'asaoina Lona lava Alo, a ua tu'uina mai o Ia e sui a'i i tatou uma lava, e lē foa'i fua mai ea e

*Ia iā te i tatou mea uma lava fa'atasi
ma Ia i se ā?* **Roma 8:32**

Mau e Tau i ai: Roma 5:6-11; Ioane
3:16; II Korinito 5:21; I Ioane 4:10

Pe a foliga mai ua tatou
masalosalo i le alofa o le Atua ma lē
talitonuina Āna folafolaga ua tatou lē
āva iā te Ia ma fa'atigā ai Lona Agaga
Pa'ia. E fa'aapefea le lagona o se tinā pe
afai e muimui pea lana fanau e fa'atatau
iā te ia, e pei na te lē o manatu ia faia se
mea lelei mo i latou, a e o le taumafaiga
o lona olaga atoa o le fa'ataualuma o a
latou fuafuāga ma ia avatu iā i latou le
olaga manuia? A fa'aapea e latou te
masalosalo i lona alofa; o le a matuā
mafatia lona loto i lea tulaga. O le ā se
lagona o so'o se mātua pe a fa'aapea le
faiga o ia e lana fanau? Ma e fa'aapefea
le fa'atatau o tatou e lo tatou Tamā o i le
lagi pe a tatou lē talitonuina Lona alofa,
lea na mafua ai ona Ia aumai Lona Ālo
pele e to'atasi ina ia tatou maua ai le
ola? Ua tusia e le aposetolo o Paulo, "O
Ia lava na lē fa'asaoina Lona lava Ālo, a
ua tu'uina mai o Ia e sui a'i i tatou uma
lava, e lē foa'i fua mai ea e Ia iā te i
tatou mea uma lava fa'atasi ma Ia i se
ā?" (Roma 8:32). A e peita'i, e to'afia o
fa'aapea mai, i a latou amio, pe a lē o
'upu, "E lē manatu le Ali'i o lenā mea e
mo a'u. Atonu e alofa Ia i isi, a e lē
alofa iā te a'u."

**(8) AISEĀ E TATAU AI IĀ I
TATOU ONA LĒ TU'ULOTO
MASALOSALOGA PO O LE
FA'ASOA ATU O NEI
MASALOSALOGA I NISI E**

FA'ATATAU I SO'O SE MEA FA'ALEAGAGA?

*Auā e leai so tatou e ola mo ia lava, e lē oti fo'i se tasi mo ia lava....O lenei 'aua ne'i tatou toe fefa'asalai; a e lelei ina ia manatu i lenei lava mea, 'aua ne'i tu'u ane e se tasi se mea e tausuai ai, po o se mea e tau tevateva ai lona uso. **Roma 14:7, 13***

*A ia outou fa'aeteete, ne'i 'avea la outou nei faitalia ma mea e tausuai ai ē ua vaivai....A fa'apea fo'i ona outou agasala i le uso, ma fa'atausuai lo latou manatu ifo vaivai, ua outou agasala i a Keriso. **I Korinito 8:9, 12***

Mau e Tau i ai: Luka 12:29; Mataio 12:36; Levitiko 19:14; Mataio 16:23; Eperu 11:6; Roma 14:23; I Timoteo 2:8

O nei mea uma o lo'o afāina ai lou agaga; auā o 'upu masalosalo uma e te lafo atu o lo'o vala'aulia ai fa'aosoosoga a Satani; e fa'amalosia ai iā te 'oe le avanoa e te masalosalo ai, ma o le a e fa'atigā i agelu o lo'o 'au'auna iā te 'oe. Afai e fa'aosooso oe e Satani, 'aua e te māmāvaina se 'upu masalosalo pe pouliuli. Afai e te filifili e tatala le faitoto'a i āna fautuāga, o le a fa'atumuina lou mafaufau i le lē talitonu ma fesili fouvale. Afai e te fa'aleo ōu lagona, o masalosalogā uma e te fa'a'upu e lē gata e ta'u mai ai 'oe lava ia, a e o le fatu o le a ola ma fua mai fua i olaga o isi, ma atonu o le a lē toe mafai ona fa'au'ese le 'a'afiāga o āu 'upu. Atonu e te mafai e 'oe lava ia ona toe fo'i mai mai le taimi o fa'aosoosoga ma mailei a Satani, a e o nisi na tosina i

āu mea sa fai atonu o le a lē mafai ona
toe sola'ese mai le lē talitonu na e
fa'aleoina. O lea e matuā tāua tele le
tautalagia na'o mea o le a maua ai le
malosi fa'aleagaga ma le ola!

**(9) O Ā MEA E TATAU ONA I AI
I A TATOU TALANOĀGA O LE A
FA'AALIA AI LE FA'AOLATAGA
A LE ATUA?**

*O lē faia le vi'iga ma le taulaga, o lē
āva lea iā te A'u; ma lē ua mafaufau i
lona ala, 'Ou te fa'ailoa atu iā te ia
fa'aolataga mai le Atua. **Salamo 50:23***

Mau e Tau i ai: Salamo 50:14; 86:12;
34:1; 104:33; I Peteru 2:9

O agelu o lo'o fa'alologologo ia
lagona po o ā itu'aiga fa'amatalaga o
lo'o tatou 'aveina i le lalolagi e fa'atatau
i lou Matai i le lagi. O āu talanoāga ia
fa'atatau i Lē o soifua, o lo'o Ia fautua
mo 'oe i luma o le Tamā. Pe afai e te
ta'ita'i le lima o sau uō, ia i ōu laugutu
ma lou loto le vi'iga i le Atua. O iinei o
le a tosina ai ōna manatu iā Iesu.

**(10) O LE Ā LE FAUTUĀGA UA
TU'U MAI I LE AFIOGA PA'IA IĀ I
TATOU E FA'ATATAU I LE
MASALOSALO MA LE LOTO UA
FA'AVAIVAI?**

*Ia outou faia mea uma lava ma le lē
muimui, ma le lē fefinaua'i. **Filipi 2:14***

Mau e Tau i ai: Roma 12:8; 14:1; II
Korinito 12:19, 20; Efeso 4:31; I
Timoteo 6:4-6

O tagata uma lava e i ai tofotofoga; o tigā e faigatā ona tau'ave, o fa'aosoosoga e faigatā ona tete'e. 'Aua e te ta'u fua ōu fa'afitauli i isi tagata e pei lava o 'oe, a e ia avatu mea uma i le Atua i le tatalo. Ia fai ma tulafono le 'aua lava lafo se 'upu masalosalo e tasi po o le fa'avaivai fo'i. E tele mea e te mafai ona faia e fa'amalamalamaina ai olaga o nisi ma fa'amalosia ai a latou taumafaiga, e ala i 'upu o le fa'amoemoe ma le fa'afiafia.

E tele ni agaga toa ua matuā fa'a'u'una'iina e fa'aosoosoga, ua toetoe ina fa'ato'ilaloina i le fete'ena'iga e ia lava ma le malosi o le ti'apolo. Ia 'aua ne'i e fa'alotovaivai i se tasi i lana tauiviga faigatā. Fa'alototele iā te ia i 'upu o le fa'amoemoe o le a 'u'una'iina ai o ia i lana savaliga. O le a fa'apea ona fa'asusulu atu ai le malamalama mai iā te outou. "Auā e leai se tasi o tatou e ola mo ia lava" (Roma 14:7). E ala i la tatou amio e lē o mafaufauina a e ia mafai ona fa'alototele ma fa'amalosia ai nisi, po o le mafai fo'i ona fa'aloto vaivai ma tutuli'ese ai i latou mai iā Keriso ma le 'upu moni.

(11) O LE FA'ATASI MAI O AI O LE A MAUA AI LE FA'A'ATO'ATOAINA O LE FIAFIA MA LE LOTO MALIE?

*'Ou te tu'u Ieova i o'u luma e lē aunoa; auā o i lo'u itu taumatau o Ia, e lē fa'agae'etia ai lava a'u....E te fa'aailoa mai iā te a'u le ala o le ola; o i Ōu luma le fiafia e malie ai; o i Lou itu taumatau le 'oli'oli e fa'avavau. **Salamo 16:8, 11***

Mau e Tau i ai: Galuega 2:28; Iuta 24; Salamo 36:8; 4:6, 7; 17:15; 21:6; 42:5

E to'atele nisi e i ai le manatu sesē i le soifuāga ma le uiga o Keriso. Ua manatu latou e lē iā te Ia le mafanafana ma le 'oli'oli, ma o Ia e faigatā, sauā, ma e leai se fiafia. O le tele o taimi o fa'agaoioiga o tapua'iga uma e valiina i nei va'aiga fa'anoanoa.

E ta'ua so'o sa tagi Iesu, a e le'i iloa lava Ia o 'ata'ata. E moni lava o lo tatou Fa'aola o se Tagata o Fa'anoanoāga, ma e masani ma tigā, auā na Ia tatala atu Lona finagalo i mafatiāga uma o le fanau a tagata. A e ui ina o Lona soifuāga e lē loto fa'apito ma sa fa'amalumaluina i le tigā ma le puapuagā, e le'i to'ilalo ai Lona agaga. O Ōna fofoga e le'i fa'ailoa ai le mafatia ma le lē malie, a e na o le to'afilemū. O Lona finagalo o le puna o le vaiola, ma o mea uma na Ia femaliua'i ai sa Ia avatu le malōlōga ma le filemū, o le fiafia ma le 'oli'oli.

O lo tatou Fa'aola na matuā fa'amaoni ma naunauta'i, e le'i i ai se uiga e pogisā po o le lē fiafia. O olaga o i latou uma e fa'aa'oa'o iā te Ia o le a fa'atumuina i fuafuāga e maoa'e; e iā i latou se lagona loloto e fa'ataunu'uina lona lava tiute tau'ave. E 'alo'ese mai le fai mea fa'aulaula; e leai ni fiafiāga so'ona fai, e leai ni tausuaāga i mea e afāina ai isi; a e o le tapua'iga a Iesu e avatu ai le filemū e pei o se vaitafe. E na te lē tineia le malamalama o le uiga fiafia; na te lē taofia le 'oli'oli pe fa'apua'oa le susulu o le foliga 'ata'ata. E le'i afio mai Iesu ina ia 'au'auna atu tagata a e ina ia 'au'auna o Ia; afai e

nofo tupu o Ia i le loto, o le a tatou mulimuli i Āna fa'ata'ita'iga.

Fa'afetai i le Atua lo'u Tamā mo le fa'aaliga o Lou alofa iā te a'u e lē masalomia, i le meaalofo o Lou Ālo mo lo'u fa'aolataga. Ua ou filifili e tumau ma Iesu ina ia ou maua le 'oli'oli ma le loto malie ato'atoa o lo'o Ia naunau e tu'u mai iā te a'u.

Li'o le tali: **Ioe** **Lē mautonu**

Ou te talia le fa'aaloaloga o le tau'aveina le igoa "Kerisiano" ma filifili e fa'ailoa i isi le fiafia, filemū, ma le 'oli'oli e maua pe a fa'atasi iā te Ia.

Li'o le tali: **Ioe** **Lē mautonu**

Ou te filifili e fa'atuatua i le Atua ona ua ou iloa e na'o le fa'atuatua iā te Ia e maua ai le puipuiga mai pepelo a Satani ma le lē talitonu.

Li'o le tali: **Ioe** **Lē mautonu**

O lo'u fa'amoemoe ia si'itia a'e ma fa'amalosi i latou o lata i o'u tafatafa ina ia lē tāfea atu i le lē talitonu ma le loto fa'avaivai.

Li'o le tali: **Ioe** **Lē mautonu**



Lesona 16

'Oli'oli Mo le Asō ma le Fa'avavau!

**(1) O LE Ā LE MEA E TATAU
ONA TATOU FAIA PE A
FA'ATIGĀ MAI TATOU E ISI?**

*A ia outou feagaleleia'i, ia
femutimutivalea'i lo outou alofa, ia
fefa'amagaloa'i outou, fa'apei ona
fa'amagaloina outou e le Atua iā
Keriso. Efeso 4:32*

*O le mafaufau o le tagata e
fa'agesegese ai lona ita; o lona vi'iga
fo'i lea, ina ua lē manatua lona
agaleagaina. Fa'ata'oto 19:11*

Mau e Tau i ai: Fa'ata'oto 12:16;
14:29; 15:1, 18; 16:32; 17:14; Kolose
3:12, 13

Afai e tatou te teu fa'alauaualuga i o tatou mafaufau uiga lē alofa ma le fai mea lē tonu a isi, o le a tatou iloa ai e lē mafai ona tatou alolofa iā i latou e pei ona alofa Keriso iā i tatou; a e afai o le a tumau i o tatou manatu le alofa matalasi ma le fa'apalepale o Keriso mo i tatou, o le agaga fo'i lea o le a tafe atu i nisi. E tatau ona tatou alofa ma āva le tasi i le tasi, e tusa lava pe o ā sesē ma le lē ato'atoa e tatou te va'aia. O le loto maulalo ma le lē fa'afefeteina e ao ona galuea'iina, ma se onosa'i fa'apalepale mo sesē o isi. O i inā o le a tineia ai le loto fa'apito ma le va'ai e vāapiapi a e faia i tatou o ē loto maulalo ma le agaalofoa.

(2) O LE Ā LE MEA E TATAU ONA TATOU FAIA E VAVAO AI LE FA'ALAUATELEINA O LE LOTO FA'AVAIVAI?

Ia e fa'atuatua i le Atua ma lou loto atoa; a e 'aua le fa'alagolago i lou lava atamai. Fa'ata'oto 3:5

Mau e Tau i ai: Salamo 37:5-7; 62:8; 115:9-11; 125:1; Isaia 26:3, 4; Ieremia 17:7, 8

Ua fa'apea mai le faipese, "Ia e fa'atuatua i le Atua, ma e fai amio lelei; ia e nofo i le nu'u, ma tausisi i le fa'amaoni" (Salamo 37:3). E tofu le aso ma ōna 'avega, o mea e popole ma atuatuvaile ai; pe a tatou fetaia'i ua tatou sauni loa e talanoa i o tatou faigatā ma tofotofoga. O le tele o fa'alavelave nonō ua fa'atāuaina ma ua fa'amata'u ai, o le mamafa o le popole ua fa'aleoina, e

foliga mai ai e leai so tatou Fa'aola e alofa mutimutivale o lo'o sauni e fa'afofoga iā tatou talosaga uma ma o Ia o le fesoasoani e fa'atasi mai i taimi uma e mana'omia ai.

(3) O LE Ā LE FOLAFOLAGA E MAFAI AI ONA TATOU ILOA O LE A LĒ TU'ULAFOA'INA I TATOU E LE ATUA I SO'O SE TULAGA?

*Ia aunoa a outou amio ma le matape'ape'a; ia gata ia o outou mana'o i mea ua iā te outou; auā ua fetalai mai o Ia, 'Ou te lē tu'ua lava 'oe, 'Ou te lē tu'ulafoa'i lava iā te 'oe. **Eperu 13:5***

Mau e Tau i ai: Teuterenome 31:6, 8; Iosua 1:5; I Samuelu 12:22; I Nofoa'iga Tupu 28:20

E i ai nisi e fefefe ma tu'uloto faigatā i taimi uma. O aso uma e si'omia lava i latou i fa'ailogā o le alofa o le Atua; o aso uma o lo'o fa'amalieina i latou i le tamao'aiga o Āna fa'amanuiāga; a e o lo'o misi i la latou va'ai nei fa'amanuiāga o le taimi nei. O latou mafaufau o lo'o tumau pea i se mea faigatā e manatu atonu o le a o'o mai; pe o se faigatā atonu o lo'o i ai, e ui ina la'itiiti, a e o le a fa'atauasoia ai o latou mata ma lē iloa ai le tele o mea e tatau ona fa'afetai ai. O fa'afitauli ua feagai ma latou, ua lē fa'aaga'i atu ai i le Atua le pogai o lo latou fesoasoani, ua vavae 'ese i latou mai iā te Ia ona ua fafaguina le vevesi ma le fa'atu'i'ese.

E lelei ea pe afai e tatou te lē talitonu? Aiseā tatou te lē fa'afetai ai ma

tatou lē talitonu? O Iesu la tatou uō; e tāua i le lagi uma lo tatou lelei. E lē tatau ona tatou fa'atagaina faigatā ma fa'afitauli o le olaga o aso ta'itasi e fa'apopole ai le mafaufau ma puaoa ai le va'ai. Afai e tatou te faia fa'apea o le a iā te i tatou i taimi uma se uiga maitaita ma le lē malie. E lē tatau ona tatou atuatuvaale ona e i'u ai i le popolevale ma e fa'aloto vaivai ai, a e lē fesoasoani i le tau'aveina o a tatou puapuagā.

(4) O LE Ā LE MEA O LE A FAIA E LE ALI'I MO I TATOU PE A TATOU FA'AILOA ATU IA MA FA'ATUATUA FA'AMAONI IĀ TE IA?

Ia e manatua o Ia i ōu ala uma, ona fa'atonuina ai lea e Ia lava ōu ala.

Fa'ata'oto 3:6

Mau e Tau i ai: Fa'ata'oto 16:3, 9; Salamo 25:8, 9; 32:8; Isaia 30:21; 48:17; Ieremia 10:23

Atonu o lo'o e fememea'i i pisinisi; atonu o lou aga'i i luma ua tauau ina pouliuli ma ua pogisā tele, ma ua fa'amata'u mai 'oe i le tō'esea o mea uma; a e ia 'aua ne'i fa'avaivai; ia lafoa'i mea e popole ai i le Atua, ma ia tumau le to'afilemū ma le fiafia. Tatalo mo le poto e mafaia ai au mea o lo'o feagai ai ma le mafaufau lelei, o le a puipuia ai mai le lē mautonu ma le malaia. Ia fai lau vaega i mea uma e te mafai ona e faia ina ia aumaia ai se i'uga e fiafia ai. Na folafola mai lava e Iesu Lana fesoasoani, a e e lē 'ese mai i a tatou taumafaiga. Afai tatou te fa'alagolago i

lo tatou Fesoasoani, ua e faia mea uma e mafai ona e faia, ia talia le fa'ai'uga ma le fiafia.

(5) PE A TATOU FA'AFESAGA'I MA TOFOTOFOGA, O LE Ā LE FA'AMALOSI'AGA UA TU'U MAI E LE ALI'I IĀ I TATOU?

Ua 'Ou fai atu nei mea i a te outou, ina ia outou maua le manuia i a te A'u; e maua fo'i outou e le puapuagā i le lalolagi, a ia outou loto tetele, ua 'Ou manumalō i le lalolagi. Ioane 16:33

Mau e Tau i ai: Ioane 14:27; Salamo 85:8-11; Roma 5:1, 2; Filipi 4:6, 7

E lē o le finagalo o le Atua ia mafatia Ōna tagata i mea e popole ai. A e e lē fa'asesēina fo'i i tatou e le Ali'i. E lē o fetalai mai o Ia iā i tatou, "Aua e te fefe; e leai ni mea faigatā i lou auala." Na te silafia e i ai fa'aosoosoga ma faigatā, ma e Na te fa'amanino mai iā te i tatou. E lē o fa'apea o le a Ia 'ave'ese Ōna tagata ma le lalolagi o agasala ma le amioleaga. peita'i ua Ia fa'asino iā i latou le lafitaga e mautinoa e saogalemū ai. O Lana tatalo mo Ōna so'o, "Ou te lē ōle atu ina ia e 'ave 'ese iā te i latou i le lalolagi, a e ia E tausi iā te i latou ina ne'i leaga." Ma na Ia fetalai mai, "I le lalolagi e maua fo'i e puapuagā; a ia outou loto tetele; ua Ou manumalō i le lalolagi" (Ioane 17:15; 16:33).

(6) O LE Ā LE FOLAFOLAGA E MAFAI ONA TATOU TAPAINA E FA'ATATAU I MEA E TATOU TE MANA'OMIA MO ASO TA'ITASI?

A ia outou mua'i sa'ili le malō o le Atua ma Lana amiotonu, ona fa'aopoopoina atu lea o ia mea uma iā te outou.

Mataio 6:33

Mau e Tau i ai: I Tupu 3:11-13; 17:13; Malaki 3:10, 12; Luka 12:31; Ioane 6:27; II Nofoa'iga Tupu 31:10; Luka 5:6, 7

I Lana Lauga i le Mauga, na a'oa'o ai e Iesu Ōna so'o lesona tāua e fa'atatau i le mana'omia o le talitonuina o le Atua (Mataio 5). O nei a'oa'oga na fuafuaina ina ia fa'amalosia ai le fanau a le Atua i augā tupulaga uma, ma ua o'o mai i o tatou taimi e tumu i fa'atonuga ma fa'amafanafanaga. Ua fa'asino e le Fa'aola i latou e mulimuli iā te Ia i manufelegelele o le lagi a o latou fa'aleo pesega fa'afetai, e lē fa'apopoleina i mafaufauga o le olaga; "auā latou te lē lūlū saito, pe selesele, pe fa'aputu i fale saito, a e fafagaina i latou e lo outou Tamā i le lagi." Na fesili le Fa'aola, "E lē sili ea lo outou lelei i lo latou" (Mataio 6:26, 27). O Lē foa'i mea'ai mo tagata ma meaola e fa'amafola Ōna 'a'ao e maua ai mea uma e tausi ai Āna foafoāga uma. E Na te amana'ia manu felegelele o le lagi. O mea uma latou te mana'omia e Na te aumaia. E tatau ona latou fa'aputupu fa'atupu fatu ua Ia fa'asalalau mo i latou. E ao ona latou sauniuuni mea mo latou ofāga. E tatau fo'i ona latou fafaga a latou toloa'i. E tausagi latou a o ō atu i a latou galuega, auā o "lo latou Tamā o i le lagi e fafaga i a te i latou." Ma " e lē sili ea outou i lo latou?" E lē sili ea 'oe, e poto, e tapua'i fa'aleagaga, i lo manu felegelele o le lagi?

E lē o lo tatou Pogai e tausia o tatou ola,
Lē na faia i tatou i Lona fa'atusa, e
aumaia mea tatou te mana'omia pe afai
tatou te fa'atuatua iā te Ia?

**(7) O LE Ā LE MEA UA FETALAI
MAI IESU IA TATOU TU'ULOTO
E FAI MA TA'UTINOGA O LANA
TAUSIGA ALOFA?**

*Se ā fo'i le mea tou te popole ai i ofu?
Ia outou mafaufau i lautalotalo o le
vao, pe fa'apefea ona tupu; latou te lē
galulue, latou te lē milo fo'i; a 'Ou te
fai atu i a te outou, o Solomona ma lona
matagofie tele na lē ofu o ia e pei o le
tasi o na mea. Afai e fa'aapea ona
fa'aofuina e le Atua le vao o le fanua, o
ola mai i le asō, a e lafoina a taeao i le
ogāuma; e lē sili ea ona fa'aofuina o
outou ē fa'atuatua itiiti? **Mataio 6:28-
30***

Mau e Tau i ai: Mataio 6:25, 31; Luka
22:35

Na fa'asino e Keriso Ōna so'o i
lautalotalo o le fanua, o lo'o tutupu i le
tele o le tamāo'aiga ma le matagofie ua
tu'uina i ai e le Tamā i le lagi, o se
fa'ailoga o Lona alofa i le tagata. Sa Ia
fetalai mai ai, "Ia outou mafaufau i
lautalotalo o le vao, pe fa'apefea ona
tupu." O le matagofie ma le uiga
faigofie o nei fugāla'au e sili mamao atu
i le matagofie ma le lalelei o Solomona.
O la'e i e aupito matagofie e faia i le
poto o le tagata e lē mafai ona
fa'atusaina i le uiga moni o le pupula
matagofie o fugāla'au o foafoāga a le
Atua. Na fesili Iesu, "Afai e fa'aapea ona

fa'aofuina e le Atua le vao o le fanua, e ola mai i le asō a e lafoina a taeao i le ogāuma, e lē sili ea ona fa'aofuina o outou e fa'atuatua itiiti?" Pe afai o le Atua, le Tusi Ata pa'ia, ua tu'uina i se fugāla'au fa'atauva'a lea e fa'aumatia i le aso e tasi lo latou tulaga fa'aeteetegatā ma lanu 'ese'ese, e lē matuā sili mamao ai ea Lana tausiga mo i latou na faia i Lona lava fa'atusa? O lenei a'oa'oga a Keriso o se a'oa'iga i le manatu popole, o le femēmēa'i ma le masalosalo i le loto e leai se fa'atuatua. E finagalo le Ali'i mo Lana fanau uma ia fiafia, to'afilemū, ma ia usiusita'i.

**(8) O Ā FA'AGAOIOIGA E ONO
E FA'ATINOINA AI LE
'AU'AUNAGA TATOU TE FAIA,
ONA O LE ALOFA MO LE ATUA,
E FESOASOANI AI I ISI, MA O LE
A TAUIA I LE MAUA O LE
TULAGA FIAFIA MA LE
FA'AATOĀGA MONI?**

E lē o lenei ea le anapogi 'Ou te loto i ai? Ina ia tatalaina fusi na faia i le amio leaga, e tatala fusi o le amo, e tu'uina atu ia sa'oloto ē ua fa'asauāina, ma ia outou gausia amo uma lava. E lē o lenei ea? Ona ia tofitofi au mea e 'ai i lē ua fia 'ai, ia 'aumai i lou fale ē ua matitiva ma fa'asauāina; a e iloa lē ua lē lavalavā e te fa'aofuina o ia, 'aua fo'i e te lafi i a i latou o lou lava aiga. Isaia 58:6, 7

Mau e Tau i ai: Isaia 58:8-11; Iakopo 1:27; Salamo 112:9; Failauga 11:1, 2; Fa'ata'oto 25:21; 28:27; Tanielu 4:27; Mataio 25:35-40

O le fiafia e sa'ili ona o le manatu fa'apito, e i fafo atu o le ala o tiute, e lē talafeagai, e fese'ia'i, ma e lē tumau; e vave mavae 'ese, ma o le agaga o le a fa'atumulia i le lagona ua tu'u to'atasi ma le fa'anoanoa; a e i ai le oli'oli ma le loto malie i le galuega a le Atua; e lē tu'ulafoa'iina le Kerisiano ina ia savali i auala e lē mautinoa; e lē tu'ua ina ua fa'asesēina ma ua fa'anoanoa i fa'amoemoe ua lē atofaina. Afai tatou te lē maua le fiafia o lenei olaga e mafai ona tatou maua pea le fiafiāga i le va'ai atu i le ola o i lumana'i.

(9) PE A O FA'AMANUIAINA I TATOU I LE MAFUTAGA MA KERISO MA LE FA'ASOA ATU O LE 'UPU MONI, O LE Ā LE FOLAFOLAGA UA TU'UINA MAI MO LO TATOU FA'AMAFANAFANAGA?

Ia outou a'oa'o atu i a te i latouia tausi i mea uma ua 'Ou fai atu ai iā te outou; fa'auta fo'i, 'Ou te iā te outou i aso uma lava, e o'o lava i le gata'aga o le lalolagi. Mataio 28:20

Mau e Tau i ai: Salamo 46:7, 11; Isaia 41:10; Mareko 16:20; Ioane 14:18; II Timoteo 4:17

O aso nei lava fo'i e mafai ona maua e Kerisiano le fiafia i le feso'ota'iga ma Keriso; e mafai ona latou maua le malamalama o Lona alofa, o le fa'amafanafanafaga e faifai pea o Lona fa'atasi mai. O la'asaga uma o le olaga e mafai ona aumai ai tatou ia atili latalata iā Iesu, e mafai ona aumai

iā i tatou se lagona i le loloto o Lona alofa, ma atonu e aumai ai i tatou i se la'asaga ua lata atu ai i le aiga matagofie o lo'o fa'amoemoeina. Ia 'aua ne'i tatou lafoa'i lo tatou fa'atuatua, a e ia i ai le mautinoāga mautū, ia mausalī atu i lo se taimi ua mavae. "Ua fesoasoani mai le Ali'i i a i tatou, ua o'o mai i le aso nei" (I Samuelu 7:12), ma o le a fesoasoani mai iā i tatou e o'o i le i'uga.

(10) AISEĀ E TATAU AI ONA TATOU TAOFIMAU PEA I FA'AMANUIĀGA NA TU'U MAI E LE ATUA I TAIMI UA MAVAE?

Tau ina fa'aeteete 'oe i a te 'oe, ma ia e matuā fa'aeteete lava iā te 'oe, ne'i galo iā te 'oe nei mea na iloa ai e ōu mata, ne'i te'a 'ese ai lou loto i aso uma o lou olaga, a ia e fa'ailoa atu i lau fanau, ma le fanau a lau fanau. Teuterenome 4:9

Mau e Tau i ai: Teuterenome 6:7; Eperu 2:1; 11:19, 20; Fa'ata'oto 4:20-23; 3:1-3

Se'i o tatou va'ava'ai atu i poutū fa'amanatu, o mea e fa'amanatu ai mea na faia e le Atua e fa'amafanafana ma lavea'i ai tatou mai le lima o lē e fa'aumatia. Ia fou pea i o tatou mafaufau le alofa tunoa fa'apalepale o lo'o fa'ailoa e le Atua iā te i tatou, - o loimata ua Ia soloi'esea, o tigā ua Ia fa'amalie, o atuatuva'e ua Ia 'ave'ese, o le fefe ua Ia fa'ate'a, o mana'oga ua Ia fa'atumuina, o fa'amanuiāga ua Ia foa'i mai,- o lea ua fa'amalosia ai i tatou mo mea uma o lo'o i o tatou luma e o'o i le vaega o totoe o lā tatou faigamalaga fa'aleagaga.

**(11) O LE Ā LE FOLAFOLAGA E
MAFAI ONA TATOU
TAOFIMAUINA A O TATOU
FEAGAI MA TOFOTOFOGA MA
FA'AFITĀULI O FETAUA'IGA O
LO'O AGA'I MAI?**

*Ua lē maua outou e se tofotofoga e 'ese
i lo tagata; a ua fa'amaoni le Atua, o Lē
na te lē tu'uina atu outou i le tofotofoga
e sili i se mea ua outou lavātia, a e
sauni fo'i fa'atasi ma le tofotofoga se
mea e sao ai ina ia outou lavā 'o'ono. I
Korinito 10:13*

Mau e Tau i ai: I Peteru 1:6, 7; 5:8-10;
Iopu 23:10; Efeso 6:12, 13; Fa'aaliga
2:10; 3:10

Ua i la tatou va'ai fa'afitauli fou o
lo'o aga'i mai, a e ia ao ona tatou va'ai i
mea ua tuana'i fa'aapea ma mea o le a o'o
mai, ma fa'aapea ai, "Ua fesoasoani mai
le Ali'i i a i tatou" (I Samuelu 7:12). Ma
"E pei o ou aso fo'i e fa'aapea lou malosi"
(Teuterenome 33:25). O le a lē sili a'e le
tofotofoga i le malosi o le a aumai e
mafa'i ona tatou tau'aveina ai. O lea ia
tatou faia la tatou galuega i le mea e
tatou te maua atu ai, ia talitonu po o le ā
lava le mea e o'o mai, o le a tu'uina mai
le malosi e tatau ai mo le tofotofoga o le
a o'o mai.

**(12) ATONU O LE A TATOU
MOLIMAUINA MA AFĀINA AI I
TOFOTOFOGA FAIGATĀ, O LE Ā
LE MEA O LE A MAFAI ONA
MAUA AI E TATOU LE
FA'AMAFANAFANAINA MA LE
FIAFIA INA UA TATOU ILOA?**

*Ua tatou iloa fo'i e galulue fa'atasi mea
uma e lelei ai i latou ē ua alofa atu i le
Atua, o ē ua vala'auina i Lona finagalo.*
Roma 8:28

Mau e Tau i ai: Roma 8:35-39; 5:3-5;
Teuterenome 8:2, 3, 16; Salamo 46:1, 2;
Sakaria 13:9; II Korinito 4:15-18

**(13) ONA UA MANUMALŌ E ALA
I LE ALOFA TUNOA O LE ATUA,
O Ā 'UPU OFOFOGIA O LE A
MAFAI ONA TATOU
FA'AMOEMOE E FA'ALOGO I AI?**

*Ona fai atu lea o le Tupu i ē o i Lona itū
taumatau, Ō mai ia, o outou ua
fa'amanuiaina e Lo'u Tamā, ia fai mo
outou tofi le malō ua saunia mo outou a
o le'i fa'avaeina le lalolagi. Mataio
25:34*

Mau e Tau i ai: Mataio 25:21, 23; 5:3-
12; Luka 12:32; II Timoteo 4:8

E i ai le aso o le a talaia ai
faitoto'a o le lagi ina ia fa'aulufale ai le
fanau a le Atua, ma e mai fofoga o le
Tupu o le mamalu o le a fa'alogoina
fa'amanuiāga e o latou taliga pei o
pesega e matuā malie. Ona talia ai lea o
le 'au fa'aolaina i le aiga ua saunia e
Iesu mo i latou. O a latou pa'aga o le a
lē o le 'au amioleaga o le lalolagi, o ē
pepelo, ifo i tupua, ē 'ele'elea, ma le 'au
lē talitonu; a e o le a latou fa'atasi ma ē
na manumalō iā Satani ma e ala i le
alofa tunoa o le Atua ua latou maua le
amio e ato'atoa. O le mana'o i le
agasala, o lē ato'atoa uma, ua afāina ai i
latou i lalo nei ua 'ave'esea e ala i le toto

o Keriso, ma o le silisili 'ese ma le pupula o Lona mamalu, e sili mamao atu i le pupula o le lā, e tu'uina atu iā i latou. Ma o le matagofie o le amio, o le ato'atoa o Lona uiga, o le a susulu e ala atu iā te i latou, o le tāua e sili mamao atu i lenei va'aiga matagofie mai fafo. O i latou e aunoa ma se sesē i luma o le nofoāli'i sinasina, ma tofusia i le mamalu ma avanoa o le 'au agelu.

**(14) A O LATA MAI LE
FA'AI'UGA O LE FINAUGA TELE
I LE VĀ O LE ATUA MA SATANI,
O LE Ā LE FESILI TĀUA E TATAU
ONA TATOU FESILI AI IĀ I
TATOU LAVA IA?**

*Auā se ā le aogā i le tagata pe afai na te maua le lalolagi uma, a e maumau lona ola? Se ā fo'i se mea e avatu e le tagata e togiola a'i lona ola?***Mataio 16:26**

Mau e Tau i ai: Mataio 5:29; Luka 9:25; 12:20, 21; Iopu 27:8; Salamo 49:7, 8, 15

I le va'aiga o le matagofie o le tofi atonu o le a faia mo ia, "o le ā se mea e mafai ona avatu e le tagata e fai ma sui mo lona ola?" Atonu e mativa, a e iā te ia le tamao'aiga ma le mamalu e lē mafai e le lalolagi ona tu'uina atu. O le tagata ua fa'aolaina ma fa'amamāina mai le agasala, fa'atasi ma le malosi atoa ua tu'uina atu i le galuega a le Atua, e sili atu lona tāua; ma e sili le oli'oli i le lagi i luma o le Atua ma agelu pa'ia ona o le tagata e to'atasi ua fa'aolaina, se oli'oli e fa'ailoa i pesega ma vi'iga o le manumalō.

*Ua 'ou iloa pe afai 'ou te fa'atuatua i
lo'u lava poto ma lo'u malamalama, o
lo'u i'uga o le fa'anoanoa ma le mata'u.
'Ou te fa'afetai mo Lana folafolaga
fa'amaoni e Na te ta'ita'iina a'u i Lona
malō.*

Li'o le tali: Ioe Lē mautonu

*Ua 'ou filifili e 'u'umau i lo'u loto
fa'amanuiāga mai o'u aso ua tuana'i ina
ia 'ou lē masalosalo i Lana ta'ita'iga i le
asō ma lo'u lumana'i. 'Ou te fa'afetai
mo Lana puipuiga ma le ta'ita'iga alofa
a o 'ou uia ala faigatā ma tofotofoga e
feagai ai i le faigāmalaga o lenei olaga.*

Li'o le tali: Ioe Lē mautonu

*'Ou te fa'afetai i le Atua mo le fa'aaliina
mai o la'asaga e tatau ona 'ou filifilia
ina ia 'ou tau latalata atu ai iā te Ia,
mai lenei su'esu'ega o le Tusi Pa'ia, ma
ua 'ou tepa taula'i atu i le taimi e
fa'alogoina ai 'upu ofoofogia, "Ua lelei,
la'u 'au'auna fa'amaoni e, ulufale mai i
le maota ua 'Ou saunia mo 'oe."*

Li'o le tali: Ioe Lē mautonu
